

PROPRIUM ORDINIS PRÆDICATORUM

IV

RITUALE

PROFESSIONIS RITUS

ad mentem novi iuris liturgici instauratus

auctoritate Rev.mi Patris Fr. TIMOTHEI RADCLIFFE

eiudem Ordinis Magistri

exaratus

eiisque iussu editus

**EDITIO TYPICA**

AD SANCTÆ SABINÆ

ROMÆ 1999



## INDEX GENERALIS

Decreta Congregationis pro Cultu Divino	
et pro Disciplina Sacramentorum .....	7
Litteræ promulgationis Magistri Ordinis .....	9
Abbreviationes et sigla .....	13
Introductio generalis .....	19

### PARS PRIMA

#### ORDO RECEPTIONIS ET PROFESSIONIS FRATRUM

Caput I : Ritus receptionis novitiorum .....	32
Caput II : Ritus professionis simplicis .....	41
Caput III : Ritus professionis sollemnis intra missam peragendus	51
Caput IV : Ritus renovationis votorum temporariorum intra missam peragendus .....	61
Caput V : Missa in xxv vel l anniversario professionis .....	64

### PARS SECUNDA

#### ORDO RECEPTIONIS ET PROFESSIONIS MONIALIUM

Caput I : Ritus receptionis novitiarum .....	70
Caput II : Ritus professionis simplicis .....	78
Caput III : Ritus professionis sollemnis intra missam peragendus	88
Caput IV : Ritus renovationis votorum temporariorum intra missam peragendus .....	98
Caput V : Missa in xxv vel l anniversario professionis .....	101

## ADNEXUM

### ORDO RECEPTIONIS ET PROFESSIONIS IN INSTITUTIS VITÆ CONSECRATÆ

Caput I : Ritus receptionis novitiarum .....	108
Caput II : Ritus professionis temporariæ .....	117
Caput III: Ritus professionis perpetuæ intra missam peragendus	129
Caput IV: Ritus renovationis votorum temporariorum vel promissionis intra missam peragendus .....	139
Caput V : Missa in xxv vel L anniversario professionis .....	142

## PARS TERTIA

### ORDO RECEPTIONIS ET PROFESSIONIS IN FRATERNITATIBUS S. DOMINICI

Caput I : Ritus receptionis candidatorum .....	147
Caput II : Ritus professionis .....	161

## APPENDIX

I.     Lectiones biblicæ .....	175
II.    Oratio universalis seu fidelium .....	182
III.   Præfationes .....	189
IV.    Textus ad libitum	
A) Litaniæ Sanctorum in professione perpetua .....	193
B) Sollemnis benedictio seu consecratio nuper professorum .	198
V.    Declaratio et protestatio pro admissione ad Ordinem vel ad Institutum .....	207
VI.   Formula absolutionis generalis de transgressionibus regulæ .	208



CONGREGATIO DE CULTU DIVINO  
ET DISCIPLINA SACRAMENTORUM

—  
DECRETA

**Ordinis Fratrum Praedicatorum**

I

Prot. 1191/97/L

Instante Reverendo Patre Chrys Finn, Magistri Ordinis Fratrum Praedicatorum Vicario, de mandato eiusdem Magistri, litteris die 12 mensis iunii 1997 datis, vigore facultatum huic Congregationi a Summo Pontifice IOANNE PAULO II tributarum, Rituale Professionis, iure particulari servato ad normam n. 80 Constitutionis *Sacrosanctum Concilium*, iuxta exemplar lingua latina exaratum et huic Decreto adnexum libenter probamus.

In textu imprimendo inseratur ex integro hoc Decretum, quo ab Apostolica Sede petita approbatio conceditur.

Eiusdem insuper textus impressi duo exemplaria ad hanc Congregationem transmittantur.

Contrariis quibuslibet minime obstantibus.

Ex ædibus Congregationis de Cultu Divino et Disciplina Sacramentorum, die 25 mensis martii 1998, in Sollemnitate Annuntiationis Domini.

GEORGIUS CARD. MEDINA E.  
*Præfector*

¤ GERARDUS M. AGNELO  
*Archiepiscopus a Secretis*

II

Prot. 25931/97/L

Instante Reverendo Patre Chrys Finn, Magistri Ordinis Fratrum Prædicatorum Vicario, de mandato eiusdem Magistri, litteris die 12 mensis iunii 1997 datis, vigore facultatum huic Congregationi a Summo Pontifice IOANNE PAULO II tributarum, *Ordinem receptionis et professionis sodalium fraternitatum clericorum vel laicorum S. Dominici*, iuxta exemplar lingua latina exaratum et huic Decreto adnexum, libenter probamus.

In textu imprimendo inseratur ex integro hoc Decretum, quo ab Apostolica Sede petita approbatio conceditur.

Eiusdem insuper textus impressi duo exemplaria ad hanc Congregationem transmittantur.

Contrariis quibuslibet minime obstantibus.

Ex aedibus Congregationis de Cultu Divino et Disciplina Sacramentorum, die 29 mensis aprilis 1998, in festo S. Catharinæ Senensis, virginis et Ecclesiæ doctoris.

GEORGIUS CARD. MEDINA E.

*Præfector*

+ GERARDUS M. AGNELO  
*Archiepiscopus a Secretis*



NOS

FR. TIMOTHEUS RADCLIFFE O.P.

S. THEOLOGIE PROFESSOR

AC TOTIUS ORDINIS PRÆDICATORUM

HUMILIS MAGISTER ET SERVUS

## Litteræ promulgationis Magistri Ordinis

Professionis ritum Ordinis nostri nuper a Sede Apostolica approbatum seu confirmatum universis Familiae Dominicanæ cœtibus adhibendum libentissime trado, uberem ad Ordinem vocatorum multitudinem implorans, qui “suam et aliorum salutem procurare cupientes”<sup>1</sup> vitam amplectantur evangelicam ac Verbi Dei prædicatio- ni vacent, propter quam nosmetipsos devovemus.<sup>2</sup>

Post *Proprium Officiorum* (1982) atque *Missale et Lectionarium* (1985), hic *Ritus professionis* sectio magni momenti exstat *Ritualis* quod est pars *Proprietatis O.P.* Prout nempe a novo iure liturgico præcipitur, ad *Ordinem Professionis Religiosæ Romanum* hic liber constanter refertur; eius elementa sibi aptans illa libertate adhibita quæ singulis religiosis familiis relinquitur.<sup>3</sup> Ordo igitur noster hæc præsertim fovere contendit: simplicitatem rituum - absque litaniis aut orationibus “benedictionis seu consecrationis” professorum - vim consecratoriam ipsi actui professionis propriam,<sup>4</sup> textuum ac monitionum addictionem quæ ex primæva antiquitate Ordinis vel ex nonnullis recentibus documentis ipsius Ordinis repetita sunt.

<sup>1</sup> LCO, n. 1, *Const. fund.*, § II.

<sup>2</sup> Cf. MO T. Radcliffe, Litt. ad Ordinem “Votati alla missione”, Pasqua 1994.

<sup>3</sup> SCCD, *Indicationes pro Ordine professionis religiosæ aptando* lingua Francogallica publici iuris factæ, die 15 iul. 1970: “Notitiae” 6, 1970, pp. 319-322 = EDIL I, pp. 697-701.

<sup>4</sup> Cf. P.-M. Gy, *Sur le caractère consécratoire de l'acte même du voeu solennel dans la théologie de Saint Thomas d'Aquin*, AOP 1998, oct.-dec.; V. Romano, *Indole e valore della Professione domenicana*, “Eco di S. Domenico”, Numero speciale, dicembre 1996.

Exinde ritus professionis nobis proprius seu peculiari traditio quæ essentialiter usque ad sancti Dominici tempora pertingit, Vaticani Secundi orientationibus adhibitis ritus plene liturgicus efficitur; primæva enim celebratio capitularis<sup>5</sup> - sua peculiari structura prædicta - nunc Eucharistiæ celebrationi vel saltem actioni liturgicæ coniuncta, in ecclesia peragitur. Actio itaque ecclesialis efficitur, in qua cuiusque fratris vel sororis oblatio cum illa ipsius Christi oblatione intime coniuncta invenitur.

Hæc sectio Ritualis nostri peculiari studio confecta est, specialis nempe laboris investigationis historicæ et liturgicæ atque consultationis universæ Familiæ Dominicanæ coetuum.<sup>6</sup> Multi utriusque sexus periti una cum Commissione liturgica Ordinis adlaboraverunt et ipse - ut Ordinis Magister - omnia laboris itinera sollerti cura sum prosecutus.

Uno quidem volumine hic *Ritus professionis* non solum fratribus et sororibus vitæ consecratæ præbetur, sed sub specie vitæ evangeliæ - ab ipso *incipit* «Introductionis generalis» memoratae - etiam ad laicos, sacerdotes et diaconos Fraternitatum Sancti Dominici pertinet. Una igitur Introductione illustrantur lineamenta formulariorum receptionis et professionis, quæ quidem elementa fundamentalia omnibus coetibus Ordinis communia continent. Ex quattuor autem sectionibus huius voluminis sua quæque Fratribus, Monialibus, Sororibus necnon sodalibus Institutorum Sæcularium et Societatum Vitæ Apostolicæ, Laicis et ceteris sodalibus Fraternitatum S. Dominicci est dicata.

Hic igitur *Ritus professionis*, qui pars est *Ritualis in Proprio Ordinis Prædicatorum* comprehensi, editio typica a me declaratur pro Fratribus, Monialibus et sodalibus Fraternitatum Sancti Dominici. In adnexo autem Ritus proponitur pro Sororibus et ceteris sodalibus Institutorum vitæ consecratæ Ordini aggregatorum, secundum determinationem Capituli generalis Tallaghtensis (1971),<sup>7</sup> sicut *Cærimoniale* prædecessoris mei fr. Martini Stanislai Gillet<sup>8</sup> iisdem fuit præbi-

<sup>5</sup> Cf. *Processionarium S.O.P.*, ed. MO E. Suarez, Romæ 1949, pp. 156-158.

<sup>6</sup> Cf. V. Romano, *Il Rito della Professione O.P.*, [nn.14-15], AOP 1998, oct.-dec.

<sup>7</sup> ACG 1971, n. 172: «Committimus Magistro Ordinis, ut opportune provideat de adaptatione ritus vestitionum et professionum apud moniales et sorores Ordinis nostri, ad unitatem liturgiæ Ordinis universi fovendum».

<sup>8</sup> Cf. *Cærimoniale iuxta ritum S. Ord. Præd. de Receptione ad habitum et de Professione tum temporaria tum perpetua pro Monialibus eiusdem Ordinis et Sororibus Tertiis Ordinis Regularis* (ed. minor), Roma 1930.

tum et Decretum Sedis Apostolicæ de supplementis Ordinis ad *Litur-giam Horarum* et ad *Missale Romanum* ea adhibenda etiam a Sorori-bus prævidit,<sup>9</sup> veluti elementum magni momenti circa cuiusdam Instituti aggregationem ad Ordinem.

Translationes et aptationes huius *Ritus professionis* pro diversis regionibus linguisticis conficiantur iuxta normas Sedis Apostolicæ necnon et indicationes iam pro ceteris partibus *Proprii nostri allatas*<sup>10</sup> vel hic infra in «Introductione generali» traditas.<sup>11</sup>

Præstet Dominus ut in nostra communi vocatione et missione unanimes proficiamus, qui unica professione eius mancipamur sequelæ.

Datum Romæ, e Curia nostra generalitia, die 25 mensis martii, in sollemnitate Annuntiationis Domini, anno Domini 1999.

Fr. Timothy RADCLIFFE, O.P.  
*Magister Ordinis*

Fr. Vincenzo ROMANO, O.P.  
*Præsidens Commissionis liturgicæ Ordinis*

Prot. N° 66/99/556

<sup>9</sup> Decretum approbationis "Officiorum" *Proprii O.P.* (Prot. CD. 671/76), in LHOP, p. VI.

<sup>10</sup> Cf. *Translationes Proprii O.P. linguis vernaculis*, in LHOP, «Intr. gen», nn. 72-79, pp. LX-LXIII.

<sup>11</sup> Cf. infra, nn. 19-23.



## ABBREVIATIONES ET SIGLA

AA	Concilium Vaticanum II, Decretum de apostolatu laicorum <i>Apostolicam Actuositatem</i> , 18 nov. 1965: AAS 58, 1966, pp.837-864.
AAS	"Acta Apostolicæ Sedis", Romæ 1909 sqq.
ACG	"Acta Capitulorum Generalium Ordinis Prædicatorum"
ACG I	"Acta Capitulorum Generalium Ordinis Prædicatorum", vol. I (1220-1303), ed. B.M. Reichert, Romæ 1898 (= MOPH III).
AFP	"Archivum Fratrum Prædicatorum", Lutetiae Parisiorum, Romæ 1931 sqq.
AG	<i>Antiphonarium S.O.P.</i> , ed. S. Gillet, Romæ 1933.
AGOP	Archivum Generale Ordinis Prædicatorum, Ad S. Sabinæ, Romæ.
ASOP [AOP]	"Analecta Sacri Ordinis Prædicatorum", Romæ 1893 sqq.; inde ab a. 1995: "Analecta Ordinis Prædicatorum".
BOP	<i>Bullarium Ordinis Fratrum Prædicatorum</i> , ed. A. Brémond, t. I, Romæ 1729.
CIC	<i>Codex iuris canonici</i> auctoritate Ioannis Pauli II promulgatus, 25 ian. 1983, cc. 641-658: EDIL II, pp. 418-421.
CL	Ioannes Paulus II, Adhortatio apostolica post-synodalibus <i>Christifideles Laici</i> de vocatione et missione laicorum in Ecclesia et in mundo, 30 dec. 1988: AAS 81, 1989, pp. 393-521.
CMS	<i>Cærimoniale iuxta ritum S. Ord. Pred. de Receptione ad habitum et de Professione tum temporaria tum perpetua, pro Monialibus eiusdem Ordinis et Sororibus Tertiis Ordinis Regularis</i> (ed. minor), Roma 1930.

<i>I Const.</i>	<i>Constitutiones antiquæ Ordinis Fratrum Prædicatorum</i> (1215-1237), ed. A.H. Thomas, <i>De oudste Constituties van de Dominicanen...</i> , Leuven 1965 (Bibliothèque de la Revue d'histoire ecclésiastique, Fasc. 42), pp. 309-369.
<i>II Const.</i>	<i>Constitutiones Ordinis Fratrum Prædicatorum</i> (1239-1241), ed. R. Creytens, <i>Les Constitutions des Frères Prêcheurs dans la rédaction de S. Raymond de Peñafort</i> , AFP 18, 1948, pp. 5-69, præsertim pp. 29-69.
Constantinus	Constantinus de Urbeveteri, <i>Legenda S. Dominici</i> , ed. H. Ch. Scheeben, Romæ 1935 (= MOPH XVI, pp. 286-352).
COP	<i>Cæremoniæ iuxta ritum S. Ordinis Prædicatorum</i> , ed. A. V. Jandel, Mechliniæ 1869.
DB	<i>De benedictionibus</i> , editio typica, Romæ 1985.
<i>Declar. gen.</i>	P. Damian Byrne MO, <i>Declarationes generales Regulæ Fraternitatum Laicalium S. Dominici</i> promulgatæ die 16 febr. 1988, in RFL, p. 88.
<i>Directorium</i>	<i>Directorium seu 'Formularium Ordinis Prædicatorum - Opusculum de agendis in Ordine'</i> prout exstat in Codice Ruthenensi (Rodez), AGOP XIV A 4 (sæc. XIV), pp. 11-27 = R. Creytens, <i>Le Directoire du Codex Ruthenensis conservé aux Archives Générales des Frères Prêcheurs</i> , AFP 26, 1956, pp. 98-126, præsertim pp. 109-126.
EDIL	R. Kaczyński (ed.), <i>Enchiridion documentorum instauratio liturgicæ</i> , I (1963-1973), Torino 1976; II (1973-1983), Roma 1988.
<i>Eccl. Off.</i>	<i>Ecclesiasticum Officium secundum Ordinem Fratrum Prædicatorum...</i> , vulgo dictum ' <i>Prototypus Humberti de Romanis</i> ', AGOP XIV L 1 (sæc. XIII).
ET	Paulus VI, Adhortatio apostolica <i>Evangelica Testificatio de religiosa vita renovanda</i> , 29 iun. 1971: AAS 63, 1971, pp. 497-526 et EDIL I, pp. 805-806.

---

Humbertus	Humbertus de Romanis, <i>Opera de vita regulari</i> , ed. J.-J. Berthier, 2 voll., Romæ 1888-1889 (reimpresio: Torino 1956).
Iordanus	Iordanus de Saxonia, <i>Libellus de principiis Ordinis Prædicatorum</i> , ed. H. Ch. Scheeben, Romæ 1935 (= MOPH XVI, pp. 25-88).
IOPA	SCCD, <i>Indicationes pro Ordine professionis religiosæ aptando</i> lingua Francogallica publici iuris factæ, die 15 iul. 1970: "Notitiæ" 6, 1970, pp. 319-322 et EDIL I, pp. 697-701.
LCM	<i>Liber Constitutionum Monialium O.P.</i> , ed. D. Byrne, ASOP 95, 1987, pp. 20-81.
LCO	<i>Liber Constitutionum et Ordinationum Fratrum Ordinis Prædicatorum</i> [1968], Romæ 1998.
LG	Concilium Vaticanum II, Constitutio dogmatica de Ecclesia <i>Lumen Gentium</i> , 21 nov. 1964: AAS 57, 1965, pp. 5-67 et EDIL I, pp. 87-101.
LHOP	<i>Liturgia Horarum. Proprium Officiorum O. P.</i> , ed. V. de Couesnongle, Romæ 1982.
MLOP	<i>Proprium Ordinis Prædicatorum, Missale et Lectuarium</i> , edd. V. de Couesnongle - D. Byrne, Romæ 1985.
MOP	<i>Missale iuxta ritum Ordinis Prædicatorum</i> , ed. A. Fernández, Romæ 1965.
MOPH	<i>Monumenta Ordinis Fratrum Prædicatorum Historica</i> , Lovanii - Romæ 1896 sqq.
OPR	SCCD, <i>Ordo Professionis Religiosæ</i> , Typis Poliglottis Vaticanis 1975 (reimpresio emendata): AAS 62, 1970, pp. 553 sqq. et EDIL I, pp. 653-659.
PC	Concilium Vaticanum II, <i>Decretum Perfectæ Caritatis</i> de accommodata renovatione vitæ religiosæ, 28 oct. 1965: AAS 58, 1966, pp. 702-712 et EDIL I, pp. 162-163.
PROP	<i>Proprium Ordinis Prædicatorum</i> , IV: <i>Rituale, Professionis Ritus</i> , Romæ, Ad S. Sabinae, 1999.

---

PS	<i>Processionarium S.O.P.</i> , ed. E. Suarez, Romæ 1949.
RC	SCRIS, <i>Instructio Renovationis Causam de accomodata renovatione institutionis ad vitam religiosam ducendam</i> , 6 jan. 1969: AAS 61, 1969, pp. 103-120.
RD	Ioannes Paulus II, <i>Adhortatio apostolica Redemptionis Donum</i> , 25 mart. 1984: AAS 76, 1984, pp. 513-546 et EDIL II, pp. 694-759.
<i>Regula</i>	<i>Regula B. Augustini episcopi</i> : textus receptus ab Ordine, prout exstat in AGOP XIV L 1, f.36v (= LCO, pp. 11-19).
RFL	<i>Regula Fraternitatum Laicalium S. Dominici</i> , ed. D. Byrne, ASOP 95, 1987, pp. 83-88.
RFS	<i>Regula Fraternitatum Sacerdotalium S. Dominici</i> , ed. D. Byrne, ASOP 95, 1987, pp. 199-206.
ROPD	<i>Regula Fratrum et Sororum Ordinis de Penitentia Beati Dominici, Fundatoris et Patris Fratrum Ordinis Predicotorum</i> , ed. G. G. Meersseman, in <i>Dossier de l'Ordre de la Pénitence au XIII<sup>e</sup> siècle ("Spicilegium Friburgense"</i> , 7), Fribourg 1961, pp. 144-156.
RP	<i>Ritus Promissionis Religiosæ</i> , in OPR, pp. 95-109.
SC	Concilium Vaticanum II, <i>Constitutio Sacrosanctum Concilium de sacra liturgia</i> , 4 dec. 1963: AAS 56, 1964, pp. 97-124 et EDIL I, pp. 1-27.
SCCD	Sacra Congregatio pro Cultu Divino.
SCR	Sacra Congregatio Rituum.
SCRIS	Sacra Congregatio pro Religiosis et Institutis Sæcularibus; usque ad 1 mart. 1968: S. Congregatio de Religiosis.
SCSCD	Sacra Congregatio pro Sacramentis et Cultu Divino.
<i>S. Th.</i>	<i>S. Thomæ Aquinatis Summa Theologie</i> (iuxta operis partitiones).

- VC Ioannes Paulus II, Adhortatio apostolica post-synodalnis *Vita Consecrata*, 25 mart. 1996: AAS 88, 1996, pp. 377-486.
- Vicaire,  
*Les origines* M.-H. Vicaire, *Les origines paradoxales du Tiers-Ordre de Saint Dominique*, in *Dominique et ses Prêcheurs*, Fribourg 1977, pp. 392-409.
- Vicaire,  
*Relecture* M.-H. Vicaire, *Relecture des origines dominicaines: Le voeu de notre Profession*, "Mémoire Dominicaine" 4, printemps 1994, pp. 207-224.



## INTRODUCTIO GENERALIS

1. EVANGELICÆ VITAE inter varias formas quas Patri vocanti docilibus multiformi gratia Spiritus Sanctus<sup>1</sup> in Ecclesia suscitat ad Christi sequelam expediendam, Ordo Prædicatorum propriam affert in via sancti Dominici formam. Fideles igitur qui suo quiske modo propositum Ordinis<sup>2</sup> votis aliisve vinculis amplectuntur, Deo semetipso devovent, ita ut eorum consecratio baptismalis uberiorem fructum percipere queat,<sup>3</sup> perfectionem scilicet christianæ vitæ, quæ in caritate erga Deum et proximum consistit.<sup>4</sup>

Cum autem ad ipsius caritatis perfectionem status religionis per evangelica ducat consilia,<sup>5</sup> professione quidem religiosa ad integrum Christi sequelam in Ordine percurrendam fratres et sorores divino obsequio intimius consecrantur<sup>6</sup> ac universæ Ecclesiæ novo modo devoventur.<sup>7</sup>

2. Omnibus igitur "Familiæ Dominicanæ" sodalibus— Fratribus scilicet (clericis et cooperatoribus), Monialibus, Sororibus ac sodalibus Fraternitatum S. Dominici (clericis et laicis)<sup>8</sup>— hic ritus cum aptationibus suo loco indicatis adhibendus affertur. Perspectis enim linguarum et locorum differentiis atque necessitatibus actionis liturgico-pastoralis necnon et diversorum cœtuum peculiaritatibus, uno ritu et hodie fruentes, omnes sancti Dominici alumni uniformitatem servabimus inde a primævis documentis commendatam ad "sanctæ studium unitatis" in ipsa mobilitate apostolica fovendum.<sup>9</sup>

<sup>1</sup> Cf. VC, n.1.

<sup>2</sup> LCO, n.1, *Const. fund.*, § 1. Cf. ACG 1986, nn. 85,87,89.

<sup>3</sup> Cf. LG, n. 44; OPR Pr., n.1; LCO, n.189, § I; LCM, n. 152, § I; RFL, n. 14; RFS, n. 4, 2 § Cf. PC, n. 5; RD, n. 7; VC, n. 30; CIC, c. 573. Vide etiam S. Th. II-II, 186, 1 sq.

<sup>4</sup> S. Th. II-II, 184,3.

<sup>5</sup> Cf. S.Th. II-II, 188,2.

<sup>6</sup> LG, n. 44.

<sup>7</sup> LCO, n.1, *Const. fund.*, § III.

<sup>8</sup> Cf. LCO, n. 1, *Const. fund.*, § IX.

<sup>9</sup> Clemens IV, Bulla *Consurgit in nobis*, Magistro et Fratribus Ordinis Prædicatorum, 7 iul.1267 : BOP I, p. 486; cf. Humbertus II, 5-8.

## I. DE TRADITIONE LITURGICA ORDINIS

3. Ritus enim liturgicus Prædicatorum,<sup>10</sup> ab Ordine ad modum Constitutionum nostrarum tribus capitulo generalibus (annis 1254-1256) stabilitus, deinde (anno 1267) exquirente Magistro Ordinis b. Iohanne de Vercellis, a Clemente IV auctoritate apostolica confirmatus,<sup>11</sup> multa per sæcula in usu fuit, adhibitis necessariis aptationibus ad libros liturgiæ Romanæ, post Concilium Tridentinum et etiam post sancti Pii X reformationis receptionem in Ordinem (1921)<sup>12</sup> instauratos.

Libris denique liturgiæ Romanæ auctoritate Concilii Vaticanii II profundius instauratis, Ordo noster, perpensis et nova diversitate linguarum liturgicarum in Ecclesia latina ac necessitatibus actionis liturgico-pastoralis Ordinis, expetivit a Sede Apostolica ut a nobis adhibeantur *Missale Romanum* anni 1970 et *Liturgia Horarum* anni 1971, addito tamen *Proprio Ordinis Prædicatorum* in quo, iuxta verba decreti approbationis (25 iul. 1977), «peculiaris thesaurus nostræ traditionis» servatur.<sup>13</sup>

Cuius *Proprii* in hoc volumine quarto varii ritus exstant qui in *Processionario nostro* includebantur,<sup>14</sup> ritus scilicet Professionis. Hic autem ritus non tantum est pars liturgiæ nostræ prototypicæ<sup>15</sup> sed etiam, ut videtur, connexionem habet cum Constitutione primitiva

<sup>10</sup> Ordo sancti Dominici, e communitate canonicorum regularium exorti, nonnulla quidem canonicalia elementa pro vita regulari ac liturgica servavit, sed “stabilitatem in loco” depositus et sub unici Magistri obediencia Ordinis unitatem fovit ac missionem apostolicam.

S. Dominici autem tempore usus liturgicus Curiae Romanae tantum in Italia centrali vigebat, nec unica forma liturgica universa Ecclesia latina utebatur. Ordo autem noster, iam ante s. Raymundum de Peñafort Magistrum, suum usum liturgicum uniformem cœpit constituere, pro religiosis et apostolicæ et canonicalis vitæ aptatum: quam operam in medietate sæculi XIII Humbertus de Romanis perfecit.

<sup>11</sup> Bulla *Consurgit in nobis* (supra, adn. 9).

<sup>12</sup> Cf. B.M. Hespers, *Pianæ reformationis Breviarii Ordinis Prædicatorum brevis expositio*, ASOP 18, 1927-1928, pp. 97-103.

<sup>13</sup> Cf. ASOP 42, 1977, pp. 196-197; LHOP, p. vi; MLOP, pp. IX-XI.

<sup>14</sup> Ordo quidem «In electione Magistri Ordinis vel Prioris Provincialis vel conventionalis» iam recognitus est in volumine tertio huius Ritualis O.P. instaurati (*Proprium Ordinis Prædicatorum, Rituale: Ordo in electionibus superiorum servandus*, ed. D. Byrne, Ad Sanctæ Sabinæ, Romæ 1992: ASOP 99, 1991, pp. 257-288).

<sup>15</sup> Cf. *Eccl. off.*, ff. 50rA. 51rA.

sancti Dominici atque indeole spirituali et apostolica Ordinis ab ipso fundati. Quæ indoles fideliter servatur in ritu nostro nunc ad normam Concilii Vaticani II<sup>16</sup> atque *Ordinis Professionis Religiosæ*<sup>17</sup> novi *Ritualis Romani* instaurato.<sup>18</sup>

## II. DE PECULIARI INDOLE PROFESSIONIS DOMINICANÆ

4. «Professione Ordini nostro cooptati Deo totaliter consecramur ac universæ Ecclesiæ novo modo devovemur, integræ ‘evangelizationi verbi Dei totaliter deputati’». <sup>19</sup> Hæc autem sui ipsius devotionis, quæ per ipsam professionem efficitur, donum est gratiæ singularis, cuius Deus est auctor,<sup>20</sup> cum homo nonnisi «per voti obligationem» possit «totam vitam suam Deo actu exhibere», «quia non est tota simul, sed successive agitur».<sup>21</sup>

Cum igitur per ipsam professionem<sup>22</sup> «aliqua spiritualis consecratio seu benedictio»<sup>23</sup> efficiatur, specialis formula benedictionis seu consecrationis professi vel professæ in nostri Ordinis traditione deest et in hoc Rituali nonnisi inter textus ad libitum, scilicet in Appendice, præbetur.

5. Signanter vero in Ordine Prædicatorum obœdientia tantum profitetur (LCO, n. 17, § I), «qua persona ipsa totaliter se Deo devovet et cuius actus fini professionis qui est caritatis perfectio<sup>24</sup> propin-

<sup>16</sup> Cf. inter alia SC, n. 80.

<sup>17</sup> OPR Pr., pp. 6 et 10. Cf. IOPA, n. 1, p. 699.

<sup>18</sup> Hæc instauratio iam inde a Capitulo generali Tallaght anno 1971 celebrato (*Acta*, n. 172; App. II, p. 115) Magistro Ordinis commissa fuit. Cf. ASOP 41, 1973, pp. 23-24; SCCD, Decretum *De ordine professionis religiosæ O.P.*, 13 febr. 1973: ASOP 41, 1973, p. 23; *Ritus professionis sollemnis intra Missam peragendus*, ASOP 41, 1973, pp. 24-27; ACG 1974, n. 171; ASOP 43, 1977, pp. 137-138. 140. 231-233. Cf. V. Romano, *Il Rito della Professione O.P.*, AOP 1998, sub prelo.

<sup>19</sup> LCO, n. 1, *Const. fund.*, § III. Cf. Honorius III, Bulla *Cum qui recipit ad omnes prælatos Ecclesiæ, die 4 febr. 1221*: MOPH XXV, p. 145.

<sup>20</sup> S. Th. II-II, 88,7,1.

<sup>21</sup> S. Th. II-II, 186, 6, 2.

<sup>22</sup> Cf. LG, n. 44 («consiliorum evangelicorum professione in Ecclesia liberari intendit ab impedimentis ... et divino obsequio intimius consecratur»); LCO, n. 1, *Const. fund.*, § III («professione ... consecramur»).

<sup>23</sup> S. Th. II-II, 88,7,1. Cf. Eph 1,3; LG, n. 45.

<sup>24</sup> Cf. S. Th. II-II, 186, 2; LG, n. 44.

quiores existunt : per quam, denique, omnia alia quæ ad vitam apostolicam pertinent simul accipiuntur».<sup>25</sup> Communitas quoque ipsa «ut in spiritu et missione sua fideliter permaneat, principio unitatis indiget», per obœdientiam scilicet sancto Dominico et successoribus eius.<sup>26</sup>

6. Quoniam autem per obœdientiam Christo et Ecclesiæ coniungimur; «quidquid laboris et mortificationis in eius adimpletione sustinemus, veluti protractio est oblationis Christi et rationem sacrificii obtinet tum pro nobis cum pro Ecclesia in cuius consummatione totum creationis opus impletur».<sup>27</sup> Interea «obœdientia qua 'nosmetipsos in corde superamus' <sup>28</sup> maxime prodest ad interiorem illam consequendam libertatem quæ est propria filiorum Dei — eademque 'per obœdientiam roboratur'<sup>29</sup> — et nos ad donationem caritatis disponit».<sup>30</sup>

7. Ordo noster, inde ab exordiis, sancto Dominico adhuc vivente, proprium professionis ritum habuit a ceteris tunc existentibus per elementa propria distinctum.<sup>31</sup> Peculiaris enim professionis Prædicatorum indoles ab ipsis elementis propriis exsurgit, qui spiritui atque apostolico proposito sancti Dominici nova ratione respondent. Eruitur vero et ab ipsa structura formulæ professionis et a ritibus.<sup>32</sup>

Professio enim fit<sup>33</sup> non solum Deo sed et beatæ Mariæ et beato Dominico;<sup>34</sup> unico voto obœdientiæ constat, cuncta status religionis

<sup>25</sup> LCO, n. 19, § I. Cf. S. Th. II-II, 186, 8.

<sup>26</sup> Cf. LCO, n. 17, § I et § II. Vide etiam Vicaire, *Selectio*, pp. 208 sqq.

<sup>27</sup> LCO, n. 19, § II; cf. Honorius III, Bulla *Cum spiritus fervore*, 12 dec. 1219: MOPH XXV, p. 116; S. Th. II-II, 186, 1 et 2; CIC, c. 607; PC, n. 14; ET, n. 29; RD, n. 8.

<sup>28</sup> Greg. M. moral. XXXV 14 (28), 155, CCL 143B, p. 1793, apud S. Th. II-II, 104, 1; LCO, n. 19, § III; LCM, n. 19, § III.

<sup>29</sup> Cf. LCO, n. 214, § II; LG, n. 43; PC, n. 14; S. Th. II-II, 186, 5, 5 et 6, 3.

<sup>30</sup> LCO, n. 19, § III; LCM, n. 19, § III; cf. PC, n. 14; ET, n. 6; RD, n. 14.

<sup>31</sup> Cf. I Const., d. I, c. 16; Directorium XII, 2, pp. 118 sq.; vide etiam Humbertum II, 215. Antiqua vero formula usque ad hodierna tempora immutata permansit hodieque viget (LCO, n. 189, § I et 211).

<sup>32</sup> Multa testimonia in primævis Ordinis documentis adsunt, ubi "De professionibus" agitur et "Modus recipiendi ad professionem" statuitur: cf. I Const., d. I, c. 16, p. 326; II Const. XV, p. 41; Directorium XII, pp. 118 sq.

<sup>33</sup> Formula Prædicatorum directe incipit originali verborum iunctura «facio professionem», ad significandum et adhæsionem ad statum religiosæ perfectionis et adoptionem mediorum in hunc finem tendentium necnon Ordini traditionem sui ipsius..

<sup>34</sup> Verba autem «beato Dominico» inde ab anno 1254 sunt adiecta (cf. MOPH III, pp. 70, 75, 78).

elementa complectente; obœdientia directe Magistro Ordinis promittitur, utpote unitatis principio ipsius Ordinis eiusque missionis; fit non tantum secundum Regulam beati Augustini sed etiam secundum Institutiones Fratrum Prædicatorum.

Elementa autem complementaria, quæ professionis nostræ indolem propriam exprimunt, distinguebantur et quantum ad locum (in capitulo, non in ecclesia)<sup>35</sup> et quantum ad corporis positionem atque gestus (non 'super altare', stando, sed cum 'immixtione manuum' genuflexe ante Prælatum) et quantum ad habitus traditionem seu ritualem vestitionem (non in ipso actu professionis, sed iam initio novitiatus, ut signum tum solummodo receptionis in Ordinem, ad vitam novam ducendam).

Quod vero attinet reliqua quæ formulam præcedunt, candidati interrogatio, quæ olim 'scrutinium' appellabatur, fit simpliciore forma, misericordia vero Ordinis in prostratione initiali petitur.

Post autem professionem emissam, osculum pacis datur a solo Prælato, ut signum fidelitatis et obœdientiæ necnon et receptionis in Ordinem. Habetur vero benedictio habitus<sup>36</sup> (qui initio novitiatus traditus est), quæ est signum consecrationis religiosæ<sup>37</sup> sed et maternæ protectionis B.V. Mariæ, quæque fit "ad omnem ambiguitatem penitus amovendam" inter habitum professorum et habitum novitiorum.<sup>38</sup>

8. His sane præcipuis notis propriis, liturgia professionis et præviae receptionis sobrietate atque apostolica libertate insignis exstat, quatenus essentialibus elementis continetur et quibuscumque vinculis localibus expers exsistit.<sup>39</sup>

<sup>35</sup> Hæc nota fuit peculiaris in Ordine Prædicatorum inde ab exordiis, cum apud ceteros ritus professionis in ecclesia perficiebatur (cf. *I Const.*, d. I, c. 16, p. 327; *Directorium XII*, 2, p. 119).

<sup>36</sup> Hoc præscriptum est a Capitulo generali a. 1236 (cf. MOPH III, p.8 : «Vestes novitiorum, quando professionem faciunt, benedicantur, ad minus scapulare»).

<sup>37</sup> Cf. LCO, n. 51; LCM, n. 59; PC, n. 17; OPR *Pr.*, n. 5. S.Thomas habitum religiosum appellat *signum obligationis* quae per tria vota contrahitur: «Determinatio autem habitus pertinet ad omnia tria vota, tamquam signum obligationis. Unde habitus regularis simul datur, vel benedicitur, cum professione» (*S. Th.* II-II, 186, 7, 2m).

<sup>38</sup> Cf. Gregorius IX, Bulla *Non solum in favorem Magistro et Fratribus Ordinis Prædicatorum*, 11 iul. 1236: BOP I, p. 90.

<sup>39</sup> Cf. Paulus VI, Litteræ Summi Pontificis ad Capitulum generale *Inclitus Ordo Fratrum Prædicatorum*, 30 iun. 1965: ACG 1965, p. iv; LCO, nn. 1, *Const. fund.*, § VII; 26, § I; 52; 106, § I; 115; 127; 128.

### III. DE RITIBUS QUI VITÆ DOMINICANÆ GRADUS COMITANTUR

9. Gradus per quos fratres et sorores Ordinis nostri Deo et Ecclesiæ se devovent sunt : novitiatus, prima professio temporanea - quæ etiam simplex nuncupatur - et professio perpetua vel sollemnisi.<sup>40</sup> Quibus insuper, secundum proprias diversorum Familiaæ Dominicanæ cœtuum constitutiones, adnectitur votorum renovatio.<sup>41</sup>

10. Novitiatus, a quo vita religiosa incipit,<sup>42</sup> «est probationis tempus, ad hoc videlicet ordinatum ut novitii vocationem divinam, et quidem dominicanam, intimius agnoscant, modum vivendi Ordinis experiantur, mente et corde in spiritu dominicano informentur atque de eorum proposito necnon idoneitate fratribus constet».<sup>43</sup>

11. Initio novitiatus ritum<sup>44</sup> peragere præstat, quo Dei gratia impetretur ut eius finis peculiaris attingatur. Hic ritus simplex et sobrius esse debet, sodalibus Ordinis præsertim reservatus, nisi peculiares rationes pastorales aliorum præsentiam suadeant, dummodo tunc caveatur ne novitiorum libertas quodammodo minui videatur aut verus novitiatus sensus seu indoles experimenti obumbretur. Fieri autem debet extra Missam.<sup>45</sup>

12. Tempore probationis expleto, sequitur prima professio, qua novitus vota temporaria coram Deo et Ecclesia emittit «ad vitam evangelicam in Ordine ducendam»<sup>46</sup> secundum uniuscuiusque conditionem. Votorum temporalium emissio fieri potest intra Missam, vel

<sup>40</sup> LCO, n. 190 : «In Ordine duplex fit professio: prima simplex et temporaria post novitiatum; altera sollemnis et exinde perpetua».

<sup>41</sup> Cf. LCO, nn. 195 et 203, § I; LCM, nn. 153 sqq.; RFL, n. 14.

<sup>42</sup> Cf. RC, n. 13.

<sup>43</sup> LCO, n. 177.

<sup>44</sup> In traditione Dominicana ritus initiationis ad vitam religiosam "De receptione novitiorum ad habitum" nuncupatur et agit (cf. PS, pp. 149-156; COP, nn. 1790-1797, pp. 531-534; CMS, pp. 1-10): ex primitiva enim Ordinis consuetudine hic ritus exprimit admissionem ad vitam religiosam et ingressum in fraternitatem conventualem. Idemque de more adhibetur «ante initium novitiatus» (*I Const.*, d. I, c. 14); ubi vero habitus non «ante initium novitiatus» sed «eo perdurante» traditur — ut in novis Constitutionibus admittitur (LCO, n. 176; LCM, n. 140, § II) — «vel etiam in die primæ professionis» (LCM, n. 140, § II), hic ritus aptetur modo infra indicato.

<sup>45</sup> Cf. OPR Pr., n. 4; OPR I, n. 4; OPR II, n. 4.

<sup>46</sup> LCO, n. 189; LCM, n. 152, § I.

in congrua actione liturgica veluti in liturgia Verbi aut in aliqua Hora divini Officii, Laudibus et Vesperis præsertim, nulla tamen interposita peculiari sollemnitate.

13. Legitimo temporis spatio exacto emittitur professio perpetua vel sollemnus, qua fratres et sorores Ordinis nostri, titulo cuique proprio, in Ordine servitio Dei et Ecclesiæ in perpetuum mancipantur. Professione autem perpetua «magis repræsentatur Christus cum sponsa Ecclesia indissolubili vinculo coniunctus».<sup>47</sup>

14. Professionis perpetuæ ritus convenienti sollemnitate sodalium Ordinis populique concursu intra Missam peropportune persolvitur.<sup>48</sup>

Hæc sunt eius præcipua elementa:

a) candidatorum prostratio cum eorum interrogatione aut candidatorum postulatio cum prostratione;

b) homilia seu allocutio, qua populus et professuri de vitæ religiosæ bono admonentur atque de charismate et missione Ordinis Prædicatorum edocentur;

c) interrogations, quibus a professuris quæritur num parati sint ad se Deo devovendos et perfectam sectandam caritatem per obœdientiam legitimis Superioribus Ordinis, secundum Regulam et Institutiones Fratrum Prædicatorum aut cuiusque cœtus Familiæ Dominicanæ vel Instituti;

d) precatio sub silentio facta et oratio fidelium, vel supplicatio litanica, quibus oratio ad Deum bonorum omnium largitorem dirigitur atque beatissimæ virginis Mariæ, universi Ordinis Prædicatorum “Patronæ”, ac sancti Dominici Patris nostri omniumque Sanctorum intercessio invocatur;

e) “immixtio manuum” profitentis et eius qui ipsum ad professionem recipit;

f) promissio obœdientiæ seu professionis emissio, quæ fit coram Ecclesia, conventu populoque, qua totaliter Deo consecramur et evangelizationi verbi Dei deputamur;<sup>49</sup>

g) osculum pacis, receptionis scilicet in Ordinem, ab illo solo qui professionem recepit.

<sup>47</sup> Cf. LG, n. 44.

<sup>48</sup> Cf. SC, n. 80.

<sup>49</sup> Cf. LCO, n.1, *Const. fund.*, § III; cf. LCM, n. 3, § II.

15. Renovatio votorum, quæ statutis temporibus perficitur iuxta Institutiones uniuscuiusque cœtus Familiæ Dominicanæ vel Instituti, intra Missam fieri potest, absque tamen sollemnitate.

Consuetudo vero renovandi vota pietatis causa pertinet ad devotionem privatam nec usus illa intra Missam renovandi commendatur.

Si autem, causa pietatis necnon et pastoralis actionis, opportunum videtur vota publice renovari peculiaribus diebus anniversariis — verbi gratia xxv vel l anno religionis — adhiberi potest ritus renovationis votorum, aptatis aptandis.

16. Hi ritus, cum alii alia sit indoles, suam quisque celebracionem requirunt ideoque rituum coacervatio in eadem actione liturgica omnino vitanda est.<sup>50</sup>

#### IV. DE MISSA IN RITU PROFESSIONIS RELIGIOSÆ ADHIBENDA

17. Quoties professio religiosa, perpetua præsertim, intra Missam celebratur, diebus quibus Missæ rituales permittuntur, convenienter dicitur Missa “in die professionis religiosæ” quæ exstat in Missali Romano, additis insuper elementis propriis nostri Ordinis, quæ suis locis afferuntur. Occurrentibus vero diebus sub nn. 1-4 Tabulæ dierum liturgicorum, dicitur Missa de die cum suis lectionibus, servatis — pro opportunitate — formulis propriis in Prece eucharistica et in benedictione finali.

18. Cum autem liturgia Verbi, celebrationi professionis aptata, magnam vim habeat ad vitæ religiosæ naturam et munera illustranda, si Missa ritualis non dicitur, unam lectionem sumere licet ex iis quæ in peculiari lectionario recensentur, exceptis diebus supra memoratis.<sup>51</sup>

Ad Missam ritualem “in die professionis religiosæ” celebrandam, sacrae vestes coloris albi adhibentur.

---

<sup>50</sup> OPR Pr., n. 8.

<sup>51</sup> OPR Pr., n. 10.

**V. DE VERSIONIBUS  
ET APTATIONIBUS HUIUS RITUALIS**

19. Hic Professionis Ordo adhibendus est perspectis aptationibus pro unoquoque coetu prævisis, et quæ ex versionibus liturgicis promanant et quæ iuxta celebrationis adiuncta requiruntur, prout in ipso Rituali indicatur.

20. Totius huius Professionis Ordinis pro unaquaque regione linguistica habeatur unica versio, editioni typicæ latinæ conformis, ab eiusdem regionis Commissione liturgica Ordinis, secundum Sedis Apostolicæ normas Ordinisque indicationes<sup>52</sup> conficienda, præ oculis habita illius regionis versione *Ordinis Professionis Religiosæ* pro illa regione aptata.<sup>53</sup>

21. Singulis pro aptationibus parandis, ut a Magistro Ordinis approbentur et a Sede Apostolica confirmentur, modo sequenti procedatur :

- a) pro Fratribus aptationes sub Priorum Provincialium responsabilitate proponantur;
- b) pro Monialibus aptationes iuxta desideria et suggestiones Fœderationum vel singulorum Monasteriorum concorditer expressa proponantur.

22. In hoc tamen Rituali aptando hæc serventur oportet :

- a) indicationes quæ in hac «Introductione generali» continentur;
- b) formulæ professionis temporariæ et perpetuæ vel sollemnisi, quoad elementa essentialia;
- c) vis “spiritualis consecrationis” formulæ professionis in Ordine;<sup>54</sup>
- d) ritus professionis perpetuæ vel sollemnisi collocatio infra Missam post evangelium.

---

<sup>52</sup> Cf. ‘Consilium’, “Notitiæ” 5, 1969, pp. 3-12; SCCD, AAS 66, 1974, pp. 98-99; ASOP 44, 1979, pp. 13-30; LHOP, p. xxvi; MLOP, «Introductio generalis», p. xxxvii.

<sup>53</sup> Cf. IOPA, n. 2.

<sup>54</sup> Supra, n. 4.

23. Congregationes religiosæ, Societates vitæ apostolicæ, Instituta sacerdotalia, Ordini nostro aliquo modo aggregata, quatenus ex eodem fonte sancti Dominici haurientia, textum sumere possunt qui pro eis in sectione adnexa huius Ritualis præbetur, iuxta versionem pro sua quæque regione linguistica rite approbatam (cf. supra, n. 20); in hoc textu sibi aptando, unumquodque Institutum elementa inserat propria, peculiari cuiusque charismati accommodata necnon et spiritui ac traditionibus Ordinis nostri, quæ sint iam ab ipso recepta. Quæ autem omnia fieri debent de consensu auctoritatum Ordinis et cum approbatione seu confirmatione Sedis Apostolicæ.

PARS PRIMA

ORDO  
RECEPTIONIS ET PROFESSIONIS  
FRATRUM



## PROCÆMIUM

1. EX ANTIQUA CONSUETUDINE,<sup>1</sup> novitiorum receptio in Ordinem traditione habitus perficitur tamquam verus admissionis ritus; ideoque ritualis "vestitio" initio novitiatus<sup>2</sup> perficienda collocatur, utpote "signum receptionis" in Ordinem, nondum vero "consecrationis", quæ per professionem habetur.<sup>3</sup>

2. In Ordine duplex fit professio: prima simplex et temporaria post novitiatum, altera vero sollemnis et exinde perpetua.<sup>4</sup>

Duplex igitur habetur ritus recipiendi ad professionem:

- ritus professionis simplicis seu temporariæ;
- ritus professionis sollemnisi seu perpetuæ.

Qui quidem ritus ita distinguantur oportet ut "discrimen liturgicum" inter professionem sollemnem et professionem simplicem accurate servetur.<sup>5</sup>

3. Professio autem emittitur sub unica formula Ordini nostro propria,<sup>6</sup> temporis tantum indicatione mutata.

---

<sup>1</sup> Cf. *I Const.*, d. I, c. 14; *Directorium XII*, pp. 116-118; *Humbertus II*, pp. 525-527.

<sup>2</sup> Vide supra, «Intr. gen.», adn. 44.

<sup>3</sup> Vide supra, «Intr. gen.», n. 7.

<sup>4</sup> LCO, n. 190; cf. supra, «Intr. gen.», nn. 9.12.13.

<sup>5</sup> OPR Pr., n. 14, c.

<sup>6</sup> Cf. supra, «Intr. gen.», n. 7.

# CAPUT I

## RITUS RECEPTIONIS NOVITIORUM

### DE MODO RECIPIENDI NOVITIOS IN ORDINEM

4. Antequam novitiatus incipiat, adspirantes exercitia spiritualia saltem per quinque integros dies convenienter peragunt.<sup>7</sup>

Ipsis vero coram Consilio conventus vel cœtu pro candidatorum admissione fiat "declaratio et protestatio" circa vitæ religiosæ et legum Ordinis observantiam, ut infra in Appendice (V, n. 79),<sup>8</sup> iis attentis quæ in iurisprudentia uniuscuiusque regionis cauentur.

5. Die quo novitiatus canonicus incipit ritum peragere præstat, qui sua ipsius natura peragi debet extra Missam,<sup>9</sup> separatim quoque a ceteris ritibus professionis. Inseri vero potest peculiari verbi Dei celebrationi, quæ naturam vitæ religiosæ et indolem propriam Ordinis nostri illustret.

6. Ritus sit admodum simplex, sobrius, fratribus conventus præsertim reservatus.<sup>10</sup> Ad ipsum ritum peragendum aula capitularis vel alius similis locus vel etiam sacellum deligi potest.

7. Ritui præest Prior provincialis in propria Provincia, Prior vel Supprior in capite conventus in quo adspirans recipitur, vel eorum delegatus.<sup>11</sup> Qui omnes nomine "Prioris" hic infra indicantur.

8. Novitiatus incipit intimatione a legitimo facta Superiore, qui candidatos ad habitum recipit. De hac intimatione necnon de affiliatione<sup>12</sup> fiat registratio, a novitio et a duobus testibus subscripta, in libro admissionum.<sup>13</sup>

<sup>7</sup> LCO, n. 178, § I.

<sup>8</sup> Cf. LCO, n. 174, §§ I-II et p. 229.

<sup>9</sup> Cf. OPR Pr., n. 12.

<sup>10</sup> Vide supra, «Intr. gen.», n. 11.

<sup>11</sup> LCO, n. 175.

<sup>12</sup> LCO, nn. 267-268.

<sup>13</sup> LCO, n. 178, § II.

## RITUS INITIALES

9. Ritus opportune incipit salutatione Prioris, qui pro opportunitate — scilicet, si prævia quædam ritus explicatio non est habita — poterit paucis verbis, monitionis instar, sensum celebrationis adstantibus explanare. Sequitur cantus *Veni Cœrâtor* aliasve hymnus.

### *Interrogatio vel postulatio*

10. Deinde Magister novitiorum, vel aliud frater qui candidatos comitatus sit in itinere vocationali seu in postulatus decursu, postulantes dicit in medium capituli, ubi se prosternunt manibus in modum crucis extensis.

Tunc Prior — indutus cappa Ordinis, si mos est — postulantum voluntatem exquirit dicens:

Quid quæritis ?

Et postulantes omnes simul respondent:

Misericórdiam Dei et vestram.<sup>14</sup>

---

11. Vel, si placet, omissa interrogatione et absque prostratione, unus ex candidatis pro omnibus ad Priorem et conventum conversus, postulacionem facere potest his verbis:

Misericórdia Dei compúlsi,  
huc vénimus ad conversatióne experiéndam vestram;  
docéte nos, rogámus, evangélicam perfectiónem  
secúndum régulam et institutiónes Fratrum Prædicatórum,  
ut per hanc sequélam Christi  
in caritáte Dei et próximi perficiámur  
tamquam viri qui suam et aliórum salútem  
procuráre desíderant,  
sicut viri evangélici sui sequéntes vestígia Salvatóris.<sup>15</sup>

Quibus dictis, omnes candidati se prosternunt, manibus in modum crucis extensis.

<sup>14</sup> Cf. *I Const.*, d. 1, c. 13.

<sup>15</sup> Cf. *I Const.*, d. II, c. 31; LCO, n. 1, *Const. fund.*, §§ II et III.

\* \* \*

12. Tunc pro opportunitate Prior adstantes ad orationem invitat, his vel similibus verbis :

Orémus pro istis frátribus nostris  
qui in Órdinem nostrum récipi petunt,  
ut divínus Magíster ipsis tríbuat  
abundántiam sui Spíritus et suæ pacis solácium.

Omnes per aliquod temporis spatiū silentio orant.

Deinde Prior dicit :

Deus, sanctæ vocatiónis largítor,  
qui ut viri evangélici<sup>16</sup> exémplum  
beátum Domínicum Ecclésiæ donásti,  
famulórum tuórum *N.* et *N.* supplicatiónes benígnus exáudi,  
qui, ut tibi perféctius desérviant,  
nostræ petunt aggregári familiæ;  
et concéde propítius,  
ut commúnis vita in mútuam dilectionem convertátur.  
Per Christum Dóminum nostrum.

R. Amen.

\* \* \*

---

Prior subiungit :

Leváte.

Tunc candidati ad locum suum redeunt, et omnes sedent.

---

<sup>16</sup> Cf. Iordanus, n. 104.

## VERBI DEI CELEBRATIO

13. Deinde leguntur sacrarum Scripturarum textus apti, qui novitatem vitæ per baptismum acceptam memorent, ad indicandum nexum vitæ religiosæ cum baptismate aliisque initiationis christianæ vitæ sacramentis, congruentibus interiectis responsoriis (cf. infra, in Appendice I).

14. Quibus peractis, præ oculis habens Scripturarum lectiones, Prior fratres et postulantes adloquitur de vitæ religiosæ natura atque Ordinis nostri charismate proprio, eiusdem præcipuas exigentias et austeritates<sup>17</sup> illustrans.

## RECEPTIO POSTULANTIIUM

*Interrogationes*

15. Deinde, in fine sermonis, Prior invitat postulantes ad surgendum et voluntatem eorum requirit, his vel similibus verbis, unam vel plures interrogationes seligens:

Vultis, firma intentiōne,  
in novitāte vitæ fidéliter ambuláre?

Postulantes omnes simul respondent:

Volo, cum adiutorio Dei et vestro.<sup>18</sup>

\* \* \*

Prior:

Vultis Dóminum Iesum sequi  
secúndum beáti Domíni evangélicum propósitum?

Postulantes:

Volo, cum adiutorio Dei et vestro.

<sup>17</sup> Cf. PS, pp. 149-153.

<sup>18</sup> Directorium XI, 9, p. 118.

Prior:

Vultis ergo in nostrum Órdinem récipi,  
ad conversatióne nostram experiéndam  
in perfécta regulári observántia?

Postulantes:

Volo, cum adiutório Dei et vestro.

\* \* \*

Tunc Prior eorum voluntatem confirmat dicens:

Dóminus qui incépit, ipse perficiat.<sup>19</sup>

Et adstantes respondent:

Amen.

### *Vestitio seu traditio habitus*

16. Tunc Magister novitiorum vel alius frater (cf. n.10) unumquemque candidatorum ducit ad Priorem et facit genuflectere coram eo; et vestiarus portans vestes præparatas, eas Priori porrigit. Prior adiuvante Magistro novitiorum vel alio fratre, eos induit habitu Ordinis.<sup>20</sup>

Vestitione peracta, Prior unumquemque novitiorum recipit ad osculum pacis, utpote signum receptionis in Ordinem et admissionis in fraternitatem conventualem.

Dum novitii induuntur, omnibus genua flectentibus canitur hymnus *Veni Creator*,<sup>21</sup> nisi prius cantatus fuerit, aut chorus canit antiphonam *Immutémur hábitu* (MLOP, p. 6) cum psalmo 39 (*Exspéctans exspectávi Dóminum*), vel alium congruum cantum.

---

17. Vel, si talis est consuetudo Provinciæ, Prior novitiis habitum tradit aliqua parte novitiatus expleta,<sup>22</sup> congrua vero celebratione disposita.

<sup>19</sup> *I Const*, d. I, c. 13.

<sup>20</sup> Cf. LCO, n. 50.

<sup>21</sup> Cf. COP, p. 123, n. 486.

<sup>22</sup> Cf. supra, «Intr. gen.», adn. 44.

Quo in ritu, Magister novitiorum vel alius frater (cf. n. 10) unumquemque illorum dicit ad Priorem et facit genuflectere coram eo, qui habitu Ordinis unumquemque novitiorum induit vel unicuique habitum tradit in manus, dicens:

Præstet tibi Dóminus  
vétérem hóminem exúere, cum áctibus suis,  
et novum indúere hóminem, qui secúndum Deum créatus est,  
in iustitia et sanctitáte veritatis.<sup>23</sup>

Quo facto, Prior unumquemque novitiorum recipit ad osculum pacis, ut propter signum receptionis in Ordinem et admissionis in fraternitatem conventualem.

18. Tunc, si ritus in capitulo vel in choro fuerit peractus, egreditur conventus processionaliter ad ecclesiam, iunioribus præcedentibus, Magistro novitiorum vel alio fratre ducente novitos usque ad gradum altaris. In processione canitur hymnus vel psalmus aptus.

### *Oratio universalis*

19. Deinde fieri potest oratio universalis, modo in celebrationibus conuento, iuxta formularium quod in Appendice (II, nn. 62-65) affertur. Petitib⁹ autem expletis dicitur *Oratio dominica*.

### *Receptio fraterna et intimatio novitiatus*

20. Postea novitii eant dando pacem unicuique fratrum, dum canitur ps. 132 *Ecce quam bonum vel ant. Ubi cáritas vel ant. O spem miram* vel alius cantus congruus.

21. Quibus expletis, Magister novitos iterum ad Priorem dicit, qui eis – si opportunum videtur – aliud nomen, christianum scilicet, addere potest, unicuique dicens:

Ex baptísmo est nomen tuum N.,  
in Órdine vocáberis frater N.N.<sup>24</sup>

<sup>23</sup> Cf. *Eph* 4, 24.

Deinde Prior intimatione<sup>25</sup> anni canonici novitiatus tempus probationis assignat novitiosque curae Magistri tradit, eos monens his vel similibus verbis:

Ecce, filii, vos recepistis misericordiam Dei et nostram  
iam ex parte,  
quia dédimus vobis hábitum nostrum ad probatiómem:  
restat vobis fáceré professiómem,  
ut ipsam misericordiam possítis habére compléte.  
Et quia forte mores Religiónis non placébunt vobis,  
aut mores vestri non placébunt nobis,  
ídeo auctorité Ecclésiæ et Órdinis  
vobis concédo unum annum,  
ut vos possítis probáre mores nostros et nos mores vestros.  
Et si vobis placébit nobiscum vívere  
et nobis placébit conversátio vestra,  
recipiémus vos ad professiómem :  
álias et nos et vos érimus in libertáte.  
Conámini ergo iugum hoc pro amóre Dei libénter ferre  
et Magístro vestro in ómnibus oboedíre tamquam mihi.<sup>26</sup>

Vel:

Iura volunt quod ingrediéntibus nostrum Órdinem  
tempus probatiónis, annus videlicet, assignétur.  
Et ego — auctorité officii quo fungor —  
unum annum vobis pro témpore probatiónis assígno,  
sub ductu fratris N. N. percurréndum,  
qui vos de Órdine nostro docébit.  
Infra hoc tempus, fratres probábunt mores vestros  
et vos probábitis vires vestras  
ad austérítátes Órdinis eiúsque múnera sustinénda.  
Quo anno elápsso, potéritis,  
si vobis et frátribus placúerit,  
per professiómem Órdini obligári;  
sin autem, potéritis de vobis, prout vidébitur, ordináre.<sup>27</sup>

<sup>24</sup> Cf. PS, p. 155.

<sup>25</sup> Cf. LCO, n. 178, § II.

<sup>26</sup> Cf. PS, p. 155.

<sup>27</sup> Directorium XI, 8, p. 118; cf. I Const., d. I, c. 13.

22. Si librum Constitutionum tradi placet, hic tradatur silentio vel apta formula, decora sobrietate servata.

Si non sequitur aliqua pars Liturgiae Horarum, ritus concluditur ut sequitur.

### CONCLUSIO RITUS

23. Prior adstantes ad orationem invitat, dicens:

Imitémur, fratres, ut póssumus, sancti patris Domíni vestígia,  
simul et agámus grátias Redemptóri  
qui talem in via hac, qua ambulámus,  
ducem exhíbuit servis suis,  
per eum nos in huius conversatiónis lucem regénerans;  
et deprecémur misericordiárum Patrem,  
ut illo nos regénte Spíritu, quo filii Dei agúntur,  
per térmilos quos posuérunt patres nostri  
ad eándem metam  
perpétuæ felicitátis et sempitérnæ beatitúdinis,  
ad quam ille sine fine felix introívit,  
nos quoque indefléxo trámite pertíngere mereámur.<sup>28</sup>

Orémus.

Omnes per aliquod temporis spatiū silentio orant, deinde Prior prosequi-  
tur:

Famíliam tuam, quásimus Dómine,  
propítius résponce et nova prole semper amplífica,  
ut et filios suos ad propósitam sanctitátem perdúcere  
et aliórum salútem efficáciter váleat procuráre.  
Per Christum Dóminum nostrum.<sup>29</sup>

R/. Amen.

<sup>28</sup> Cf. Iordanus, n. 109.

<sup>29</sup> Cf. MOP, p. [66].

¶. Adiutorium nostrum in nomine Domini.

R. Qui fecit cælum et terram.

24. Ritus concludi potest, sicut mos est pro quibusdam celebrationibus in Ordine, antiphona *Salve Regina* vel alio cantu; quo expleto, adstantes salutant novitios secundum loci consuetudinem.

## CAPUT II

### RITUS PROFESSIONIS SIMPLICIS

#### DE MODO RECIPIENDI AD PROFESSIONEM

25. Ritus professionis, ex Ordinis consuetudine,<sup>30</sup> in aula capitulari vel in choro peragitur; rationabili vero de causa ritus in ecclesia fieri potest, sive in connexione cum aliqua divini Officii Hora sive intra Missam,<sup>31</sup> iuxta hodiernam consuetudinem.

Professio fit in conventu a Priore provinciali designato et ordinarie coram communitate. In casibus autem exceptionalibus, de consensu Prioris provincialis, fieri potest extra conventum Ordinis.<sup>32</sup>

26. Ritui ad recipiendam professionem ordinarie praeest, præter Magistrum Ordinis, Prior provincialis in propria provincia, Prior vel Supprior in capite conventus in quo professio emittitur, vel eorum delegatus.<sup>33</sup> Hi omnes nomine "Prioris" hic infra indicantur.

27. Antequam ad primam professionem candidati admittantur, denuo fiat ipsis, coram Consilio conventus vel coetu pro eorum admissione, declaratio et protestatio circa vitæ religiosæ et legum Ordinis observantiam,<sup>34</sup> iis attentis quæ in jurisprudentia uniuscuiusque regionis cavitur.

28. De professione emissâ adnotatio fiat in libro professionum et ab eodem professo atque a duobus testibus subscribatur,<sup>35</sup> numquam vero super altare.

29. In hoc Rituali illi professionis ritus præbentur qui intra Missam peraguntur. Quando autem extra Missam professio emittitur vel renovatur, ritus est pro opportunitate aptandus, congruis elementis selectis, ut infra, nn. 51-52.

<sup>30</sup> Cf. supra, «Intr. gen.», n. 7.

<sup>31</sup> Cf. OPR Pr., n. 5.

<sup>32</sup> Cf. LHOP, *Adn. compl.*, n. 36, p. 19.

<sup>33</sup> LCO, n. 193.

<sup>34</sup> Cf. LCO, n. 174, §§ I-II; vide etiam infra, in Appendice V, n. 79.

<sup>35</sup> LCO, n. 194.

## RITUS PROFESSIONIS SIMPLICIS INTRA MISSAM PERAGENDUS

30. Quando ritus professionis in ecclesia persolvitur, professio de more fit ad sedem; quæ, si adiuncta expostulant, opportune paratur ante altare. In presbyterio omnia disponantur ut tota actio liturgica a fidelibus conspici possit.

31. Adhibetur "Missa de die" aut "Missa ritualis in die primæ professionis religiosæ", ad normam legum liturgicarum.<sup>36</sup>

### RITUS INITIALES

32. Celebratio opportune incipit cantu introitus cum processione ingressus ad altare, cui laudabiliter intersunt professuri, comitante Magistro novitiorum.

Cum ad presbyterium pervenerint, facta altari debita reverentia, omnes locis sibi designatis se disponunt.

### LITURGIA VERBI

33. In liturgia verbi omnia fiunt more solito, præter hæc :

a) lectiones, diebus quibus permittitur, vel e "Missa diei" vel e Sacra Scriptura sumi possunt, ex illis quæ in peculiari lectionario (infra, in Appendix I) proponuntur;<sup>37</sup>

b) Symbolum dicitur, si rubricis liturgiæ diei præscribitur.

### PROFESSIONE RELIGIOSA

#### *Interrogatio vel postulatio*

34. Dicto Evangelio, Magister novitiorum professuros ducit in medium ante Priorem, ubi se prosternunt manibus in modum crucis extensis. Tunc Prior novitos interrogat dicens:

<sup>36</sup> Cf. OPR Pr., nn. 9-11 et 15; «Intr. gen.», nn. 17-18.

<sup>37</sup> Cf. «Intr. gen.», n. 18.

**Quid quæritis?**

Cui omnes simul respondent:

Misericórdiam Dei et vestram.<sup>38</sup>

---

35. Vel, si placet, omissa interrogatione et absque prostratione, unus ex candidatis pro omnibus ad Priorem et conventum conversus, postulationem facere potest his verbis:

Nos, *N.* et *N.*, cum misericórdia Dei  
vestram novérimus Régulam  
et fraterne vobíscum probatónis degérimus tempus,  
felíci experíentia edócti  
a te, Pater, humíliter póscimus  
ut Deo eiúsque Regno nos devoveámus  
sanctam professióinem emitténtes  
in Órdine Prædicatórum.

Quibus dictis, omnes candidati se prosternunt manibus in modum crucis extensis. Prior et omnes fratres respondent:

Deo grátias.

vel alio apto modo.

---

Diaconus vel minister subiungit:

Leváte.

Tunc professuri ad locum suum redeunt et omnes sedent.

### *Homilia seu allocutio*

36. His peractis, fit homilia seu allocutio in qua opportune illustrantur tum lectiones biblicæ tum professionis religiosæ donum, iuxta indolem

---

<sup>38</sup> Cf. *I Const.*, d. I, c. 13.

vocationis et missionis Ordinis nostri, atque munus ad electorum sanctificationem atque ad Ecclesiæ totiusque humanæ familiæ bonum.

*Interrogationes*

37. In fine sermonis Prior ad professuros conversus quærerit:

Vultis fácere professiónem  
secúndum Constitutiónes Órdinis Prædicatórum?<sup>39</sup>

Professuri surgentes simul respondent:

Volo, cum adiutório Dei et vestro.<sup>40</sup>

Prior:

Dóminus qui incépit, ipse perfíciat.<sup>41</sup>

Omnes:

Amen.

---

38. Vel, si placet, Prior voluntatem candidatorum, coram eo stantium, requirit interrogatiōnibus quæ sequuntur vel similibus.

Prior:

Fílii (Fratres) dilectíssimi,  
quos aqua et Spíritus Deo sacrávit,  
vultis novo professiónis religiósae título  
árctius Christo et Ecclésiæ coniúngi? <sup>42</sup>

Professuri omnes simul respondent:

Volo, cum adiutório Dei et vestro.

---

<sup>39</sup> Cf. CMS, p. 11.

<sup>40</sup> Directorium XI, 9, p. 118.

<sup>41</sup> I Const., d. I, c. 13.

<sup>42</sup> Cf. LCO, n. 19, § II.

Prior:

Vultis perféctæ caritatis viam íngredi,  
secúndum apostólicam vivéndi formam  
a sancto Domínico propósitam,<sup>43</sup>  
sicut viri evangélici  
sui sequéntes vestígia Salvatóris? <sup>44</sup>

Professuri:

Volo, cum adiutório Dei et vestro.

Prior:

Vultis, ad vestígia Salvatóris nostri sequénda,<sup>45</sup>  
vitam commúnem unanímiter ágere:  
in consiliórum evangelicórum professióne fidéles,  
in oratióne fervéntes, in stúdio assídui,  
in prædicatióne constántes  
et in regulári observántia perseverántes  
ad Dei glóriam et vestram aliorúmque salútem? <sup>46</sup>

Professuri:

Volo, cum adiutório Dei et vestro.

Tunc Prior eorum voluntatem confirmat dicens:

Dóminus qui incépit, ipse perfíciat.<sup>47</sup>

Omnes:

Amen.

<sup>43</sup> Cf. LCO, n. 1, *Const. fund.*, § IV.

<sup>44</sup> I *Const.*, d. II, c. 31.

<sup>45</sup> Cf. *ibid.*

<sup>46</sup> Cf. LCO, n. 1, *Const. fund.*, § IV.

<sup>47</sup> I *Const.*, d. I, c. 13.

*Professio religiosa*

39. Tunc unusquisque novitiorum accedens genuflectit ante Priorem sedentem et suis quisque manibus positis inter eiusdem manus ac libro Constitutionum superposito manibus utriusque, professionem facit intelligibili voce proferendo verba professionis iuxta sequentem formulam Ordini propriam:

Ego frater N. N. fácio professiónem  
et promítto obœdiéntiam Deo  
et beátæ Maríæ et beáto Domínico  
et tibi fratri N. N., Magístro Órdinis Fratrum Prædicatórum  
et successóribus tuis  
(*vel*: tibi fratri N.N., Prióri provinciáli Provínciae N.,  
*vel*: tibi fratri N.N., delegáto...,  
vice fratris N.N., Magístri Órdinis Fratrum  
Prædicatórum et successórum eius),  
secúndum régulam beáti Augustíni  
et Institutiónes Fratrum Prædicatórum,  
quod ero obœdiens tibi tuísque successóribus,  
ad triénnum (*vel*: ad annum).<sup>48</sup>

40. Si vero tempore professionis Ordo Magistrum non habuerit, profi-  
tens obœdientiam præsidenti promittat vice Magistri Ordinis, absque  
expressione cuiuscumque nominis.<sup>49</sup>

*Osculum pacis*

41. Emissa professione, tantummodo Prior fratres profitentes recipit  
ad osculum pacis, receptionis scilicet in Ordinem, quo vinculum obœdien-  
tiæ et communionis significatur.

*Benedictio habitus*

42. Postea Prior vestes profitentium benedicit, iunctis manibus:

---

<sup>48</sup> LCO, n. 199, § I.

<sup>49</sup> LCO, n. 199, § II.

Orémus.

Deus, sanctitatis auctor et consummátor,  
 qui renátos ex aqua et Spíitu Sancto  
 ad vitæ christiánæ plenitúdinem  
 et caritatis perfectiōnem vocas:  
 hos fámulos tuos propítius rēspice  
 quos, Matre Misericórdiæ auxiliánte,  
 grátia prædicatiōnis et novi hábitus dono,  
 in signum eius speciális protectiōnis,  
 ad præparatiōnem evangélii pacis<sup>50</sup> locupletásti;  
 et præsta ut Christi Fílli tui imágini confórmes efficiántur  
 et huius vitæ cursu felíciter consummáto,  
 redimíti glória, in gáudium domus tuæ intráre mereántur.  
 Per Christum Dóminum nostrum.<sup>51</sup>

R. Amen.

Vel:

Dómine Iesu Christe,  
 qui tégimen nostræ mortalitatis indúere dignátus es:  
 obsecrámus imménsam largitatis tuæ abundántiam,  
 ut hoc genus vestimentórum, quod sancti Patres  
 ad innocéntiæ et sanctitatis indíctum ferre sanxérunt,  
 ita bene & dícere dignérис  
 ut qui hoc usus fúerit te indúere mereátur,  
 qui vivis et regnas in sǽcula sǽculórum.<sup>52</sup>

R. Amen.

Tunc Prior professos aqua benedicta aspergit.

### *Conclusio ritus professionis*

43. Symbolum dicitur si rubricis liturgiæ diei præscribitur. Ritus apte concluditur recitatione orationis universalis seu fidelium (infra in Appendix II, nn. 62-65).

<sup>50</sup> Cf. Iordanus, n. 57.

<sup>51</sup> Cf. DB, n. 1218, p. 466.

<sup>52</sup> Eccl. Off., f. 51r A; cf. PS, p. 157.

LITURGIA EUCHARISTICA

44. Dum cantus ad offertorium peragitur, nonnulli religiosi nuper professi ad altare opportune afferunt panem, vinum et aquam pro Sacrificio eucharistico, et alia dona symbolica iuxta traditiones loci.

45. Qui celebrationi praeest pacem offert singulis religiosis nuper professis ad altare accendentibus, more consueto aut secundum loci vel Provinciae consuetudinem.

46. Postquam sacerdos Eucharistiam sumpsit, etiam omnes adstantes eam sub utraque specie sumere possunt, servatis semper dispositionibus Conferentiarum Episcoporum et Episcopi dioecesani.

DIMISSIO

47. Deinde sacerdos fratres et adstantes benedicit:

Dóminus vobíscum.

R. Et cum spíritu tuo.

Sacerdos:

Benedictio Dei omnipoténtis,  
Patris, et Fílli, ☩ et Spíritus Sancti,  
descéndat super vos et máneat semper.

R. Amen.

---

48. Altera benedictionis formula:

Deus Pater sua vos tueáatur grátia  
ut vestræ vocatiónis múnera  
fidéli ánimo persolvátis.

R. Amen.

Dóminus Iesus  
caritatis suæ apud omnes  
signum ac testes  
fáciat vos.

R. Amen.

Spíritus Sanctus  
fortíficet corda vestra  
et súggerat vobis omnem veritátem.

R. Amen.

Et benedictio Dei omnipoténtis,  
Patris, et Fílii, ☩ et Spíritus Sancti,  
descéndat super vos et máneat semper.

R. Amen.

---

49. Deinde diaconus vel sacerdos fratres et adstantes dimittit dicens:

Ite, missa est.

R. Deo grátias.

50. Ritus concludi potest, sicut mos est pro quibusdam celebrationibus in Ordine, antiphona *Salve Regína* vel alio cantu; quo expleto, adstantes salutant fratres nuper professos secundum loci consuetudinem.

## RITUS PROFESSIONIS SIMPLICIS EXTRA MISSAM PERAGENDUS

51. Quando ritus professionis simplicis extra Missam peragitur,<sup>53</sup> inseri potest in celebrationem verbi Dei, modo sequenti:

- a) post cantum aptum, fit interrogatio vel postulatio novitiorum (nn. 34-35);
- b) sequitur lectio verbi Dei, cui respondetur cantu psalmi apti (cf. infra, in Appendice I). Fit deinde allocutio Prioris;
- c) postea ipse ritus professionis habetur: interrogations (nn. 37-38), professionis formula (nn. 39-40), osculum pacis (n. 41), benedictio habitus (n. 42);
- d) ritus concludi potest oratione universalis (cf. infra, in Appendice II, nn. 62-65) — addita, si placet, *Oratione dominica* — et benedictione sollemni (n. 48).

52. Quando autem ritus intra Liturgiam Horarum peragitur (præsertim Laudum vel Vesperarum), proceditur modo sequenti:

- a) post hymni cantum, fit interrogatio vel postulatio novitiorum (nn. 34-35);
- b) sequuntur psalmodia et lectio verbi Dei, quod seligi potest ex textibus in Lectionario præbitis (cf. infra, in Appendice I). Fit deinde allocutio Prioris;
- c) postea ipse ritus professionis habetur: interrogations (nn. 37-38), professionis formula (nn. 39-40), osculum pacis (n. 41), benedictio habitus (n. 42);
- d) deinde dicitur oratio universalis seu fidelium (cf. infra, in Appendice II, nn. 62-65);
- e) canitur postea *Canticum Zachariae* vel *Magnificat*;
- f) ritus concluditur recitatione *Orationis dominicæ*, oratione finali et benedictione sollemni (n. 48).

---

<sup>53</sup> Cf. «Intr. gen.», n. 12.

## CAPUT III

### RITUS PROFESSIONIS SOLLEMNIS INTRA MISSAM PERAGENDUS

#### NOTA PRÆVIA

53. Antequam ad professionem sollemnem candidati admittantur, denuo fiat ipsis, coram Consilio conventus vel coetu pro eorum admissione, declaratio et protestatio circa vitæ religiosæ et legum Ordinis observantiam,<sup>54</sup> iis attentis quæ in jurisprudentia uniuscuiusque regionis cavitur.

54. De professione emissâ adnotatio fiat in libro professionum et ab eodem professo atque a duobus testibus subscribatur,<sup>55</sup> numquam vero super altare.

#### DE MODO RECIPIENDI AD PROFESSIONEM

55. Professionis sollemnis ritus, Familiae Dominicanæ sodalium populique concursu, intra Missam peropportune persolvitur. Fideles autem de die atque hora tempestive certiores fiant, quo frequentiores accurrere possint.

56. Ad professionis ritum peragendum, quo religiosus Deo in perpetuum mancipatur, laudabiliter eligitur dies dominica aut solemnitas Domino, beatæ Mariæ vel Sanctis, nostri Ordinis præsertim, dicata, servatis semper de iure servandis.

57. Ritus peragitur separatim a ceteris professionis ritibus.<sup>56</sup> Congrua autem sollemnitate celebretur, ut ritus natura postulat, decora tamen illa sobrietate servata, quæ Ordini nostro convenit.

<sup>54</sup> Cf. LCO, n. 174, §§ I-II; vide etiam infra, in Appendice V, n. 79.

<sup>55</sup> LCO, n. 194.

<sup>56</sup> Cf. OPR Pr., n. 8; OPR I, n. 41.

58. Professio de more fit in ecclesia Ordinis vel, si ita opportu-  
num videbitur, ritus in cathedrali vel parœciali aliave insigni ecclesia  
congruenter persolvitur.<sup>57</sup>

59. Professio de more fit ad sedem; ad participationem autem  
fidelium expediendam, sedes pro sacerdote Celebrante opportune  
paratur ante altare; omnia ita disponantur, ut tota actio liturgica a  
fidelibus conspici possit.

60. Ubi fieri potest, Missa concelebrata præferatur, cui Prior  
professionem recepturus præsit.

61. Adhibetur "Missa diei" aut "Missa ritualis in die professionis  
perpetuæ", quæ in Proprio Missarum invenitur, ad normam legum  
liturgicarum.<sup>58</sup>

## RITUS INITIALES

62. Celebratio opportune incipit cantu introitus dum incedit processio  
per ecclesiam ad altare, cui laudabiliter intersunt professuri, eorum comi-  
tante Magistro. Cum ad presbyterium pervenerint, facta altari debita reve-  
rentia, omnes locis sibi designatis se disponunt; tum actio liturgica prose-  
quitur.

## LITURGIA VERBI

63. In liturgia verbi omnia fiunt more solito, præter hæc:  
a) lectiones, diebus quibus permittitur, vel e "Missa diei" vel e Sacra  
Scriptura sumi possunt, ex illis quæ in peculiari lectionario (infra, in Appen-  
dice I) proponuntur;<sup>59</sup>  
b) Symbolum dicitur, si rubricis liturgiæ diei præscribitur.

---

<sup>57</sup> Cf. LHOP, *Adnot. compl.*, n. 36, p. 19.

<sup>58</sup> Cf. «Intr. gen.», nn. 17-18.

<sup>59</sup> Cf. «Intr. gen.», n. 18.

## PROFESSIONIS RELIGIOSA

*Interrogatio vel postulatio*

64. Dicto Evangelio, Magister aliusve frater professuros dicit in medium ante Priorem, ubi se prosternunt manibus in modum crucis extensis. Tunc Prior professuros interrogat dicens:

**Quid quæritis?**

Cui omnes simul respondent:

Misericórdiam Dei et vestram.<sup>60</sup>

---

65. Vel, si placet, omissa interrogatione et absque prostratione, unus ex professuris, stans ad Priorem conversus, nomine omnium postulationem facere potest his vel similibus verbis:

Nos, *N.* et *N.*, cum misericórdia Dei  
vitam ipsi vínculis sacrí dicátam  
in vestra novérimus communitáte,  
a te, Pater (Frater), humíliter pósclimus,  
ut professiónem sollémnem  
in Órdine Fratrum Prædicatórum emittámus  
ad Dei laudem et Ecclésiæ servítium.

Quibus dictis, omnes candidati se prosternunt manibus in modum crucis extensis. Prior et omnes fratres respondent:

**Deo grátias.**

vel alio apto modo.

---

Diaconus vel minister subiungit:

**Leváte.**

<sup>60</sup> Cf. *I Const.*, d. I, c. 13.

Tunc professuri ad locum suum redeunt et omnes sedent.

*Homilia seu allocutio*

66. Quibus peractis, fit homilia seu allocutio in qua opportune illustrantur tum lectiones biblicæ tum professionis religiosæ donum Ordinisque nostri propria vocatio et missio atque munus ad electorum sanctificationem atque ad Ecclesiæ totiusque humanæ familiæ bonum.

*Interrogationes*

67. Homilia expleta Prior ad professuros conversus quærerit:

Vultis fácere professiónem sollémnem  
secúndum Constitutiónes Órdinis Prædicatórum?<sup>61</sup>

Professuri surgentes simul respondent:

Volo, cum adiútório Dei et vestro.

Prior subiungit:

Dóminus qui incépit, ipse perfíciat.

R. Amen.

---

68. Vel, si placet, Prior voluntatem candidatorum, coram eo stantium, requirit interrogatiōnibus quæ sequuntur vel istis similibus.

Prior:

Fílli (Frates) dilectíssimi, iam per baptísmum  
peccáto mórtui ac Dómino sacráti,  
vultis sollémnis professiónis título  
árctius Christo et Ecclésiæ coniúngi? <sup>62</sup>

---

<sup>61</sup> Cf. CMS, p. 17.

<sup>62</sup> Cf. LCO, n. 19, § II.

Professuri omnes simul respondent:

Volo, cum adiutorio Dei et vestro.

Prior:

Vultis in caritáte Dei et próximi profícere<sup>63</sup>  
Órdinis nostri apostólicum propósitum prosequéndo  
tamquam viri qui suam et aliórum salútem  
procuráre desíderant,  
sui sequéntes vestígia Salvatóris? <sup>64</sup>

Professuri:

Volo, cum adiutorio Dei et vestro.

Prior:

Vultis, Sancti Spíritus subveniénte múnere,  
professióne sollémni Órdini nostro cooptári,  
Deo totáliter consecrári  
ac univérsæ Ecclésiæ novo modo devovéri,  
íntegræ evangelizatióni verbi Dei totáliter deputáti? <sup>65</sup>

Professuri:

Volo, cum adiutorio Dei et vestro.

Tunc Prior eorum voluntatem confirmat dicens:

Dóminus qui incépit, ipse perficiat.

Omnes:

Amen.

---

<sup>63</sup> Cf. LCO n 1, *Const. fund.*, § III.

<sup>64</sup> Cf. I *Const.*, d. II, c. 31; LCO, n. 1, *Const fund.*, § II.

<sup>65</sup> Cf. LCO, n. 1, *Const. fund.*, § III.

*Supplicatio pro fratribus professuris*

69. Interrogationibus expletis, omnes pro supplicatione surgunt. Sacerdos stans, manibus iunctis, ad populum conversus dicit:

Orémus, fratres dilectíssimi,  
Deum Patrem omnipoténtem,  
ut super hos fámulos,  
quos ad perféctam Christi sequélam vocávit,  
benedictiónis suæ grátiam cleménter effúndat  
eósque in sancto propósito  
benígna pietáte confírmet.

His dictis, omnes silentio orant vel Litaniæ sanctorum (infra, in Appendix IV, nn. 71-74) ad libitum canuntur.

*Professio religiosa*

70. Supplicationibus expletis, professuri singuli genuflectunt ante Priorem sedentem, et suis quíisque manibus positis inter eiusdem manus ac libro Constitutionum superposito manibus utriusque, professionem faciunt intelligibili voce proferendo verba professionis, iuxta sequentem formulam Ordini propriam:

Ego frater N. N. fácio professiónem  
et promítto obediéntiam Deo  
et beatæ Mariæ et beáto Domínico  
et tibi fratri N. N., Magístro Órdinis Fratrum Prædicatórum  
et successóribus tuis  
(*vel*: tibi fratri N.N., Prióri provinciáli Provínciæ N.,  
*vel*: tibi fratri N.N., delegáto...,  
vice fratriss N.N., Magístri Órdinis Fratrum  
Prædicatórum et successórum eius),  
secúndum régulam beáti Augustíni  
et Institutiōnes Fratrum Prædicatórum,  
quod ero obediens tibi tuísque successóribus,  
usque ad mortem.<sup>66</sup>

---

<sup>66</sup> LCO, n. 211.

71. Si vero tempore professionis Ordo Magistrum non habuerit, profiens obœdientiam præsidenti promittat vice Magistri Ordinis, absque expressione cuiuscumque nominis.<sup>67</sup>

### *Osculum pacis et sollemnis benedictionis oratio*

72. Emissa professione, tantummodo Prior fratres profitentes recipit ad osculum pacis, receptionis scilicet in Ordinem, quo vinculum obœdientiæ et communionis significatur.

73. Tunc, nisi habenda sit sollemnis benedictionis oratio, Prior fratres nuper professos monet his vel similibus verbis:

Fratres caríssimi, per hanc professiónem sollémnem  
vosmetípos tradidístis Deo eiúsque voluntáti:  
Deus ígitur per ministérium Ecclésiæ  
sibi ipse vos consecrávit.<sup>68</sup>

Vel, si placet, religiosi nuper professi genua flectunt et Prior, manibus super eos extensis, dicit benedictionis precem iuxta formularia infra in Appendix (IV, n. 76) posita.

### *Conclusio ritus professionis*

74. Quibus expletis, fratres nuper professi ad loca sibi designata reveruntur. Symbolum dicitur si rubricis liturgiæ diei præscribitur. Oratio fidelium (infra, in Appendix II, nn. 62-65) omittitur quando Litaniæ habitæ sunt.

## LITURGIA EUCHARISTICA

75. Dum cantus ad offertorium peragitur, nonnulli fratres nuper professi ad altare opportune afferunt panem, vinum et aquam pro Sacrificio eucharistico, et alia dona symbolica iuxta probatas consuetudines loci.

<sup>67</sup> LCO, n. 199, § II.

<sup>68</sup> Vide supra, «Intr. gen.», n. 4.

76. In Precibus eucharisticis, professorum oblatio secundum has formulas opportune commemoratur:

a) in Prece eucharistica I dicitur «Hanc ígitur» proprium:

Hanc ígitur oblationem servitutis nostræ,  
sed et famulorum tuorum,  
quam tibi in die eorum professioñis offérimus,  
quæsumus, Dómine,  
placatus accipe et propitiatus sanctifica;  
ut qui, te largiente,  
hodie vitam suam tibi dicárunt,  
in Fílii tui glorióso advéntu  
æternæ Paschæ gáudio mereántur admitti.  
(Per Christum Dóminum nostrum.)

b) in intercessionibus Precis eucharisticæ II, post verba «...univérso clero» additur:

Recordáre quoque, Dómine, istorum fratrum,  
qui hodie se tibi dicárunt perpétuo Evangélii servitio,  
et concéde ut domus oratiónis et laudis tuæ  
in perpétuum<sup>69</sup> exsístant.

c) in intercessionibus Precis eucharisticæ III, post verba «...pópulo acquisitiónis tuæ» additur:

Confortáre quoque in sancto propó sito dignéris  
hos fámulos tuos,  
qui hodie sacris religiónis vínculis  
perpétuo tibi se devinxérunt,  
et fac ut in Ecclésia tua  
novam et æternam vitam maniféstent  
Christi redemptiōne comparátam.

d) in intercessionibus Precis eucharisticæ IV, post verba «... sed et totius cleri» additur:

---

<sup>69</sup> Cf. MLOP, p. 254

... et istórum fratrum, qui professióne sollémni  
hódie tibi árctius consecrántur,  
et offeréntium  
et circum adstántium ...

77. Postquam sacerdos Eucharistiam sumpsit, etiam omnes adstantes eam sub utraque specie sumere possunt, servatis semper dispositionibus Conferentiarum Episcoporum et Episcopi diócesani.

#### CONCLUSIO RITUS

78. Oratione post communionem expleta, fratres nuper professi ante altare sistunt et sacerdos, manibus super eos et populum extensis, dicere potest :

Deus, tanti óperis auctor et custos,  
supérna sua vos tueátur grátia  
ut vestræ vocatiónis múnera  
fidéli ánimo persolvátis.

*R.* Amen.

Ipse divínæ vos fáciat caritátis  
apud omnes testimónium et signum.

*R.* Amen.

Divíni sui Spíritus advocántis grátia  
corda vestra efficáciter fecúndet  
pro Ecclésiæ et humánæ familiæ proféctu.

*R.* Amen.

Et vos omnes, qui his sacris adéstis,  
benedícat omnípotens Deus,  
Pater, et Fílius, ☩ et Spíritus Sanctus.

*R.* Amen.

79. Deinde diaconus vel sacerdos fratres et adstantes dimittit dicens:  
Ite, missa est.

R. Deo grátias.

80. Tunc pro opportunitate adstantes salutant fratres nuper professos,  
secundum loci consuetudinem, dum canitur antiphona:

Ecce quam bonum et quam iucúndum  
habitáre fratres in unum.

cum Psalmo 132, vel alius congruus cantus.

## CAPUT IV

### RITUS RENOVATIONIS VOTORUM TEMPORARIORUM INTRA MISSAM PERAGENDUS

81. Hoc capite describitur ritus qui adhibetur cum renovatio votorum temporariorum, quæ ex Constitutionum<sup>70</sup> præscripto fit, intra Missam peragitur. Si autem renovatio votorum fit extra Missam, professio sine rito peculiari coram duobus testibus renovetur.

82. Ritus renovationis votorum maxima sobrietate peragatur, præsertim cum vota ad annum renovantur.

Quando ritus in ecclesia persolvitur, professio de more fit ad sedem; opportuno presbyterii loco paretur sedes pro Priore, fratrum professionem recepturo.

83. Adhibetur "Missa diei" aut "Missa ritualis in die renovationis votorum", ad normam legum liturgicarum.<sup>71</sup>

84. De professione emissa adnotatio fiat in libro professio-  
num et ab eodem professo atque a duobus testibus subscriba-  
tur,<sup>72</sup> numquam vero super altare.

## LITURGIA VERBI

85. In liturgia verbi, diebus quibus permittitur, lectiones vel e "Missa diei" vel e Sacra Scriptura sumi possunt, ex illis quæ in peculiari lectionario (infra, in Appendice I) proponuntur.<sup>73</sup>

86. Post Evangelium fit homilia, in qua tum lectiones bibliæ tum vis et virtus vitæ religiosæ in Ordine nostro commemorantur.

<sup>70</sup> LCO, nn. 195, § II; 202; 203.

<sup>71</sup> Cf. «Intr. gen.», nn. 17-18; *Missale Romanum*, 1975<sup>2</sup>, p. 773.

<sup>72</sup> LCO, n. 194.

<sup>73</sup> Cf. «Intr. gen.», n. 18.

## VOTORUM RENOVATIO

*Divinæ gratiæ expostulatio*

87. Homilia expleta, Prior divinum auxilium exposcere potest, dicens:

Orémus Deum Patrem,  
perseverántis consílīi largítórem,  
pro his fámulis eius,  
qui hódie coram Ecclésia  
vota sua renováre inténdunt.

Omnes per aliquod temporis spatium silentio orant. Deinde Prior dicit:

Réspice, quásumus Dómine,  
super hos fámulos tuos,  
quos ad Fílii tui préssius sectánda vestígia  
providénti vocásti consílio;  
et miserátus concéde  
ut iter amóris tui,  
quod ál acres sunt aggréssi,  
perseveránti caritáte confícient.  
Per Christum Dóminum nostrum.

R. Amen.

*Renovatio professionis*

88. Oratione expleta, singuli professuri accedentes genuflectunt ante Priorem sedentem et, positis manibus suis inter eiusdem manus ac libro Constitutionum superposito manibus utriusque, professionem renovant intelligibili voce proferendo verba professionis iuxta sequentem formulam Ordini propriam:

Ego frater N. N. rénovo professiónem  
et promítto obœdiéntiam Deo  
et beátæ Maríæ et beáto Domínico  
et tibi fratri N. N., Magístro Órdinis Fratrum Prædicatórum  
et successóribus tuis

(*vel*: tibi fratri *N.N.*, Prióri provinciáli Provinciæ *N.*,  
*vel*: tibi fratri *N.N.*, delegáto...,  
 vice fratris *N.N.*, Magístri Órdinis Fratrum  
 Prædicátorum et successórum eius),  
 secúndum régulam beáti Augustíni  
 et Institutiónes Fratrum Prædicatórum,  
 quod ero obœdiens tibi tuísque successóribus,  
 ad biénnium (*vel*: ad annum).<sup>74</sup>

89. Si vero tempore professionis Ordo Magistrum non habuerit, profi-  
 tens obœdientiam præsidenti promittat vice Magistri Ordinis, absque  
 expressione cuiuscumque nominis.<sup>75</sup>

#### CONCLUSIO RITUS

90. Renovata professione, tantummodo Prior fratres profitentes reci-  
 pit ad osculum pacis, receptionis scilicet in Ordinem, quo vinculum obœ-  
 dientiae et communionis significatur.

91. Symbolum dicitur si rubricis liturgiæ diei præscribitur. Oratio uni-  
 versalis seu fidelium (cf. infra, in Appendice II, nn. 62-65) fit modo in cele-  
 brationibus liturgicis consueto.

<sup>74</sup> Cf. LCO, n. 199, § I; n. 201, § I.

<sup>75</sup> LCO, n. 199, § II.

## CAPUT V

### MISSA IN XXV VEL L ANNIVERSARIO PROFESSIONIS

92. In xxv vel l anniversario professionis religiosæ peculiaris celebra-  
tio, quamvis non habeatur in traditione Ordinis, causa pietatis necnon et  
pastoralis actionis haberi potest, cum professionis confirmatione intra Mis-  
sam.<sup>76</sup>

93. Missa<sup>77</sup> celebrari potest, cum vestibus albi coloris, diebus quibus  
Missæ "pro variis necessitatibus" celebrari possunt, ad normam legum litur-  
gicarum.

Post homiliam professio publice confirmari potest, ritu renovationis  
votorum exhibito (supra, nn. 87-91), formula autem sequenti:

Ego frater N. N. totáliter adháereo professióni a me factæ  
et promítto obœdiéntiam Deo  
et beátæ Maríæ et beáto Domínico  
et fratri N. N. Magístro Órdinis Fratrum Prædicatórum  
et successóribus eius,  
secúndum régulam beáti Augustíni  
et Institutíones Fratrum Prædicatórum,  
grátiam Dei implórans  
qua fidéliter professiónem meam adimplére possim  
usque ad mortem.

94. Pro Missæ celebratione formularium aptum hic apponitur.

*Ant. ad introitum*

*Ps 39, 8-9*

Ecce vénio, Dómine, fácere voluntátem tuam.  
Deus meus, vólui, et lex tua in præcordiis meis.

<sup>76</sup> Cf. «Intr. gen.», n. 15; OPR Pr., n. 7.

<sup>77</sup> Cf. *Missale Romanum*, 1975<sup>2</sup>, p. 774.

*Collecta*

Dómine, Deus fidélis,  
da nobis, quæsumus, grátias tibi reférre  
pro tua erga fratrem nostrum *N.* (*vel*: me) benignitáte,  
qui accéptum a te donum  
hódie confirmáre inténdit (*vel*: inténdo).  
Róbora in eo (*vel*: me) spíritum perféctæ caritátis,  
ut glóriæ tuæ et óperi salútis  
in dies váleat (*vel*: váleam) fervéntius inservíre.  
Per Dóminum.

*Super oblata*

Súscipe, Dómine,  
una cum munéribus oblatióinem sui (*vel*: mei)  
quam hódie frater noster *N.* (*vel*: ego)  
confirmáre desíderat (*vel*: desídero),  
et per virtútem Sancti Spíritus  
imágini dilécti Fílli tui  
ámplius eum (*vel*: me) conformáre dignérис.  
Qui vivit et regnat.

Præfatio propria (cf. *infra*, in Appendix III).

*Ant. ad communionem*

*Gal 2,19-20*

Christo confíxus sum cruci. Vivo autem, iam non ego:  
vivit vero in me Christus.

*Vel, in cantu:*

*Mt 6,33*

Primum quærите regnum Dei  
et ómnia adiciéntur vobis,  
dicit Dóminus.

*Post communionem*

Súmpsimus, Dómine, Corpus et Ságuinem Fílii tui,  
quæ in iucúnda celebratióne huius anniversárii contulísti;  
concéde, quæsumus, ut frater noster *N.* (*vel*: ego),  
cælésti pane potúque reféctus,  
incépti itineris ad te ducéntis  
felícem progréssum obtíneat (*vel*: obtíneam).  
Per Christum.

In fine Missæ opportune canitur resp. *O spem miram* (AG, p. 871) vel *Média vita* (AG, p. 106) vel *Dómine Deus* (GOP, p. 356; GR, p. 401) vel alius cantus aptus.

PARS SECUNDA

ORDO  
RECEPTIONIS ET PROFESSIONIS  
MONIALIUM



## PROÆMIUM

1. EX ANTIQUA CONSuetudine,<sup>1</sup> novitiorum receptio in Ordinem traditione habitus perficitur tamquam verus admissionis ritus; ideoque ritualis “vestitio” initio novitiatus<sup>2</sup> perficienda collocatur, utpote “signum receptionis” in Ordinem, nondum vero “consecrationis”, quæ per professionem habetur.<sup>3</sup>

Ubi autem habitus, iuxta Directorii determinationem,<sup>4</sup> nonnisi in die primæ professionis suscipiatur, in receptione novitiarum habitus traditio (infra, nn. 16-17) omittitur.

2. In Ordine duplex fit professio: prima simplex et temporaria post novitiatum, altera vero sollemnis et exinde perpetua.<sup>5</sup>

Duplex igitur habetur ritus recipiendi ad professionem:

- ritus professionis simplicis seu temporariæ;
- ritus professionis sollemnis seu perpetuæ.

Qui quidem ritus ita distinguantur oportet ut “discrimen liturgicum” inter professionem sollemnem et professionem simplicem accurate servetur.<sup>6</sup>

3. Professio autem emittitur sub unica formula Ordini nostro propria,<sup>7</sup> temporis tantum indicatione mutata.<sup>8</sup>

---

<sup>1</sup> Cf. *I Const.*, d. I, c. 14; *Directorium XII*, pp. 116-118; *Humbertus II*, pp. 525-527.

<sup>2</sup> Vide supra, «Intr. gen.», adn. 44.

<sup>3</sup> Vide supra, «Intr. gen.», n. 7.

<sup>4</sup> Cf. *LCM*, n. 140, § II.

<sup>5</sup> *LCO*, n. 190; cf. supra, «Intr. gen.», nn. 9.12.13.

<sup>6</sup> *OPR Pr.*, n. 14, c.

<sup>7</sup> Cf. supra, «Intr. gen.», n. 7.

<sup>8</sup> *LCM*, nn. 157, § I et 167, § II.

## CAPUT I

### RITUS RECEPTIONIS NOVITIARUM

#### DE MODO RECIPIENDI NOVITIAS IN ORDINEM

4. Antequam novitiatus incipiat, coram Consilio monasterii vel cœtu pro candidatæ admissione fiat postulanti "declaratio et protestatio"<sup>9</sup> circa vitæ religiosæ et legum Ordinis observantiam, ut infra in Appendice (V, n. 79), iis attentis quæ in iurisprudentia uniuscuiusque regionis cauentur.

5. Die quo novitiatus canonicus incipit ritum peragere præstat, qui sua ipsius natura peragi debet extra Missam,<sup>10</sup> separatim quoque a professionis ritibus. Coniungi vero potest celebrationi alicuius partis Liturgiæ Horarum — Laudum præcipue aut Vesperarum — vel peculiari verbi Dei celebrationi, quæ naturam vitæ religiosæ contemplativæ et indolem propriam Ordinis nostri illustret.

6. Ritus sit admodum simplex, sobrius, monialibus præsertim reservatus. Ad ipsum ritum peragendum aula capitularis vel alias similis locus convenienter deligitur. Ubi autem propinqui vel sodales ex aliis cœtibus Familiae Dominicanæ sint admittendi,<sup>11</sup> ritus in monasterii ecclesia peragi potest.

7. Ritui præest Priorissa monasterii in quo postulans recipitur vel Suppriorissa in capite vel monialis ab eis delegata.<sup>12</sup> Quæ omnes nomine "Priorissæ" hic infra indicantur.

Adesse potest etiam Frater Ordinis, a Priorissa invitatus.

8. Novitiatus incipit intimatione facta a Priorissa quæ candidatam ad habitum recipit. De hac intimatione fiat registratio, a novitia et a duabus testibus subscripta, in libro admissionum.<sup>13</sup>

<sup>9</sup> Cf. LCO, n. 174, §§ I-II et p. 229.

<sup>10</sup> Cf. OPR Pr., n. 12.

<sup>11</sup> Vide supra, «Intr. gen.», n. 11.

<sup>12</sup> Cf. LCO, n. 175.

<sup>13</sup> LCM, n. 140, § I.

## RITUS INITIALES

9. Ritus opportune incipit salutatione Priorissæ, quæ pro opportunitate — scilicet, si prævia quædam ritus explicatio non est habita — poterit paucis verbis, monitionis instar, sensum celebrationis adstantibus explanare. Sequitur cantus *Veni Cœdator* aliasve hymnus.

*Interrogatio*

10. Deinde Magistra novitiarum comitatur postulantem in medium capituli, ubi ipsa se prosternit.

Tunc Priorissa — induta cappa Ordinis, si mos est — postulantis voluntatem exquirit dicens:

Quid quæris?

Candidata respondet:

Misericórdiam Dei et vestram.<sup>14</sup>

\* \* \*

11. Tunc Priorissa pro opportunitate adstantes ad orationem invitat, his vel similibus verbis:

Orémus pro ista sorore nostra  
quæ in monastérium nostrum récipi petit,  
ut divinus Magíster ipsi tríbuat  
abundántiam sui Spíritus et suæ pacis solácium.

Omnes per aliquod temporis spatium silentio orant.

<sup>14</sup> Cf. *I Const.*, d. I, c. 13.

12. Deinde Priorissa dicit:

Deus, sanctæ vocatiōnis largítor,  
qui ut viri evangélici<sup>15</sup> exéplum  
beátum Domínicum Ecclésiæ donásti,  
fámulæ tuæ *N.* supplicatiōnes benígnus exáudi,  
quæ, ut tibi perféctius desérviat,  
nostræ petit aggregári familiæ;  
et concéde propítius  
ut commúnis vita in mútuam dilectionem convertátur.  
Per Christum Dóminum nostrum.

R. Amen.

\* \* \*

Deinde Priorissa dicit:

Surge.

Tunc postulans ad locum suum redit, et omnes sedent.

#### VERBI DEI CELEBRATIO

13. Deinde leguntur sacrarum Scripturarum textus apti, qui novitatem vitæ per baptismum acceptam memorent, ad indicandum nexum vitæ religiosæ cum baptimate aliisque initiationis christianæ vitæ sacramentis, congruentibus interiectis responsoriis (cf. infra, in Appendice I).

14. Quibus peractis, præ oculis habens Scripturarum lectiones, Priorissa vel Frater Ordinis communitatem sororum et postulantes adloquitur de vitæ contemplativæ natura atque de Ordinis nostri charismate proprio, eiusdem præcipuas exigentias et austeritates<sup>16</sup> illustrans.

---

<sup>15</sup> Iordanus, n. 104.

<sup>16</sup> Cf. PS, pp. 149-153.

### RECEPTIO POSTULANTIS

#### *Interrogationes*

15. In fine sermonis, Priorissa invitat postulantem ad surgendum et voluntatem eius requirit, his vel similibus verbis, unam vel plures interrogations seligens:

Vis, firma intentiōne,  
in novitāte vitæ fidéliter ambuláre?

Postulans respondet:

Volo, cum adiutorio Dei et vestro.<sup>17</sup>

Priorissa:

Vis Dóminum Iesum sequi  
secúndum beáti Domíñici evangélicum propósitum?

Postulans:

Volo, cum adiutorio Dei et vestro.

Priorissa:

Vis ergo in nostram récipi familiām,  
ad conversatiōnem nostram experiéndam  
in perfécta regulári observántia?

Postulans:

Volo, cum adiutorio Dei et vestro.

Tunc Priorissa eius voluntatem confirmat dicens:

Dóminus qui incépit, ipse perfíciat.<sup>18</sup>

---

<sup>17</sup> Directorium XI, 9, p. 118.

<sup>18</sup> I Const., d. I, c. 13.

Et adstantes respondent:

Amen.

### *Vestitio seu traditio habitus*

16. Tunc Magistra novitarum postulantem dicit ad Priorissam et facit genuflectere coram ea; et vestiaria portans vestes præparatas, eas Priorissæ porrigit. Priorissa, adiuvante Magistra novitarum, loco apto postulantem induit habitu Ordinis novitiis proprio (cf. n. 1).

Vestitione peracta, Priorissa novitiam recipit ad osculum pacis, utpote signum receptionis in Ordinem et admissionis in fraternitatem monasticam.

Dum novitia induitur, omnibus genua flectentibus canitur hymnus *Veni Creator*,<sup>19</sup> nisi prius cantatus fuerit, aut chorus canit antiphonam *Immutémur hábitu* (MLOP, p. 6) cum psalmo 39 (*Exspectans exspectávi Dóminum*), vel alium congruum cantum.

---

17. Vel, si talis est consuetudo Monasterii, Priorissa habitum novitarum tradit candidatæ aliqua parte novitiatus expleta,<sup>20</sup> congrua vero celebrazione disposita.

Quo in ritu, Magistra novitarum candidatam dicit ad Priorissam et facit genuflectere coram ea, quæ habitu eam induit vel habitum ipsi in manus tradit, dicens;

**Præstet tibi Dóminus**

véterem hóminem exúere, cum áctibus suis,  
et novum indúere hóminem, qui secúndum Deum creátus est,  
in iustítia et sanctitáte veritátis.<sup>21</sup>

Quo facto, Priorissa novitiam recipit ad osculum pacis, utpote signum receptionis in Ordinem et admissionis in fraternitatem monasticam.

---

18. Tunc, si ritus in capitulo fuerit peractus, egredi potest communitas processionaliter ad ecclesiam, iunioribus præcedentibus, Magistra novitarum vel alia moniali ducente novitiam usque ad chorūm monialium. In processione canitur hymnus vel psalmus aptus.

<sup>19</sup> Cf. COP, p. 123, n. 486.

<sup>20</sup> Cf. supra, «Intr. gen.», adn. 44.

<sup>21</sup> Cf. Eph 4, 24.

*Oratio universalis*

19. Deinde fieri potest oratio universalis, modo in celebrationibus consueto, iuxta formularium quod in Appendice (II, nn. 62-65) affertur. Petitio-nibus expletis dicitur *Oratio dominica*.

*Receptio fraterna et intimatio novitiatus*

20. Postea novitia eat dando pacem unicuique sororum, dum canitur ps. 132 *Ecce quam bonum vel ant. Ubi caritas vel ant. O spem miram vel* alius cantus congruus.

21. Quibus expletis, Magistra novitiam iterum ad Priorissam ducit, quae ei — si opportunum videtur — aliud nomen, christianum scilicet, adde-re potest, dicens :

Ex baptismo est nomen tuum N.,  
in Ordine vocáberis soror N.N.<sup>22</sup>

Deinde Priorissa intimatione<sup>23</sup> anni canonici novitiatus tempus probationis assignat novitiamque curae Magistræ tradit, eam monens his vel similibus verbis:

Ecce, filia, tu recepisti misericordiam Dei et nostram  
iam ex parte,  
quia dédimus tibi hábitum nostrum ad probatiómem:  
restat tibi facere professiómem,  
ut ipsam misericordiam nostram possis habére compléte.  
Et quia forte mores Religiónis non placébunt tibi,  
aut mores tui non placébunt nobis,  
ídeo auctorité Ecclésiæ et Ordinis  
tibi concédo unum annum,  
ut tu possis probáre mores nostros et nos mores tuos.

<sup>22</sup> Cf. PS, p. 155.

<sup>23</sup> Cf. LCM, n. 140, § I.

Et si tibi placébit nobíscum vívere  
et nobis placébit conversátio tua  
recipiémus te ad professióinem:  
álias et nos et tu érimus in libertáte.

Conáre ergo iugum hoc pro amóre Dei libénter ferre  
et Magístræ tuæ in ómnibus oboédire tamquam mihi.<sup>24</sup>

Vel:

Iura volunt quod ingrediéntibus nostrum Órdinem,  
tempus probatiónis, annus vidélicet, assignétur.

Et ego — auctoráte officii quo fungor —  
unum annum tibi pro témpore probatiónis assígno,  
sub ductu soróris *N. N.* percurréndum,  
quæ te de Órdine nostro docébit.

Infra hoc tempus, soróres probábunt mores tuos  
et tu probábis vires tuas  
ad austérítátes Órdinis eiúsque múnera sustinénda.  
Quo anno elápsso, póteris,  
si tibi et soróribus placúerit,  
per professióinem Órdini obligári;  
sin autem, póteris de te, prout vidébitur, ordináre.<sup>25</sup>

22. Si secundum consuetudines monasterii novitiæ librum Constitutionum vel insignia quædam tradi placet, hic tradantur silentio vel apta formula, decora sobrietate servata.

Si non sequitur aliqua pars Liturgiæ Horarum, ritus concluditur ut sequitur.

#### CONCLUSIO RITUS

23. His omnibus peractis, Priorissa adstantes ad orationem invitat, dicens:

---

<sup>24</sup> Cf. PS, p. 155.

<sup>25</sup> *Directorium XI*, 8, p. 118; cf. *I Const.*, d. I, c. 13.

Imitémur, soróres, ut póssumus,  
 sancti patris Domínici vestígia,  
 simul et agámus grátias Redemptóri  
 qui talem in via hac, qua ambulámus,  
 ducem exhíbuit servis suis,  
 per eum nos in huius conversatiónis lucem regénerans;  
 et deprecémur misericordiárum Patrem,  
 ut illo nos regénte Spíritu, quo filii Dei agúntur,  
 per térmilos quos posuérunt patres nostri  
 ad eándem metam perpétuæ felicitátis  
 et sempitérnæ beatitúdinis,  
 ad quam ille sine fine felix introívit,  
 nos quoque indefléxo trámite pertíngere mereámur.<sup>26</sup>

Orémus.

Omnes per aliquod temporis spatiū silentio orant; deinde Priorissa prosequitur:

Deus, qui renuntiántibus sáculo  
 mansiónes paras in cælo,  
 diláta corda nostra cælestibus bonis,  
 ut concórdet nostra vita cum nómine  
 et proféssio sentiátur in ópere.  
 Per Christum Dóminum nostrum.<sup>27</sup>

R. Amen.

¶ Adiutorium nostrum in nómine Dómini.

R. Qui fecit cælum et terram.

24. Ritus concludi potest, sicut mos est pro quibusdam celebrationibus in Ordine, antiphona *Salve Regína* vel alio cantu; quo expleto, adstantes novitiam salutant secundum loci consuetudinem.

<sup>26</sup> Cf. Iordanus, n. 109.

<sup>27</sup> Cf. MOP, p. [87].

## CAPUT II

### RITUS PROFESSIONIS SIMPLICIS

#### DE MODO RECIPIENDI AD PROFESSIONEM

25. Ritus professionis, ex Ordinis consuetudine,<sup>28</sup> in aula capitulari vel in choro peragitur; rationabili vero de causa in ecclesia monasterii fieri potest, sive in connexione cum aliqua divini Officii Hora sive intra Missam,<sup>29</sup> iuxta hodiernam consuetudinem.

26. Ritui ad recipiendam professionem ordinarie præest, præter Magistrum Ordinis, Priorissa vel Suppriorissa in capite monasterii in quo professio emittitur, vel earum delegata.<sup>30</sup> Quæ omnes nomine "Priorissæ" hic infra indicantur.

27. Antequam ad primam professionem novitia admittatur, denuo fiat ipsi, coram Consilio monasterii vel cœtu pro candidatæ admissione, "declaratio et protestatio"<sup>31</sup> circa vitæ religiosæ et legum Ordinis observantiam, ut in Appendice (V, n. 79) traditur, iis attentis quæ in iurisprudentia uniuscuiusque regionis cauentur.

28. De professione emissâ adnotatio fiat in libro professionum et ab eadem professa atque a duabus testibus subscribatur;<sup>32</sup> numquam vero super altare.

29. In hoc Rituali illi professionis ritus præbentur qui intra Missam peraguntur. Quando autem extra Missam professio emittitur vel renovatur, ritus est pro opportunitate aptandus, congruis elementis selectis, ut infra, nn. 53-54.

---

<sup>28</sup> Cf. supra «Intr. gen.», n. 7.

<sup>29</sup> Cf. OPR Pr., n. 5.

<sup>30</sup> LCM, n. 156.

<sup>31</sup> Cf. LCO, n. 174, §§ I-II et p. 229.

<sup>32</sup> LCM, n. 159.

## RITUS PROFESSIONIS SIMPLICIS INTRA MISSAM PERAGENDUS

30. Quando ritus professionis in ecclesia persolvitur, professio de more fit ad sedem. In presbyterio vel in choro omnia disponantur ut etiam alii fideles celebrationi convenienter possint adesse, attentis quidem generalibus Ecclesiæ legibus et particularibus adjunctis.

31. Adhibetur "Missa de die" aut "Missa ritualis in die primæ professionis religiosæ", ad normam legum liturgicarum.<sup>33</sup>

Eucharistia opportune a Fratre Ordinis celebratur, ministrante diacono.

### RITUS INITIALES

32. Actio liturgica opportune incipit cantu introitus. Novitia professura habitu religionis adest induita, velo autem professorum excepto.

### LITURGIA VERBI

33. In liturgia verbi omnia fiunt more solito, præter hæc :

a) lectiones, diebus quibus permittitur, vel e "Missa diei" vel e Sacra Scriptura sumi possunt, ex illis quæ in peculiari lectionario (infra, in Appendix I) proponuntur;<sup>34</sup>

b) Symbolum dicitur, si rubricis liturgiæ diei præscribitur.

### PROFESSIONE RELIGIOSA

#### *Interrogatio*

34. Dicto Evangelio, chorus manet versus ad altare. Novitia professura venit in medium chori, ubi se prosternit.

Tunc Priorissa eius voluntatem exquirit dicens:

<sup>33</sup> Cf. «Intr. gen.», nn. 17-18.

<sup>34</sup> Cf. «Intr. gen.», n. 18.

Quid quæris?

Professura respondet:

Misericórdiam Dei et vestram.<sup>35</sup>

Priorissa subiungit:

Surge.

Tunc professura ad locum suum redit et omnes sedent.

### *Homilia seu allocutio*

35. His peractis, professura quoque sedet et habetur homilia sacerdotis, in qua opportune illustrantur tum lectiones biblicæ tum professionis religiosæ donum iuxta indolem vocationis et missionis Ordinis nostri atque munus vitæ contemplativæ ad electarum sanctificationem atque ad Ecclesiæ totiusque humanæ familiæ bonum.

### *Interrogationes*

36. Homilia expleta, Priorissa ad professuram conversa quærit:

Vis facere professiónem

secúndum Constitutiónes Moniálium Órdinis Prædicatórum?<sup>36</sup>

Professura surgens respondet:

Volo, cum adiutorio Dei et vestro.<sup>37</sup>

Priorissa:

Dóminus qui incépit, ipse perfíciat.<sup>38</sup>

---

<sup>35</sup> Cf. *I Const.*, d. I, c. 13.

<sup>36</sup> Cf. CMS, p. 11.

<sup>37</sup> Directorium XI, 9, p. 118.

<sup>38</sup> *I Const.*, d. I, c. 13.

Omnis:

Amen.

37. Vel, si placet, Priorissa voluntatem requirit professuræ, coram eastratis, interrogationibus quæ sequuntur vel istis similibus.

Priorissa:

Filia (Soror) dilectissima,  
quam aqua et Spíritus Deo sacrávit,  
vis novo professiónis religiósæ título  
árctius Christo et Ecclésiæ coniúngi?<sup>39</sup>

Professura :

Volo, cum adiutorio Dei et vestro.

Priorissa :

Vis perféctæ caritatis viam íngredi  
et, soli Deo vacans,  
"sanctæ prædicatióni" beáti Domíni  
oratióne et pæniténtia adsociári?<sup>40</sup>

Professura:

Volo, cum adiutorio Dei et vestro.

Priorissa:

Vis, ad vestígia Salvatóris nostri sequénda,<sup>41</sup>  
vitam commúnem unanímiter ágere,  
in consiliórum evangelicórum professióne fidélis,  
in stúdio veritatis fervens,  
corde ardénti Scriptúras méditans,

<sup>39</sup> Cf. LCM, n.19, § II.

<sup>40</sup> Cf. LCM, n. 1, *Const. fund.*, § I.

<sup>41</sup> Cf. *I Const.*, d. II, c. 31.

oratiōni instans, álacrem pænitētiam exércens,<sup>42</sup>  
ad Dei glóriam et tuam aliorúmque salútem?<sup>43</sup>

Professura:

Volo, cum adiutório Dei et vestro.

Tunc Priorissa eius voluntatem confirmat dicens:

Dóminus qui incépit, ipse perficiat.

Omnes:

Amen.

---

### *Professio religiosa*

38. Tunc Priorissa vadit ad sedem in presbyterio paratam. Novitia professura ante eam genuflectit et, positis manibus suis inter eiusdem manus ac libro Constitutionum superposito manibus utriusque, professionem facit intelligibili vocē proferendo verba professionis iuxta sequentem formulam Ordini propriam:

Ego soror N. N. fácio professiónem  
et promítto obœdiéntiam Deo  
et beátæ Maríæ et beáto Domínico  
et Magístro Órdinis Fratrum Prædicatórum  
et tibi soróri N. N. Prioríssæ huius monastérii N.  
et successóribus tuis  
(*vel*: tibi soróri N.N., Supprioríssæ in cápite  
huius monastérii N.,  
*vel*: tibi soróri N.N., delegátæ...,  
vice soróris N.N., Prioríssæ huius monastérii N.  
et successórum eius),  
secúndum régulam beáti Augustíni  
et Institutiōnes Moniálium Órdinis Prædicatórum,

---

<sup>42</sup> Cf. LCM, n. 1, *Const. fund.*, § V.

<sup>43</sup> Cf. LCO, n. 1, *Const. fund.*, § IV.

quod ero obœdiens tibi tuísque successóribus,  
ad triénnum (*vel*: ad annum).<sup>44</sup>

39. Nihil immutatur in formula professionis quando Ordo Magistro suo caret.<sup>45</sup>

### *Osculum pacis*

40. Emissa professione, tantummodo Priorissa sororem profitentem recipit ad osculum pacis, receptionis scilicet in Ordinem, quo vinculum oboedientiæ et communionis significatur.

### *Benedictio habitus et traditio veli*

41. Quibus peractis sacerdos vestes profitentis benedicit, iunctis manibus:

Orémus.

Deus, sanctitatis auctor et consummátor,  
qui renátas ex aqua et Spíritu Sancto  
ad vitæ christiánæ plenitúdinem  
et caritatis perfectiōnem vocas;  
hanc fámulam tuam propítius respice  
quam, Matre Misericórdiæ auxiliánte,  
novi hábitus dono  
in signum eius speciális protectiōnis,  
ad præparatiōnem evangélii pacis<sup>46</sup> locupletásti;  
et præsta ut Christi Fílli tui imágini confórmis efficiátur  
et huius vitæ cursu felíciter consummáto,  
redimita glória, in gáudium domus tuæ intráre mereátur.  
Per Christum Dóminum nostrum.<sup>47</sup>

r. Amen.

<sup>44</sup> Cf. LCM, n. 157, § I.

<sup>45</sup> LCM, n. 157, § II.

<sup>46</sup> Cf. Iordanus, n. 57.

<sup>47</sup> Cf. DB, n. 1218, p. 466.

Vel:

Dómine Iesu Christe,  
qui tégimen nostræ mortalitatis indúere dignátus es:  
obsecrámus imménsam largítatís tuæ abundántiam,  
ut hoc genus vestimentórum, quod sancti Patres  
ad innocéntiæ et sanctitatís indícium ferre sanxérunt,  
ita bene & dícere dignérís  
ut quæ hoc usa fúerit te indúere mereátur,  
qui vivis et regnas in sácula sáculórum.<sup>48</sup>

R. Amen.

42. Deinde sacerdos præscriptum velamen novum tradit professæ, dicens:

Áccipe velámen sacrum  
quo agnoscáris  
domus oratiónis<sup>49</sup> esse Dómino tuo  
et templum intercessiónis pro cunctis homínibus.

Professa respondet:

Amen.

Tunc Priorissa, adiuvante Magistra novitiarum, professam velamine tegit. Deinde sacerdos professam aqua benedicta aspergit.

Interea chorus cantat ant. *Veni, sponsa Christi* (AG, p. 89\*) vel *Pósuit signum* (COP, p. 13) vel alium cantum aptum.

\* \* \*

43. Deinde Priorissa, ubi mos est, nuper professæ librum Constitutio- num tradit, dicens:

---

<sup>48</sup> *Eccl. Off.*, f. 51r A; cf. PS, p. 157.

<sup>49</sup> Cf. *Lc* 19, 46.

Áccipe Constitutiōnes moniálium Órdinis Prædicatórum  
velut spéculum tuæ fidelitátis divinæ vocatiōni,  
ad vitam agéndam salutárem tibi, exemplárem homínibus,  
iucúndam ángelis, gratam Deo.<sup>50</sup>

Professa respondet:

Amen.

44. Si vero secundum consuetudines monasterii alia professionis insig-  
gnia tradenda sunt, hic tradantur silentio vel apta formula, decora sobrieta-  
te servata.

\* \* \*

### *Conclusio ritus professionis*

45. Cum monialis nuper professa ad locum suum redierit ibique stete-  
rit, Symbolum dicitur si rubricis liturgæ dici præscribitur. Ritus apte con-  
cluditur recitatione orationis universalis seu fidelium (cf. infra in Appendice  
II, nn. 62-65).

### DIMISSIO

46. Oratione post communionem expleta, sacerdos moniales et  
adstantes benedicit:

Dóminus vobíscum.

R. Et cum spíritu tuo.

Benedictio Dei omnipoténtis,  
Patris, et Fílli, ☩ et Spíritus Sancti,  
descéndat super vos et máneat semper.

R. Amen.

<sup>50</sup> Cf. LCM, n. 1, *Const. fund.*, § VI.

47. Altera benedictionis formula:

Deus Pater  
sua vos tueá tur grátia  
ut vestræ vocatio nis múnera  
fidéli ánimo persolvátis.

R. Amen.

Dóminus Iesus  
bonórum regni cælestis in Ecclésia  
testes vos fáciat.<sup>51</sup>

R. Amen.

Spíritus Sanctus  
fortíficet corda vestra  
et súggerat vobis omnem veritátem.

R. Amen.

Et benedictio Dei omnipoténtis,  
Patris, et Fílii, & et Spíritus Sancti,  
descéndat super vos et máneat semper.

R. Amen.

48. Deinde diaconus vel sacerdos moniales et adstantes dimitit  
dicens:

Ite, missa est.

R. Deo grátias.

49. Ritus concludi potest, sicut mos est pro quibusdam celebrationi-  
bus in Ordine, antiphona *Salve Regína* vel alio cantu; quo expleto, adstantes  
salutant monialem nuper professam secundum loci consuetudinem.

---

<sup>51</sup> LCM, n.152, § II.

## RITUS PROFESSIONIS SIMPLICIS EXTRA MISSAM PERAGENDUS

50. Quando ritus professionis simplicis extra Missam peragitur,<sup>52</sup> inseri potest in celebrationem verbi Dei, modo sequenti:

- a) post cantum aptum, fit interrogatio novitiae (n. 34);
- b) sequitur lectio verbi Dei, cui respondeatur cantu psalmi apti (cf. infra, in Appendice I). Fit deinde allocutio Priorissæ;
- c) postea ipse ritus professionis habetur: interrogationes (nn. 36-37), professionis formula (nn. 38-39), osculum pacis (n. 40), benedictio habitus (n. 41), traditio veli (n. 42) et, si mos est, symbolorum professionis (nn. 43-44);
- d) ritus concludi potest oratione universali (cf. infra, in Appendice II, nn. 62-65) — addita, si placet, *Oratione dominica* — et benedictione sollemni (n. 47).

51. Quando autem ritus intra Liturgiam Horarum peragitur (præser-tim Laudum vel Vesperarum), proceditur modo sequenti :

- a) post hymni cantum, fit interrogatio novitiae (n. 34);
- b) sequuntur psalmodia et lectio verbi Dei, quod seligi potest ex textibus in Lectionario præbitis (cf. infra, in Appendice I). Fit deinde allocutio Priorissæ;
- c) postea ipse ritus professionis habetur : interrogationes (nn. 36-37), professionis formula (nn. 38-39), osculum pacis (n. 40), benedictio habitus (n. 41), traditio veli (n. 42) et, si mos est, symbolorum professionis (nn. 43-44);
- d) canitur postea *Canticum Zachariæ* vel *Magnificat*;
- e) deinde dicitur oratio universalis seu fidelium (cf. infra, in Appendice II, nn. 62-65);
- f) ritus concluditur recitatione *Orationis dominicæ*, oratione finali et benedictione sollempni (n. 47).

---

<sup>52</sup> Cf. «Intr. gen.», n. 12.

### CAPUT III

## RITUS PROFESSIONIS SOLLEMNIS INTRA MISSAM PERAGENDUS

### DE MODO RECIPIENDI AD PROFESSIONEM

52. Professionis sollemnisi ritus, Familiae Dominicanæ sodalium populique concursu, in ecclesia monasterii intra Missam peropportune persolvitur. Fideles autem de die atque hora tempestive certiores fiant, quo frequentiores accurrere possint.

53. Ad professionis ritum peragendum, quo monialis Deo in perpetuum mancipatur, laudabiliter eligitur dies dominica aut sollemnitas Domino, beatæ Mariæ vel Sanctis, nostri Ordinis præsertim, dicata, servatis semper de iure servandis.

54. Ritus peragitur separatim a ceteris professionis ritibus.<sup>53</sup> Congrua autem sollemnitate celebretur, ut ritus natura postulat, decora tamen illa sobrietate servata, quæ Ordini nostro convenit.

55. Professio de more fit ad sedem; in presbyterio vel in choro omnia disponantur ut etiam alii fideles celebrationi convenienter possint adesse, attentis quidem generalibus Ecclesiæ legibus et particularibus adiunctis.

56. Ubi fieri potest, Missa concelebrata præferatur, cui pro opportunitate Frater Ordinis præsit.

57. Adhibetur "Missa de die" aut "Missa ritualis in die professionis perpetuæ", ad normam legum liturgicarum.<sup>54</sup>

58. Antequam ad professionem sollemnem monialis admittatur, denuo fiat ipsi, coram Consilio monasterii vel cœtu pro candidatæ

---

<sup>53</sup> Cf. OPR Pr., n. 8; OPR II, n. 44.

<sup>54</sup> Cf. «Intr. gen.», nn. 17-18.

admissione, "declaratio et protestatio"<sup>55</sup> circa vitæ religiosæ et legum Ordinis observantiam, ut in Appendice (V, n. 79) traditur, iis attentis quæ in iurisprudentia uniuscuiusque regionis cavitur.

59. De professione emissa adnotatio fiat in libro professionum et ab eadem professa atque a duabus testibus subscribatur,<sup>56</sup> numquam vero super altare.

### LITURGIA VERBI

60. In liturgia verbi omnia fiunt more solito, præter hæc :

a) lectiones, diebus quibus permittitur, vel e "Missa diei" vel e Sacra Scriptura sumi possunt, ex illis quæ in peculiari lectionario (infra, in Appendix I) proponuntur;<sup>57</sup>

b) Symbolum dicitur, si rubricis liturgiæ diei præscribitur.

### PROFESSIONIS RELIGIOSA

#### *Interrogatio*

61. Dicto Evangelio, chorus manet versus ad altare. Soror professura venit in medium chori, ubi se prosternit.

Tunc Priorissa professuram interrogat dicens:

Quid quæris?

Professura respondet:

Misericórdiam Dei et vestram.<sup>58</sup>

Priorissa subiungit:

Surge.

Tunc professura ad locum suum redit et omnes sedent.

<sup>55</sup> Cf. LCO, n. 174, §§ I-II et p. 229.

<sup>56</sup> LCM, n. 159.

<sup>57</sup> Cf. «Intr. gen.», n. 18.

<sup>58</sup> Cf. *I Const.*, d. I, c. 13.

*Homilia seu allocutio*

62. His peractis, fit homilia seu allocutio sacerdotis, in qua opportune illustratur donum vitæ contemplativæ, quam “sanctæ prædicationi” beatus Dominicus adsociavit.<sup>59</sup>

*Interrogationes*

63. Expleta homilia, Priorissa ad professuram conversa quærit:

Vis fácere professiónem sollémnem  
secúndum Constitutiónes Moniálium Órdinis Prædicatórum? <sup>60</sup>

Professura surgens respondet:

Volo, cum adiutorio Dei et vestro.<sup>61</sup>

Priorissa:

Dóminus qui incépit, ipse perfíciat.<sup>62</sup>

Omnes:

Amen.

---

64. Vel, si placet, Priorissa voluntatem requirit professuræ, coram ea stantis, interrogationibus quæ sequuntur vel istis similibus.

Priorissa:

Fília (Soror) dilectíssima,  
iam per baptísmum peccáto mórtua ac Dómino sacráta,  
vis sollémnis professiónis título  
árctius Christo et Ecclésiæ coniúngi?<sup>63</sup>

---

<sup>59</sup> Cf. LCM, n.1, *Const. fund.*, § I.

<sup>60</sup> Cf. CMS, p. 17.

<sup>61</sup> *Directorium XI*, 9, p. 118.

<sup>62</sup> *I Const.*, d. I, c. 13.

<sup>63</sup> Cf. LCM, n.19, § II.

Professura:

Volo, cum adiutorio Dei et vestro.

Priorissa:

Vis in caritatem Dei et proximi proficere<sup>64</sup>  
et membrum Christi veraciter esse  
temetipsam totaliter lucrificiendis animabus impendens,  
sicut Salvator omnium Dominus Jesus seipsum totum obtulit  
in nostram salutem?<sup>65</sup>

Professura:

Volo, cum adiutorio Dei et vestro.

Priorissa:

Vis professione sollēmni Ordini nostro cooptari  
ut, cum María Matre Iesu in oratione perseverans,  
plenitudinem Spíritus ardenter desideres,  
Deo totaliter consecrata  
ac univ ersae Ecclésiae novo modo devota,  
ad Christi beatitudinem prophétice nuntiandam  
et populum Dei arcana fecunditate dilatandum?<sup>66</sup>

Professura:

Volo, cum adiutorio Dei et vestro.

Tunc Priorissa eius voluntatem confirmat dicens:

Dominus qui incépit, ipse perficiat.

Omnes:

Amen.

<sup>64</sup> Cf. LCO, n. 1, *Const. fund.*, § III.

<sup>65</sup> Cf. LCM, n. 1, *Const. fund.*, § II.

<sup>66</sup> Cf. LCM, n. 1, *Const. fund.*, §§ IV et V.

*Supplicatio pro moniali professura*

65. Interrogationibus expletis, omnes pro supplicatione surgunt. Sacerdos stans, manibus iunctis, ad populum conversus dicit:

Orémus, fratres dilectíssimi,  
Deum Patrem omnipoténtem,  
ut super hanc fámulam,  
quam ad perféctam Christi sequélam vocávit,  
benedictiónis suæ grátiam cleménter effúndat  
eámque in sancto propósito  
benígna pietáte confírmet.

His dictis, omnes silentio orant vel Litaniæ sanctorum (App. IV, nn. 71-74) ad libitum habentur.

*Professio religiosa*

66. Deinde Priorissa vadit ad sedem in presbyterio paratam. Professura ante eam genuflectit et, positis manibus suis inter eiusdem manus ac libro Constitutionum superposito manibus utriusque, professionem facit intelligibili voce proferendo verba professionis iuxta sequentem formulam Ordini propriam:

Ego soror N. N. fácio professiónem  
et promítto obœdiéntiam Deo  
et beatæ Mariæ et beáto Domínico  
et Magístro Órdinis Fratrum Prædicatórum  
et tibi soróri N. N. Prioríssæ huius monastérii N.  
et successóribus tuis

(*vel*: tibi soróri N.N., Supprioríssæ in cápite  
huius monastérii N.,  
*vel*: tibi soróri N.N., delegátæ...,  
vice soróris N.N., Prioríssæ huius monastérii N.,  
et successórum eius),  
secúndum régulam beáti Augustíni  
et Institutiónes Moniálium Órdinis Prædicatórum,

quod ero obœdiens tibi tuísque successóribus,  
usque ad mortem.<sup>67</sup>

67. Nihil immutatur in formula professionis quando Ordo Magistro suo caret.<sup>68</sup>

*Osculum pacis et sollemnis benedictionis oratio*

68. Emissa professione, tantummodo Priorissa sororem profitentem recipit ad osculum pacis, receptionis scilicet in Ordinem, quo vinculum obœdientiæ et communionis significatur.

69. Tunc, nisi habenda sit sollemnis benedictionis oratio, sacerdos monialem nuper professam his vel similibus verbis monet:

Soror caríssima, per hanc professiónem sollémnem  
temetípsam tradidísti Deo eiúsque voluntáti:  
Deus ígitur per ministérium Ecclésiæ  
sibi ipse te consecrávit<sup>69</sup>  
ad præparatióne evangélii pacis,<sup>70</sup>  
ut própria sis heréditas eius  
idémque sit heréditas tua in ætérnum.

Vel, si placet, monialis nuper professa genua flectit et sacerdos, manibus super eam extensis, dicit benedictionis precem iuxta formularia in Appendix (IV, n. 77) posita.

*Benedictio et impositio veli*

70. Deinde sacerdos, ubi mos est, præscriptum velamen benedit, dicens:

Caput ómnium fidélium Deus, et totius córporis Salvátor,  
hoc operiméntum veláminis, .

<sup>67</sup> Cf. LCM, n. 167, § II.

<sup>68</sup> LCM, n. 157, § II.

<sup>69</sup> Vide supra, «Intr. gen.», n. 4.

<sup>70</sup> Cf. Iordanus, n. 57.

quod fámula tua propter tuum tuéque beatíssimæ Genitrícis  
semper Vírginis Maríæ amórem  
suo cápti impositúra est,  
tua déxtera bénedictio :  
et hoc, quod per illud mýstice datur intelligi,  
tua semper custódia  
córpore et ánimo incontamináto custódiat  
ut quando ad perpétuam sanctórum remuneratióne vénérerit,  
cum prudéntibus et ipsa virgínibus præparáta,  
te perducénte,  
ad perpétuæ felicitátis nuptias intráre mereátur.  
Per Christum Dóminum nostrum.<sup>71</sup>

R. Amen.

Deinde Priorissa professam velamine tegit, dum canitur resp. *Amo Christum* (CMS, p. 24) vel aliis cantus.

### *Conclusio ritus professionis*

71. Si vero secundum leges vel consuetudines monasterii quædam professionis insignia tradenda sunt, hic tradantur silentio vel apta formula, decora sobrietate servata.

72. Quibus expletis, professa redit ad locum suum, in chorum. Symbolum dicitur si rubricis liturgiæ diei præscribitur. Oratio fidelium (infra, in Appendice II, nn. 62-65) omittitur quando Litaniæ habitæ sunt.

### LITURGIA EUCHARISTICA

73. In Precibus eucharisticis, professæ oblatio secundum has formulas opportune commemoratur :

a) in Prece eucharistica I dicitur «Hanc ígitur» proprium:

---

<sup>71</sup> CMS, p. 23.

Hanc igitur oblationem servitutis nostrae,  
sed et famulæ tuæ,  
quam tibi in die eius professionis offérimus,  
quæsumus, Dómine,  
placatus accipe et propitiatus sanctifica;  
ut quæ, te largiente,  
hodie vitam suam tibi dicavit,  
in Fílii tui gloriioso advéntu  
æternæ Paschæ gáudio mereátur admitti.  
(Per Christum Dóminum nostrum).

b) in intercessionibus Precis eucharisticæ II, post verba «...univérso clero» additur:

Recordare quoque, Dómine, istius sororis,  
quæ hodie se tibi dicavit perpétuo servitio,  
et concéde ut intercessiónis templum  
atque domus orationis et laudis tuæ  
in perpétuum<sup>72</sup> exsistat.

c) in intercessionibus Precis eucharisticæ III, post verba «...pópulo acquisitiónis tuæ» additur:

Confortare quoque in sancto propó sito digneris  
hanc famulam tuam,  
quæ hodie sacris religiónis vínculis  
perpétuo tibi se devínxit,  
et fac ut in Ecclésia tua  
novam et æternam vitam maniféstet  
Christi redemptiōne comparátam.

d) intercessionibus Precis eucharisticæ IV, post verba «... sed et totius cleri» additur:

<sup>72</sup> Cf. MLOP, p. 254.

... et istius sororis, quae professione sollēmni  
hōdie tibi árctius consecrátur,  
et offeréntium  
et circum adstántium ...

74. Postquam sacerdos Eucharistiam sumpsit, etiam omnes adstantes  
eam sub utraque specie sumere possunt.

#### CONCLUSIO RITUS

75. Oratione post communionem expleta, ritus concluditur benedictione sacerdotis super monialem nuper professam et super omnes adstantes:

Deus, tanti óperis auctor et custos,  
supérna sua te tueártur grátia  
ut tuæ vocatiónis múnera  
fidéli ánimo persólvas.

R. Amen.

Ipse divinæ te fáciat caritatis  
coram ómnibus testimónium et signum,  
ut pópulus Dei prompta respóndeat actuositatē.

R. Amen.

Divini sui Spíritus advocántis grátia  
cor tuum efficáciter fecúndet  
pro Ecclésiae et humánæ familiæ proféctu.

R. Amen.

Et vos omnes, qui his sacris adéstis,  
benedícat omnípotens Deus,  
Pater, et Filius, ☩ et Spíritus Sanctus.

R. Amen.

76. Deinde diaconus vel sacerdos moniales et adstantes dimittit dicens:

Ite, missa est.

R. Deo grátias.

77. Tunc adstantes monialem nuper professam salutant, secundum loci consuetudinem, dum canitur antiphona :

Ecce quam bonum et quam iucúndum  
habitáre fratres in unum.

cum Psalmo 132, vel alias congruus cantus.

## CAPUT IV

### RITUS RENOVATIONIS VOTORUM TEMPORARIORUM INTRA MISSAM PERAGENDUS

78. Hoc capite describitur ritus qui adhibetur cum renovatio votorum, quæ ex Constitutionum<sup>73</sup> præscripto fit, intra Missam peragitur, maxima tamen sobrietate servata. Si autem renovatio votorum fit extra Missam, professio sine ritu peculiari coram duabus testibus renovetur.

79. Adhibetur "Missa diei" aut "Missa ritualis in die renovationis votorum", ad normam legum liturgicarum.<sup>74</sup>

80. De professione emissa adnotatio fiat in libro professionum et ab eadem professa atque a duabus testibus subscribatur,<sup>75</sup> numquam vero super altare.

#### LITURGIA VERBI

81. In liturgia verbi, diebus quibus permittitur, lectiones vel e "Missa diei" vel e Sacra Scriptura sumi possunt, ex illis quæ in peculiari lectionario (infra, in Appendice I) proponuntur.<sup>76</sup>

82. Post Evangelium fit homilia, in qua tum lectiones biblicæ tum vis et virtus vitæ religiosæ contemplativæ in Ordine nostro commemorantur.

#### VOTORUM RENOVATIO

##### *Divinæ gratiæ expostulatio*

83. Homilia expleta, sacerdos divinum auxilium exposcere potest, dicens:

<sup>73</sup> LCM, n.155, § I.

<sup>74</sup> Cf. «Intr. gen.», nn.17-18; *Missale Romanum*, 1975<sup>2</sup>, p. 773.

<sup>75</sup> LCM, n. 159.

<sup>76</sup> Cf. «Intr. gen.», n. 18.

Orémus Deum Patrem,  
perseverántis consílīi largítórem,  
pro hac fámula eius,  
quæ hódie coram Ecclésia  
vota sua renováre inténdit.

Omnes per aliquod temporis spatiū silentio orant. Deinde sacerdos dicit:

Réspice, quæsumus Dómine,  
super hanc fámulam tuam,  
quam ad Fílii tui préssius sectánda vestígia  
providénti vocásti consílio;  
et miserátus concéde  
ut iter amóris tui,  
quod álacris est aggréssa,  
perseveránti caritáte confíciat.  
Per Christum Dóminum nostrum,

*R.* Amen.

### *Renovatio professionis*

84. Oratione expleta, Priorissa vadit ad sedem in presbyterio paratam. Professura ante eam genuflectit et, positis manibus suis inter eiusdem manus ac libro Constitutionum superposito manibus utriusque, professio-nem renovat intelligibili voce proferendo verba professionis iuxta sequen-tem formulam Ordini propriam:

Ego soror *N. N.* rénovo professióinem  
et promítto oboediéntiam Deo  
et beátæ Mariæ et beáto Domínico  
et Magístro Órdinis Fratrum Prædicatórum  
et tibi soróri *N. N.* Prioríssæ huius monastérii *N.*  
et successóribus tuis  
(*vel*: tibi soróri *N.N.*, Supprioríssæ in cápite  
huius monastérii *N.*,  
*vel*: tibi soróri *N.N.*, delegátæ...,  
vice soróris *N.N.*, Prioríssæ huius monastérii *N.*,  
et successórum eius),

secundum régulam beáti Augustíni  
et Institutiónes Moniálium Ordinis Prædicatórum,  
quod ero oboédiens tibi tuísque successóribus,  
ad triénnum (*vel*: ad annum).<sup>77</sup>

85. Nihil immutatur in formula professionis quando Ordo Magistro suo caret.<sup>78</sup>

#### CONCLUSIO RITUS

86. Renovata professione, tantummodo Priorissa sororem profitentem recipit ad osculum pacis, receptionis scilicet in Ordinem, quo vinculum obœdientiæ et communionis significatur.

87. Symbolum dicitur si rubricis liturgiæ diei præscribitur. Oratio universalis seu fidelium (infra, in Appendice II, nn. 62-65) fit modo in celebrationibus liturgicis consueto.

---

<sup>77</sup> Cf. LCM, n. 157, § I.

<sup>78</sup> LCM, n. 157, § II.

## CAPUT V

### MISSA IN XXV VEL L ANNIVERSARIO PROFESSIONIS

88. In xxv vel l anniversario professionis religiosæ peculiaris celebra-tio, quamvis non habeatur in traditione Ordinis, causa pietatis necnon et pastoralis actionis haberi potest, cum professionis confirmatione intra Mis-sam.<sup>79</sup>

89. Missa<sup>80</sup> dici potest, cum vestibus coloris albi, diebus quibus Missæ "pro variis necessitatibus" celebrari possunt, ad normam legum liturgica-rum.

Post homiliam professio publice confirmari potest, ritu renovationis votorum adhibito (supra, nn. 83-87), formula autem sequenti :

Ego soror N. N. totáliter adháereo professióni a me factæ  
et promítto obcedientiam Deo  
et beátæ Mariæ et beátō Domínico  
et Magístro Órdinis Fratrum Prædicatórum  
et tibi soróri N.N., Priorissæ huius monastérii N.,  
et successóribus tuis,  
secúndum régulam beáti Augustíni  
et Institutiónes Moniálium Órdinis Prædicatórum,  
grátiam Dei implórans  
qua fidéliter professióнем meam adimplére possim  
usque ad mortem.

90. Pro Missæ celebratione formularium aptum hic apponitur.

*Ant. ad introitum*

*Ps 39, 8-9*

Ecce vénio, Dómine, fácere voluntátem tuam.  
Deus meus, vólui, et lex tua in præcórdiis meis.

<sup>79</sup> Cf. «Intr. gen.», n. 15; OPR *Pr.*, n. 7.

<sup>80</sup> Cf. *Missale Romanum*, 1975<sup>2</sup>, p. 774.

*Collecta*

Dómine, Deus fidélis,  
da nobis, quásumus, grátias tibi reférre  
pro tua erga sorórem nostram *N.* benignitáte,  
quæ accéptum a te donum  
hódie confirmáre inténdit.  
Róbora in ea spíritum perféctæ caritatis,  
ut glóriæ tuæ et 'sanctæ prædicatióni'  
patris nostri Domínici<sup>81</sup>  
in dies váleat fervéntius inservíre.  
Per Dóminum.

*Super oblata*

Súscipe, Dómine,  
una cum munéribus oblationem sui,  
quam hódie soror nostra *N.* confirmáre desíderat,  
et per virtútem Sancti Spíritus  
imágini dilécti Fílli tui  
ámplius eam conformáre dignérис.  
Qui vivit et regnat.

Præfatio propria (cf. infra, in Appendix III).

*Ant. ad communionem**Col 3,3*

Vita vestra est abscónrita cum Christo in Deo.  
Cum Christus apparúerit, vita vestra,  
tunc et vos apparébitis cum ipso in glória.

*Vel, in cantu:**Ps 19,6*

Lætábimur in salutári tuo  
et in nōmine Dómini Dei nostri magnificábimur.

---

<sup>81</sup> Cf. LCM, n. 1, *Const. fund.*, § I.

*Post communionem*

Súmpsimus, Dómine, Corpus et Ságuinem Fílii tui,  
quæ in iucúnda celebratióne huius anniversárii contulísti;  
concéde, quæsumus, ut soror nostra *N.*,  
cælesti pane potúque refécta,  
incépti itíneris ad te ducéntis  
felícem progréssum obtíneat.  
Per Christum.

In fine Missæ opportune canitur resp. *O spem miram* (AG, p. 871) vel  
*Média vita* (AG, p. 106) vel *Dómine Deus* (GOP, p. 356; GR, p. 401) vel alius  
cantus aptus.



ADNEXUM

ORDO  
RECEPTIONIS ET PROFESSIONIS  
IN INSTITUTIS VITÆ CONSECRATÆ

Hæc sectio *Ritualis professionis* Institutis vitæ consecratæ modo cuique proprio Ordini Prædicatorum aggregatis proponitur, qui ipsam paravit et approbavit ut in eorum aptationibus conficiendis adhiberi possit «ad unitatem liturgiæ Ordinis universi fovendam» (ACG 1971, n. 172), ut ipse Magister Ordinis animadvertisit in Litteris promulgationis (supra, p. 10). Præsens autem textus nondum a Congregatione pro Cultu Divino confirmatus est, eo quod confirmatio impetrabitur simul ac elementa propria a singulis Institutis subiciuntur, iuxta Rituale ab Ordine præbitum parata.

## PRO<sup>O</sup>EMIUM

1. RITUALE ORDINIS PRÆDICATORUM, quod præbetur etiam Congregationibus religiosis necnon Societatibus Vitæ Apostolicæ et Institutis Sæcularibus quæ omnia Ordini nostro sint aggregata, ab uno quoque Instituto quod ipsum assumere cupiat aptari oportet iuxta legitimas consuetudines, quæ peculiari cuiusque charismati respondent.<sup>1</sup>

Itaque elementa propria, lingua officiali Instituti exarata, iuxta indicationes in "Introductione generali" Ritualis Ordinis præbitas<sup>2</sup> vertantur, pro diversis locis in quibus Institutum est præsens, iuxta textum vernaculum a competenti Commissione liturgica Ordinis paratum, atque ab auctoritatibus Ordinis et a Sede Apostolica more solito approbentur seu confirmentur.

2. Hic infra pro mulieribus formularia præbentur, ad Instituta virorum — cum usus aderit — aptanda.

In aptationibus ab Institutis Sæcularibus et Societatibus Vitæ Apostolicæ paratis, peculiaris cura adhibeatur pro specificis locutio- nibus aptandis, iuxta *Codicem Iuris Canonici* atque Regulam propriam.

3. In Ordine duplex fit professio : prima simplex et temporaria post novitiatum, altera vero sollemnis et exinde perpetua.<sup>3</sup>.

Duplex igitur habetur ritus recipiendi ad professionem:

- ritus professionis temporariæ;
- ritus professionis perpetuæ.

Qui quidem ritus ita distinguantur oportet ut "discrimen liturgi- cum" inter professionem perpetuam et professionem temporariam accurate servetur.<sup>4</sup>

4. Professio autem emittitur sub unica formula, temporis tan- tum indicatione mutata. Illa vero professionis formula adhibetur quæ, formulæ Ordini nostro propriæ<sup>5</sup> conformata, a Constitutionibus præscribitur.

<sup>1</sup> Cf. OPR Pr., n. 14.

<sup>2</sup> Vide supra, «Intr. gen.», nn. 19-23.

<sup>3</sup> LCO, n. 190; cf. supra, «Intr. gen.», nn. 9.12.13.

<sup>4</sup> OPR Pr., n. 14, c.

<sup>5</sup> Cf. supra, «Intr. gen.», n. 7.

## CAPUT I

### RITUS RECEPTIONIS NOVITIARUM

#### DE MODO RECIPIENDI NOVITIAS IN CONGREGATIONEM VEL INSTITUTUM

5. Ex antiqua consuetudine,<sup>6</sup> novitiorum receptio in Ordinem traditione habitus perficitur tamquam verus admissionis ritus; ideoque ritualis "vestitio" initio novitiatus<sup>7</sup> perficienda collocatur, utpote "signum receptionis" in Ordinem, nondum vero "consecrationis", quæ per professionem habetur.<sup>8</sup>

Ubi autem habitus tantum in die primæ professionis suscipiatur,<sup>9</sup> in receptione novitiarum habitus traditio (nn.19-20) omittitur.

Pro Institutis vero in quibus, e Constitutionum præscriptione, habitu religionis sodales non utuntur, ipse ritus admissionis alio modo exprimit receptionem novitiarum, congrua ad hunc peculiarem ritum accommodatione servata, præsertim circa orationum textus et "signa" tradenda.

6. Antequam novitiatus incipiat, postulantes exercitia spiritualia saltem per quinque integros dies convenienter peragunt.<sup>10</sup>

Ubi mos est, fiat postulantibus, coram Consilio conventus vel cœtu pro candidatarum admissione, "declaratio et protestatio"<sup>11</sup> circa vitæ religiosæ et legum Instituti observantiam, ut infra in Appendice (V, n. 79), iis attentis quæ in iurisprudentia uniuscuiusque regionis caventur.

7. Die quo novitiatus canonicus incipit ritum peragere præstat, qui sua ipsius natura peragi debet extra Missam,<sup>12</sup> separatim quoque a professionis ritibus. Coniungi vero potest celebrationi alicuius par-

<sup>6</sup> Cf. *I Const.*, d. I, c. 14; *Directorium XII*, pp.116-118; *Humbertus II*, pp. 525-527.

<sup>7</sup> Vide supra, «Intr. gen.», adn. 44.

<sup>8</sup> Vide supra, «Intr. gen.», n. 7.

<sup>9</sup> Cf. *LCM*, n. 140, § II.

<sup>10</sup> Cf. *LCO*, n. 178, § I.

<sup>11</sup> Cf. *LCO*, n. 174, §§ I-II et p. 229.

<sup>12</sup> Cf. *OPR Pr.*, n. 12

tis Liturgiæ Horarum — Laudum præcipue aut Vesperarum — vel peculiari verbi Dei celebrationi, quæ naturam vitæ religiosæ et indolem propriam Instituti illustret.

8. Ritus sit admodum simplex, sobrius, sororibus præsertim reservatus.<sup>13</sup> Ad ipsum ritum peragendum aula capitularis vel alias similis locus vel etiam sacellum deligi potest.

9. Ritui præest, iuxta Constitutiones vel Statuta propria, Priorissa generalis vel eius delegata,<sup>14</sup> hic infra nomine "Priorissæ" indicata.

10. Novitiatus incipit intimatione facta a Priorissa vel ab eius delegata, quæ candidatas ad novitiatum admittit iuxta normas in propriis Institutionibus statutas.

De hac intimatione fiat registratio, a novitia et a duabus testibus subscripta, in libro admissionum.<sup>15</sup>

## RITUS INITIALES

11. Ritus opportune incipit salutatione Priorissæ quæ pro opportunitate — scilicet, si prævia quædam ritus explicatio non est habita — poterit paucis verbis, monitionis instar, sensum celebrationis adstantibus explana-re. Sequitur cantus *Veni Cœrātor* aliasve hymnus.

Si intra Laudes aut Vespertas ritus peragitur, quæ sequuntur fiunt post psalmodiam.

### *Interrogatio vel postulatio*

12. Deinde Magistra novitiarum, vel alia soror quæ candidatas comita-ta sit in itinere vocationali seu in postulatus decursu, postulantes dicit in medium capituli, ubi se prosternunt, si convenienter fiat, vel genua flectunt vel se profunde inclinant.

<sup>13</sup> Vide supra, «Intr. gen.», n. 11.

<sup>14</sup> Cf. LCO, n. 175.

<sup>15</sup> Cf. LCO, n. 178, § II.

Tunc Priorissa postulantum voluntatem exquirit dicens:

Quid quæritis?

Et postulantes omnes simul respondent :

Misericórdiam Dei et vestram.<sup>16</sup>

13. Vel, si placet, omissa interrogatione et absque prostratione, una ex postulantibus pro omnibus — vel omnes simul — ad Priorissam et communitatem conversa postulationem facere potest his vel similibus verbis:

Misericórdia Dei compúlsae,  
huc vénimus ad conversatióñem experiéndam vestram;  
docéte nos, rogámus, Christum crucifíxum sequi,  
obœdiéntes, castas pauperésque vivere,  
oratióni instáre, pæniténtiam exercére,  
Ecclésiæ cunctísque homínibus deservíre,  
vobíscum cor unum esse et ánimam unam.  
Adiuváte nos ut Evangélii præcépta  
omni vitæ hora explicémus,  
Régulam vestram discámus  
legémque fratérnæ dilectionis servémus.

Quibus dictis, omnes postulantes se prosternunt, si convenienter fiat, vel genua flectunt vel se profunde inclinant.

\* \* \*

14. Tunc Priorissa pro opportunitate adstantes ad orationem invitat, his vel similibus verbis:

Orémus pro istis soróribus nostris  
quæ in Institutum nostrum récipi petunt,  
ut divínus Magíster ipsis tríbuat  
abundántiam sui Spíritus et suæ pacis solácium.

Omnes per aliquod temporis spatiū silentio orant.

\* \* \*

<sup>16</sup> Cf. *I Const.*, d. I, c. 13.

15. Deinde Priorissa dicit:

Deus, sanctæ vocatiónis largítor,  
 qui ut viri evangélici<sup>17</sup> exémplum  
 beátum Domínicum Ecclésiæ donásti,  
 famulárum tuárum *N.* et *N.* supplicatiónes benígnus exáudi,  
 quæ, ut tibi perféctius desérviant,  
 nostræ petunt aggregári familiæ;  
 et concéde propítios,  
 ut commúnis vita in mútuam dilectionem convertátur.  
 Per Christum Dóminum nostrum.

R. Amen.

Priorissa subiungit:

Leváte.

Tunc candidatæ ad locum suum redeunt.

#### VERBI DEI CELEBRATIO

16. Deinde leguntur sacrarum Scripturarum textus apti, qui novitatem vitæ per baptismum acceptam memorent, ad indicandum nexum vitæ religiosæ cum baptisme aliisque initiationis christianæ vitæ sacramentis, congruentibus interiectis responsoriis (infra, in Appendice I). Addi possunt etiam aliæ aptæ lectiones vel ex Ecclesiæ aut Ordinis et proprii Instituti documentis vel e sanctis Patribus.

17. Quibus peractis, præ oculis habens Scripturarum lectiones, Priorissa communitatem sororum et postulantes adloquitur de vitæ religiosæ vel consecrationis natura atque de Ordinis et proprii Instituti charismate, eiusdem præcipuas exigentias et austeritates<sup>18</sup> illustrans.

---

<sup>17</sup> Iordanus, n. 104.

<sup>18</sup> Cf. PS, pp. 149-153.

RECEPTIO POSTULANTIIUM

*Interrogationes*

18. Deinde, in fine sermonis, Priorissa invitat postulantes ad surgedum et voluntatem earum requirit, his vel similibus verbis, unam vel plures interrogationes seligens:

Vultis, firma intentiōne,  
in novitāte vitæ fidéliter ambuláre?

Postulantes omnes simul respondent:

Volo, cum adiutório Dei et vestro.<sup>19</sup>

Priorissa:

Vultis Dóminum Iesum sequi  
secúndum beáti Domíni evangélicum propósitum?

Postulantes:

Volo, cum adiutório Dei et vestro.

Priorissa:

Vultis ergo in nostram récipi familiam,  
ad conversatiōnem nostram experiéndam  
in perfécta regulári observántia?

Postulantes:

Volo, cum adiutório Dei et vestro.

Tunc Priorissa earum voluntatem confirmat dicens:

Dóminus qui incépit, ipse perficiat.<sup>20</sup>

Et adstantes respondent:

Amen.

---

<sup>19</sup> Directorium XI, 9, p. 118.

<sup>20</sup> I Const., d. I, c. 13.

### *Vestitio seu traditio habitus*

19. Tunc Magistra novitiarum vel alia soror (cf. n. 12) unamquamque candidatarum dicit ad Priorissam et facit genuflectere coram ea; et vestaria portans vestes præparatas, eas Priorissæ porrigit; Priorissa adiuvante Magistra novitiarum vel alia sorore, loco apto eas induit habitu Instituti novitiis proprio, nisi aliud in Constitutionibus caveatur.<sup>21</sup>

Vestitione peracta, Priorissa unamquamque novitiarum recipit ad osculum pacis, utpote signum receptionis in Institutum et admissionis in fraternitatem communitatis.

Dum novitiæ induuntur, omnibus genua flectentibus canitur hymnus *Veni Cœrātor*,<sup>22</sup> nisi prius cantatus fuerit, aut chorus canit antiphonam *Immutémur hábitu* (MLOP, p. 6) cum psalmo 39 (*Exspectans exspectávi Dóminum*), vel alium congruum cantum.

---

20. Vel, si talis est consuetudo Congregationis, Priorissa candidatis habitum novitiarum tradit aliqua parte novitiatus expleta,<sup>23</sup> congrua vero celebratione disposita.

Quo in ritu, Magistra novitiarum vel alia soror (cf. n. 12) unamquamque candidatarum dicit ad Priorissam et facit genuflectere coram ea, quæ habitu unamquamque induit vel ipsi in manus eum tradit, dicens:

Præstet tibi Dóminus  
véterem hóminem exúere, cum áctibus suis,  
et novum indúere hóminem, qui secúndum Deum creátus est,  
in iustitia et sanctitáte veritatis.<sup>24</sup>

Quo facto, Priorissa unamquamque novitiarum recipit ad osculum pacis, utpote signum receptionis in Institutum et admissionis in fraternitatem communitatis.

---

21. Tunc, si ritus in aula capitulari fuerit peractus, communitas egredi potest processionaliter ad ecclesiam, iunioribus præcedentibus, Magistra novitiarum vel alia sorore ducente novitias usque ad gradum altaris.

In processione canitur hymnus vel psalmus aptus, vel *Canticum Zacharīæ* aut *Magnificat* si ritus intra Laudes aut Vesperas peragitur.

<sup>21</sup> Cf. supra, n.5.

<sup>22</sup> Cf. COP, p.123, n.486.

<sup>23</sup> Cf. supra, «Intr. gen.», adn. 44.

<sup>24</sup> Cf. *Eph* 4,24.

*Oratio universalis*

22. Deinde fieri potest oratio universalis, modo in celebrationibus con-suetu*m*, iuxta formularium quod in Appendix (II, nn. 62-65) affertur.

Si autem ritus cum Laudibus vel Vespere*s* uniatur, oratio universalis fit iuxta formularium precum Liturgiæ Horarum, invocationem pro novitiis inserendo.

Petitionibus expletis dicitur *Oratio dominica*.

*Receptio fraternal et intimatio novitiatus*

23. Postea novitiæ eant dando pacem unicuique sororum, dum canitur ps. 132 *Ecce quam bonum vel ant. Ubi caritas vel ant. O spem miram vel* aliud cantus congruus.

24. Quibus expletis, Magistra novitias iterum ad Priorissam dicit, quæ eis — si opportunum videtur — aliud nomen, christianum scilicet, addere potest, unicuique dicens:

Ex baptismo est nomen tuum *N.*,  
in Institutu*m* nostro vocáberis soror *N.* *N.*<sup>25</sup>

Deinde Priorissa intimatione<sup>26</sup> anni canonici novitiatus tempus probatio*n*is assignat novitiasque curæ Magistræ tradit, eas monens his vel simili-bus verbis:

Ecce, filiæ, vos recepistis misericordiam Dei et nostram  
iam ex parte,  
quia dédimus vobis hábitum nostrum ad probatióne*m*:  
restat vobis facere professióne*m*,  
ut ipsam misericordiam nostram possítis habére compléte.  
Et quia forte mores Religiónis non placébunt vobis,  
aut mores vestri non placébunt nobis,  
ideo auctorité Ecclésiæ et Instituti  
vobis concédo unum annum,  
ut vos possítis probáre mores nostros et nos mores vestros.  
Et si vobis placébit nobiscum vívere  
et nobis placébit conversátio vestra,

<sup>25</sup> Cf. PS, p. 155.

<sup>26</sup> Cf. LCO, n. 178, § II.

recipiémus vos ad professióнем:  
 alias et nos et vos érimus in libertáte.  
 Conámini ergo iugum hoc pro amóre Dei libénter ferre  
 et Magístræ vestræ in ómnibus obœdíre tamquam mihi.<sup>27</sup>

Vel:

Iura volunt quod ingrediéntibus nostrum Institutúum,  
 tempus probatiónis, annus vidélicet, assignétur.  
 Et ego — auctorátate offícií quo fungor —  
 unum annum vobis pro témpore probatiónis assígno,  
 sub ductu soróris *N. N.* percurréndum,  
 quæ vos de Institutúo nostro docébit.  
 Infra hoc tempus, soróres probábunt mores vestros  
 et vos probábitis vires vestras  
 ad austérítátes Institutúi eiúsque múnera sustinénda.  
 Quo anno elápso, potéritis,  
 si vobis et soróribus placúerit,  
 per professióñem Institutúo obligári;  
 sin autem, potéritis de vobis, prout vidébitur, ordináre.<sup>28</sup>

25. Si vero secundum leges vel consuetudines Instituti novitiis librum  
 Constitutionum vel insignia quædam tradi placet, hic tradantur silentio vel  
 apta formula, decora sobrietate servata.

#### CONCLUSIO RITUS

26. His omnibus peractis, Priorissa adstantes ad orationem invitat,  
 dicens:

Imitémur, soróres, ut póssumus,  
 sancti patris Domínici vestígia,  
 simul et agámus grátias Redemptóri  
 qui talem in via hac, qua ambulámus,  
 ducem exhibuit servis suis,

<sup>27</sup> Cf. PS, p. 155.

<sup>28</sup> Directorium XI, 8, p. 118; cf. I Const., d. I, c. 13.

per eum nos in huius conversatiōnis lucem regēnerans;  
et deprecēmur misericordiārum Patrem,  
ut illo nos regénte Spíritu, quo filii Dei agūntur,  
per térmilos quos posuérunt patres nostri  
ad eándem metam  
perpétuæ felicitat̄is et sempitérnæ beatitúdinis,  
ad quam ille sine fine felix introívit,  
nos quoque indefléxo trámite pertíngere mereámur.<sup>29</sup>

Orémus.

Omnes per aliquod temporis spatiū silentio orant; deinde Priorissa prosequitur:

Da nobis, quæsumus Dómine,  
perseverántem in tua voluntáte famulátum,  
ut in diébus nostris  
et mérito et número, família tibi sérviens augeátur.  
Per Christum Dóminum nostrum.<sup>30</sup>

R. Amen.

¶ Adiutorium nostrum in nōmine Dómini.

R. Qui fecit cælum et terram.

27. Ritus concludi potest, sicut mos est pro quibusdam celebrationib⁹ in Ordine, antiphona *Salve Regína* vel alio cantu; quo expleto, adstantes salutant novitias secundum loci consuetudinem.

---

<sup>29</sup> Cf. Iordanus, n. 109.

<sup>30</sup> Cf. MOP, p. [67].

## CAPUT II

### RITUS PROFESSIONIS TEMPORARIAE

#### DE MODO RECIPIENDI AD PROFESSIONEM

28. Ritus professionis, ex Ordinis consuetudine,<sup>31</sup> in aula capitulari vel in choro peragitur; rationabili vero de causa in ecclesia fieri potest, sive in connexione cum aliqua divini Officii Hora sive intra Missam,<sup>32</sup> iuxta hodiernam consuetudinem.

29. Ritus ordinarie peragitur in domo Instituti et coram communitate. In casibus autem exceptionalibus, de consensu Priorissæ generalis vel provincialis, fieri potest extra domum Instituti.<sup>33</sup>

Professio recipitur a Priorissa generali vel provinciali vel ab eius delegata, hic infra nomine "Priorissæ" indicata.

30. Ubi mos est, antequam ad primam professionem novitiae admittantur denuo fiat ipsis, coram Consilio conventus vel cœtu pro earum admissione, "declaratio et protestatio"<sup>34</sup> circa vitæ religiosæ et legum Instituti observantiam, ut in Appendice (V, n. 79) traditur, iis attentis quæ in iurisprudentia uniuscuiusque regionis carentur.

31. De professione emissâ adnotatio fiat in libro professionum et ab eadem professa atque a duabus testibus subscribatur,<sup>35</sup> numquam vero super altare.

32. In hoc Rituali illi professionis ritus præbentur qui intra Missam peraguntur. Quando autem extra Missam professio emittitur vel renovatur, ritus est pro opportunitate aptandus, congruis elementis selectis, ut infra, nn. 58-59.

<sup>31</sup> Cf. supra, «Intr. gen.», n. 7.

<sup>32</sup> Cf. OPR Pr., n. 13; OPR II, n. 14.

<sup>33</sup> Cf. LHOP, *Adnot. compl.*, n. 36, p. 19.

<sup>34</sup> Cf. LCO, n. 174, §§ I-II et p. 229.

<sup>35</sup> LCO, n. 194.

**RITUS PROFESSIONIS TEMPORARIÆ  
INTRAMISSAM PERAGENDUS****IN VIGILIA PROFESSIONIS**

33. Sicubi religionis habitus ab habitu novitiarum differt non solum quoad velum, novitiis, quæ ad primam professionem admittuntur, pridie professionis vestis religiosa, velo professarum excepto, convenienter traditur.

34. Hora constituta, Priorissa sorores communitatis ac novitias convocat et brevi sermone omnium mentes disponit ad professionis ritum die insequenti peragendum. Deinde singulis novitiis habitum tradit, velo professarum excepto.

**IN DIE PROFESSIONIS**

35. Quando ritus professionis in ecclesia persolvitur, professio de more fit ad sedem. In presbyterio omnia disponantur ut tota actio liturgica a fidelibus conspici possit.

36. Adhibetur "Missa de die" aut "Missa ritualis in die primæ professionis religiosæ", ad normam legum liturgicarum.<sup>36</sup> Eucharistia opportune a Fratre Ordinis celebratur.

**RITUS INITIALES**

37. Celebratio opportune incipit cantu introitus cum processione ingressus ad altare, cui laudabiliter intersunt, comitante Magistra novitiarum, sorores professuræ habitu religionis indutæ, velo professarum excepto.

Cum ad presbyterium pervenerint, facta altari debita reverentia, omnes locis sibi designatis se disponunt; tum actio liturgica prosequitur.

---

<sup>36</sup> Cf. «Intr. gen.», nn.17-18.

## LITURGIA VERBI

38. In liturgia verbi omnia fiunt more solito, præter hæc :
- lectiones, diebus quibus permittitur, vel e "Missa diei" vel e Sacra Scriptura sumi possunt, ex illis quæ in peculiari lectionario (infra, in Appendix I) proponuntur;<sup>37</sup>
  - Symbolum dicitur, si rubricis liturgiæ diei præscribitur.

## PROFESSIO RELIGIOSA VEL PROMISSIO

*Interrogatio vel postulatio*

39. Dicto Evangelio, Magistra novitiarum professuras dicit in medium ante Priorissam, ubi se prosternunt, si convenienter fiat, vel genua flectunt vel se profunde inclinant. Tunc Priorissa novitas interrogat dicens :

**Quid quæritis?**

Cui omnes simul respondent:

Misericordiam Dei et vestram.<sup>38</sup>

---

40. Vel, si placet, omissa interrogatione et absque prostratione, una ex professuris pro omnibus — vel omnes simul — ad Priorissam et communatem conversa postulationem facere potest his vel similibus verbis:

Nos, N. et N., cum misericordia Dei  
vestram novérimus Régulam  
et fraterne vobiscum probatiónis degérimus tempus,  
felíci experientia edóctæ  
a te, N., humíliter pósdimus  
ut Deo eiúsque Regno nos devoveámus  
sanctam professióñem in hac família emitténtes.

<sup>37</sup> Cf. «Intr. gen.», n. 18.

<sup>38</sup> Cf. *I Const.*, d. I, c. 13.

Quibus dictis, omnes candidatæ se prosternunt, si convenienter fiat, vel genua flectunt vel se profunde inclinant. Priorissa et omnes adstantes respondent:

Deo grátias.

vel alio apto modo.

---

Priorissa subiungit:

Leváte.

Tunc professuræ ad locum suum redeunt et omnes sedent.

### *Homilia seu allocutio*

41. In homilia seu allocutione sacerdotis, opportune illustrantur tum lectiones biblicæ tum professionis religiosæ vel promissionis donum iuxta indolem vocationis et missionis Instituti atque munus ad electarum sanctificationem atque ad Ecclesiæ totiusque humanæ familiæ bonum.

### *Interrogationes*

42. Homilia sacerdotis expleta, Priorissa ad professuras conversa quærit:

Vultis fácere professiónem  
secúndum Constitutiónes huius Institutí? <sup>39</sup>

Professuræ surgentes simul respondent:

Volo, cum adiutorio Dei et vestro.<sup>40</sup>

Priorissa:

---

<sup>39</sup> Cf. CMS, p. 11.

<sup>40</sup> Directorium XI, 9, p. 118.

Dóminus qui incépit, ipse perficiat.<sup>41</sup>

Omnis:

Amen.

---

43. Vel, si placet, Priorissa voluntatem candidatarum, coram ea stantium, requirit interrogationibus quæ sequuntur vel similibus.

Priorissa:

Filiæ (Sorores) dilectissimæ,  
quas aqua et Spíritus Deo sacrávit,  
vultis novo professiónis religiósæ título  
árctius Christo et Ecclésiæ coniúngi? <sup>42</sup>

Professuræ omnes simul respondent:

Volo, cum adiutorio Dei et vestro.

Priorissa:

Vultis perfectæ caritatis viam íngredi,  
secúndum apostólicam vivéndi formam  
a sancto Domínico concéptam, <sup>43</sup>  
sicut testes vitae evangélicæ  
sui sequéntes vestígia Salvatóris? <sup>44</sup>

Professuræ:

Volo, cum adiutorio Dei et vestro.

Priorissa:

Vultis, ad vestígia Salvatóris nostri sequénda, <sup>45</sup>  
vitam commúnem unanímiter ágere:

<sup>41</sup> *I Const.*, d. I, c. 13.

<sup>42</sup> Cf. LCO, n. 19, § II.

<sup>43</sup> Cf. LCO, n.1, *Const. fund.*, § IV.

<sup>44</sup> Cf. *I Const.*, d. II, c. 31.

<sup>45</sup> Cf. *ibid.*

in consiliórum evangelicórum professióne fidéles,  
in oratióne fervéntes, in stúdio assíduæ,  
in prædicatióne constántes  
et in regulári observántia perseverántes  
ad Dei glóriam et vestram aliorúmque salútem? <sup>46</sup>

Professuræ:

Volo, cum adiutorio Dei et vestro.

Tunc Priorissa earum voluntatem confirmat dicens:

Dóminus qui incépit, ipse perficiat.

Omnes:

Amen.

---

### *Professio religiosa vel promissio*

44. Tunc unaquæque novitiarum accedens genuflectit ante Priorissam sedentem et, positis manibus suis inter eiusdem manus ac libro Constitutiōnum vel Statutorum superposito manibus utriusque, professionem facit intelligibili voce proferendo verba professionis iuxta sequentem formulam Ordini propriam, ipsam aptando secundum statuta Instituti:

Ego soror N. N. fácio professiónem  
et promítto obœdiéntiam Deo  
et beátæ Maríæ et beáto Domínico  
et tibi soróri N. N., Prioríssæ generáli huius Instituti N.  
et successóribus tuis,

(*vel*: tibi soróri N.N., Prioríssæ provinciáli Provínciae N.  
huius Instituti N.,

*vel*: tibi soróri N.N., Vicáriæ generáli huius Instituti N.,

*vel*: tibi soróri N.N., delegátæ...,  
vice soróris N.N., Prioríssæ generális huius Instituti N.  
et successórum eius),

---

<sup>46</sup> Cf. LCO, n. 1, *Const. fund.*, § IV.

secundum régulam beati Augustíni  
et Institutiónes eiúsdem Institúti,  
quod ero obœdiens tibi tuísque successóribus  
ad annum (*vel* : ad triénnium).<sup>47</sup>

*Osculum pacis*

45. Emissa professione, tantummodo Priorissa sorores profitentes recipit ad osculum pacis, receptionis scilicet in Institutum, quo in Ordine nostro vinculum obœdientiæ et communionis significatur.

*Benedictio habitus et traditio veli*

46. Postea sacerdos vestes profitentium benedicit, iunctis manibus :  
Orémus.

Deus, sanctitatis auctor et consummátor,  
qui renátas ex aqua et Spíritu Sancto  
ad vitæ christiánæ plenitúdinem  
et caritatis perfectiónem vocas:  
has fámulas tuas propítius réspice  
quas, Matre Misericórdiæ auxiliánte,  
novi hábitus dono  
in signum eius speciális protectiónis,  
ad præparatióne evangélii pacis<sup>48</sup> locupletásti;  
et præsta ut Christi Fílli tui imágini confórmes efficiántur  
et huius vitæ cursu felíciter consummáto,  
redimítæ glória, in gáudium domus tuæ intráre mereántur.  
Per Christum Dóminum nostrum.<sup>49</sup>

R. Amen.

<sup>47</sup> LCO, n. 199, § I.

<sup>48</sup> Cf. LCO, n. 199, § I.

<sup>49</sup> Cf. Iordanus, n. 57.

Vel:

Dómine Iesu Christe,  
qui tégimen nostræ mortalitatis induere dignatus es:  
obsecramus immensam largitatis tuæ abundantiæ,  
ut hoc genus vestimentorum, quod sancti Patres  
ad innocentiæ et sanctitatis indicium ferre sanxerunt,  
ita bene & dicere digneris  
ut quæ hoc usus fuerit te induere mereatur,  
qui vivis et regnas in sæcula sæculorum.<sup>50</sup>

R. Amen.

47. Deinde, si mos est, sacerdos præscriptum velamen tradit unicuique professarum, dicens:

Áccipe velamen sacrum  
quo agnoscáris  
domus orationis<sup>51</sup> esse Dómino tuo  
et templum prædicatiōnis<sup>52</sup> in medio populi eius.

Professa respondet:

Amen.

Tunc Priorissa, adiuvante Magistra novitiarum, unamquamque professarum velamine tegit.

Deinde sacerdos professas aqua benedicta aspergit.

\* \* \*

48. Deinde, ubi mos est, Priorissa unicuique professarum librum tradit Constitutionum vel Statutorum, dicens:

Áccipe huius familiæ Institutiones  
ut spéculum spirituális pulchritudinis  
ad quam ipsa vocaris,  
non sicut serva sub lege  
sed sicut líbera sub grátia constituta.<sup>53</sup>

---

<sup>50</sup> *Eccl. Off.*, f. 51r A; cf. PS, p. 157.

<sup>51</sup> Cf. *Lc* 19, 46.

<sup>52</sup> Cf. MLOP, p. 254.

<sup>53</sup> Cf. *Regula*, n. 8, p. 19.

Professa respondet:

Amen.

49. Si vero secundum leges vel consuetudines Instituti alia professio-  
nis insignia tradenda sunt, hic tradantur silentio vel apta formula, decora  
sobrietate servata.

\* \* \*

### *Conclusio ritus professionis*

50. Cum unaquæque sororum nuper professarum ad locum suum  
redierit ibique steterit, Symbolum dicitur si rubricis liturgiæ diei præscribi-  
tur. Ritus apte concluditur recitatione orationis universalis seu fidelium (cf.  
infra in Appendice II, nn. 62-65).

## LITURGIA EUCHARISTICA

51. Dum cantus ad offertorium peragitur, nonnullæ sorores nuper pro-  
fessæ ad altare opportune afferunt panem, vinum et aquam pro Sacrificio  
eucharistico, et alia dona symbolica iuxta consuetudines loci.

52. Qui celebrationi præest pacem offert singulis sororibus nuper pro-  
fessis, ad altare accendentibus, more consueto aut secundum loci consuetudi-  
nem.

53. Postquam sacerdos Eucharistiam sumpsit, etiam omnes adstantes  
eam sub utraque specie sumere possunt, servatis semper dispositionibus  
Conferentiarum Episcoporum et Episcopi diocesani.

## DIMISSIO

54. Deinde sacerdos sorores et adstantes salutat dicens :

Dóminus vobíscum.

R. Et cum spíritu tuo.

Sacerdos:

Benedictio Dei omnipotentis,  
Patris, et Filii, & et Spiritus Sancti,  
descendat super vos et maneat semper.

R. Amen.

---

55. Altera benedictionis formula:

Deus Pater  
sua vos tueatur gratia  
ut vestrae vocacionis munera  
fideli animo persolvatis.

R. Amen.

Dominus Jesus  
caritatis suae apud omnes  
testes et signum  
faciat vos.

R. Amen.

Spiritus Sanctus  
fortificet corda vestra  
et sugggerat vobis omnem veritatem.

R. Amen.

Et benedictio Dei omnipotentis,  
Patris, et Filii, & et Spiritus Sancti,  
descendat super vos et maneat semper.

R. Amen.

---

56. Deinde diaconus vel sacerdos sorores et adstantes dimitit dicens:

Ite, missa est.

Omnis:

Deo grátias.

57. Ritus concludi potest, sicut mos est pro quibusdam celebrationibus in Ordine, antiphona *Salve Regína* vel alio cantu; quo expleto, adstantes salutant sorores nuper professas secundum loci consuetudinem.

### RITUS PROFESSIONIS TEMPORARIAE EXTRA MISSAM PERAGENDUS

58. Quando ritus professionis temporariæ extra Missam peragitur,<sup>54</sup> inseri potest in celebrationem verbi Dei, modo sequenti:

- a) post cantum aptum, fit interrogatio vel postulatio novitiarum (nn. 39-40);
- b) sequitur lectio verbi Dei, cui respondit cantu psalmi apti (cf. infra, in Appendice I). Fit deinde allocutio Priorissæ;
- c) postea ipse ritus professionis habetur: interrogations (nn. 42-43), professionis formula (n. 44), osculum pacis (n. 45), benedictio habitus (n. 46) et, ubi mos est, traditio veli (n. 47) et symbolorum professionis (nn. 48-49);
- d) ritus concludi potest oratione universalis (cf. infra, in Appendice II, nn. 62-65) — addita, si placet, recitatione *Orationis dominicæ* — et benedictione sollemni (n. 55).

59. Quando autem ritus intra Liturgiam Horarum peragitur (præsertim Laudum vel Vesperarum), proceditur modo sequenti:

---

<sup>54</sup> Cf. «Intr. gen.», n. 12.

- a) post hymni cantum, fit interrogatio vel postulatio novitiarum (nn. 39-40);
- b) sequuntur psalmodia et lectio verbi Dei, quod seligi potest ex textibus in Lectionario præbitis (cf. infra, in Appendice I). Fit deinde allocutio Priorissæ;
- c) postea ipse ritus professionis habetur : interrogations (nn. 42-43), professionis formula (n. 44), osculum pacis (n. 45), benedictio habitus (n. 46) et, ubi mos est, traditio veli (n. 47) et symbolorum professionis (nn. 48-49);
- d) canitur postea *Canticum Zachariæ* vel *Magnificat*;
- e) deinde dicitur oratio universalis seu fidelium (cf. infra, in Appendice II, nn. 62-65);
- f) ritus concluditur recitatione *Orationis dominicæ*, oratione finali et benedictione sollemni (n. 55).

### CAPUT III

## RITUS PROFESSIONIS PERPETUÆ INTRA MISSAM PERAGENDUS

### DE MODO RECIPIENDI AD PROFESSIONEM

60. Professionis perpetuæ ritus, Familiaæ Dominicanæ sodalium populique concursu, intra Missam peropportune persolvitur. Fideles autem de die atque hora tempestive certiores fiant, quo frequentiores accurrere possint.

61. Ad professionis ritum peragendum, quo religiosa Deo in perpetuum mancipatur, laudabiliter eligitur dies dominica aut sollemnitas Domino, beatæ Mariæ vel Sanctis, nostri Ordinis præsertim vel Instituti, dicata, servatis semper de iure servandis.

62. Ritus peragitur separatim a ceteris professionis ritibus.<sup>55</sup> Congrua autem sollemnitate celebretur, ut ritus natura postulat, decora tamen illa sobrietate servata, quæ Ordini nostro convenit.

63. Professio de more fit in ecclesia Instituti vel, si ita opportunum videbitur, ritus in cathedrali vel parœciali aliave insigni ecclesia congruenter persolvitur.<sup>56</sup>

64. Professio de more fit ad sedem; ad participationem autem fidelium expediendam, in presbyterio omnia ita disponantur, ut tota actio liturgica a fidelibus conspici possit.

65. Ubi fieri potest, Missa concelebrata præferatur, cui Frater Ordinis præsit.

<sup>55</sup> Cf. OPR Pr., n. 8; OPR II, n. 44.

<sup>56</sup> Cf. LHOP, *Adnot. compl.*, n. 36, p. 19.

66. Adhibetur "Missa diei" aut "Missa ritualis in die professionis perpetuæ", quæ in Proprio Missarum invenitur, ad normam legum liturgicarum.<sup>57</sup>

67. Ubi mos est, antequam ad professionem perpetuam sorores admittantur denuo fiat ipsis, coram Consilio conventus vel cœtu pro earum admissione, "declaratio et protestatio"<sup>58</sup> circa vitæ religiosæ et legum Instituti observantiam, ut in Appendice (V, n. 79) traditur; iis attentis quæ in iurisprudentia uniuscuiusque regionis cauentur.

68. De professione emissâ adnotatio fiat in libro professionum et ab eadem professa atque a duabus testibus subscribatur,<sup>59</sup> numquam vero super altare.

### RITUS INITIALES

69. Actio liturgica opportune incipit cantu introitus dum incedit processio ad altare, cui laudabiliter intersunt professuræ, earum comitante Magistra. Cum ad presbyterium pervenerint, facta altari debita reverentia, omnes locis sibi designatis se disponunt; tum actio liturgica prosequitur.

### LITURGIA VERBI

70. In liturgia verbi omnia fiunt more solito, præter hæc :

- a) lectiones, diebus quibus permittitur, vel e "Missa diei" vel e Sacra Scriptura sumi possunt, ex illis quæ in peculiari lectionario (infra, in Appendix I) proponuntur;<sup>60</sup>
- b) Symbolum dicitur, si rubricis liturgiæ diei præscribitur.

### PROFESSIONIS RELIGIOSA

#### *Interrogatio vel postulatio*

71. Dicto Evangelio, Magistra aliave soror professuras dicit in medium ante Priorissam, ubi se prosternunt, si convenienter fiat, vel genua

---

<sup>57</sup> Cf. «Intr. gen.», nn. 17-18.

<sup>58</sup> Cf. LCO, n. 174, §§ I-II et p. 229.

<sup>59</sup> LCO, n. 194.

<sup>60</sup> Cf. «Intr. gen.», n. 18.

flectunt vel se profunde inclinant. Tunc Priorissa professuras interrogat dicens:

**Quid quæritis?**

Cui omnes simul respondent:

**Misericórdiam Dei et vestram.<sup>61</sup>**

72. Vel, si placet, omissa interrogatione et absque prostratione, una ex professuris pro omnibus — vel omnes simul — ad Priorissam et communictatem conversa postulationem facere potest his vel similibus verbis:

Nos, N. et N., cum misericórdia Dei  
vitam ipsæ vinculis sacris dicátam  
in vestra novérimus communitáte,  
a te, N., humíliter pósdimus,  
ut professiónem perpétuam in hoc Institutúo emittámus  
ad Dei laudem et Ecclésiæ servítium.

Quibus dictis, omnes candidatæ se prosternunt, si convenienter fiat, vel genua flectunt vel se profunde inclinant. Priorissa et omnes adstantes respondent:

Deo grátias.

vel alio apto modo.

Priorissa subiungit:

Leváte.

Tunc professuræ ad locum suum redeunt et omnes sedent.

### *Homilia seu allocutio*

73. Tunc professuræ quoque sedent et fit homilia sacerdotis, in qua opportune illustrantur tum lectiones biblicæ tum vitæ religiosæ donum

<sup>61</sup> Cf. *I Const.*, d. I, c. 13.

Ordinisque nostri propria vocatio et missio atque munus Instituti ad electarum sanctificationem atque ad Ecclesiæ totiusque humanæ familiæ bonum.

### *Interrogationes*

74. Homilia sacerdotis expleta, Priorissa ad professuras conversa quærit:

Vultis fácere professiónem perpétuam  
secúndum Constitutiónes Institútū nostri? <sup>62</sup>

Professuræ surgentes simul respondent:

Volo, cum adiutorio Dei et vestro.

Priorissa subiungit:

Dóminus qui incépit, ipse perfíciat.

Omnes:

Amen.

---

75. Vel, si placet, Priorissa voluntatem candidatarum, coram ea stantium, requirit interrogacionibus quæ sequuntur vel istis similibus.

Priorissa:

Fíliae (Soróres) dilectíssimæ, iam per baptísmum  
peccáto mórtuæ ac Dómino sacrátæ,  
vultis perpétuæ professónis título  
árctius Christo et Ecclésiæ coniúngi? <sup>63</sup>

Professuræ omnes simul respondent:

Volo, cum adiutorio Dei et vestro.

---

<sup>62</sup> Cf. CMS, p. 17.

<sup>63</sup> Cf. LCO, n. 19, § II.

Priorissa:

Vultis eādēm obœdiéntiæ,  
paupertatis et castitatis vitam  
quam Christus Dóminus eiúsque Virgo Mater sibi elegérunt,  
amplécti et usque ad mortem serváre?

Professuræ:

Volo, cum adiutório Dei et vestro.

Priorissa:

Vultis in caritatē Dei et próximi profícere<sup>64</sup>  
Órdinis nostri apostólicum propósitum prosequéndo  
tamquam quæ suam et aliórum salútem procurare desíderant,  
sui sequéntes vestígia Salvatóris? <sup>65</sup>

Professuræ:

Volo, cum adiutório Dei et vestro.

Priorissa:

Vultis, Sancti Spíritus subveniénte múnere,  
professiōne perpétua huic Institúto cooptári,  
Deo totáliter consecrári  
ac univérsæ Ecclésiæ novo modo devovéri,  
íntegræ evangelizatiōni verbi Dei totáliter deputátæ? <sup>66</sup>

Professuræ:

Volo, cum adiutório Dei et vestro.

Tunc Priorissa earum voluntatem confirmat dicens:

Dóminus qui incépit, ipse perficiat.

Omnes:

Amen.

<sup>64</sup> Cf. LCO, n. 1, *Const. fund.*, § III.

<sup>65</sup> Cf. I *Const.*, d. II, c. 31; LCO, n. 1, *Const. fund.*, § II.

<sup>66</sup> Cf. LCO, n. 1, *Const. fund.*, § III.

*Supplicatio pro sororibus professuris*

76. Interrogationibus expletis, omnes pro supplicatione surgunt. Sacerdos stans, manibus iunctis, ad populum conversus dicit:

Orémus, fratres dilectíssimi,  
Deum Patrem omnipoténtem,  
ut super has fámulas,  
quas ad perféctam Christi sequélam vocávit,  
benedictiónis suæ grátiam cleménter effúndat  
eásque in sancto propósito  
benígna pietáte confírmet.

His dictis, omnes silentio orant vel Litaniæ sanctorum (infra, in Appendix IV, nn. 71-74) ad libitum canuntur.

*Professio religiosa vel promissio*

77. Supplicationibus expletis, professuræ singulæ genuflectunt ante Priorissam sedentem et, positis manibus suis inter eiusdem manus ac libro Constitutionum vel Statutorum superposito manibus utriusque, professio nem faciunt intelligibili voce proferendo verba professionis iuxta sequentem formulam Ordini propriam, ipsam aptando secundum statuta Instituti:

Ego soror N. N. fácio professióinem  
et promítto obœdiéntiam Deo  
et beátæ Maríæ et beáto Domínico  
et tibi soróri N. N., Prioríssæ generáli huius Instituti N.  
et successóribus tuis,  
(*vel*: tibi soróri N.N., Prioríssæ provinciáli Provínciae N.  
huius Instituti N.,  
*vel*: tibi soróri N.N., Vicáriæ generáli huius Instituti N.,  
*vel*: tibi soróri N.N., delegátæ...,  
vice soróris N.N., Prioríssæ generális huius Instituti N.  
et successórum eius),  
secúndum régulam beáti Augustíni  
et Institutíones eiúsdem Instituti,  
quod ero obœdiens tibi tuísque successóribus  
usque ad mortem.<sup>67</sup>

---

<sup>67</sup> Cf. LCO, n. 211.

*Osculum pacis et sollemnis benedictionis oratio*

78. Emissa professione, tantummodo Priorissa sorores profitentes recipit ad osculum pacis, receptionis scilicet in Institutum, quo in Ordine nostro vinculum obediencie et communionis significatur.

79. Si vero secundum leges vel consuetudines Instituti quædam professionis insignia tradenda sunt, hic tradantur silentio vel apta formula, decora sobrietate servata.

80. Tunc, nisi habenda sit sollemnus benedictionis oratio, sacerdos sorores nuper professas monet his vel similibus verbis:

Sorores caríssimæ, per hanc professióinem perpétuam  
vosmetípsas tradidístis Deo eiúsque voluntáti :  
Deus ígitur per ministérium Ecclésiæ  
sibi ipse vos consecrávit<sup>68</sup>  
ad præparatiómem evangélii pacis,<sup>69</sup>  
ut própria sitis heréditas eius  
idémque sit heréditas vestra in ætérnum.

Vel, si placet, sorores nuper professæ genua flectunt et sacerdos, manibus super eas extensis, dicit benedictionis precem iuxta formularia in Appendice (IV, n. 78) posita.

*Conclusio ritus professionis*

81. Quibus expletis, sorores nuper professæ ad loca sibi designata revertuntur. Symbolum dicitur si rubricis liturgiæ diei præscribitur. Oratio fidelium (cf. infra, in Appendice II, nn. 62-65) omittitur quando Litaniæ habitæ sunt.

<sup>68</sup> Vide supra, «Intr. gen.», n. 4.

<sup>69</sup> Cf. Iordanus, n. 57.

## LITURGIA EUCHARISTICA

82. Dum cantus ad offertorium peragitur, nonnullæ religiosæ nuper professæ ad altare opportune afferunt panem, vinum et aquam pro Sacrificio eucharistico et alia dona symbolica iuxta consuetudines loci.

83. In Precibus eucharisticis, professarum oblatio secundum has formulas opportune commemoratur:

a) in Prece eucharistica I dicitur «Hanc ígitur» proprium:

Hanc ígitur oblationem servitutis nostræ,  
sed et famulárum tuárum,  
quam tibi in die eárum professiónis offérimus,  
quásumus, Dómine,  
placátus áccipe et propitiátus sanctífica;  
ut quæ, te largiénte,  
hódie vitam suam tibi dicárunt,  
in Fílii tui glorióso advéntu  
æternæ Paschæ gáudio mereántur admítti.  
(Per Christum Dóminum nostrum).

b) in intercessionibus Precis eucharisticæ II, post verba «...univérso clero» additur :

Recordáre quoque, Dómine, istárum sorórum,  
quæ hódie se tibi dicárunt perpétuo servítio,  
et concéde ut prædicatiónis templum  
atque domus oratiónis et laudis tuæ  
in perpétuum<sup>70</sup> exsístant.

c) in intercessionibus Precis eucharisticæ III, post verba «...pópulo acquisitíonis tuæ» additur:

Confortáre quoque in sancto propósito dignéris  
has fámulas tuas,  
quæ hódie sacris religiónis vínculis  
perpétuo tibi se devinxérunt,

---

<sup>70</sup> Cf. MLOP, p. 254.

et fac ut in Ecclésia tua  
novam et ætérnam vitam maniféstent  
Christí redemptióne comparátam.

d) intercessionibus Precis eucharisticæ IV, post verba «...sed et totíus cleri» additur:

... et istárum sorórum, quæ professióne religiosa  
hódie tibi árctius consecrántur,  
et offeréntium  
et circum adstántium ...

84. Postquam sacerdos Eucharistiam sumpsit, etiam omnes adstantes eam sub utraque specie sumere possunt, servatis semper dispositionibus Conferentiarum Episcoporum et Episcopi diócesani.

#### CONCLUSIÓ RITUS

85. Oratione post communionem expleta, religiosæ nuper professæ ante altare sistunt et sacerdos, manibus super eas et populum extensis, dicere potest:

Deus, tanti óperis auctor et custos,  
supérna sua vos tueátur grátia  
ut vestræ vocatiónis múnera  
fidéli ánimo persolvátis.

R. Amen.

Ipse divínæ vos fáciat caritátis  
apud omnes testimónium et signum,  
ut pópulus Dei prompta respóndeat actuositáte.

R. Amen.

Divíni sui Spíritus advocántis grátia  
corda vestra efficáciter fecúndet  
pro Ecclésiæ et humánæ familiæ proféctu.

R. Amen.

Et vos omnes, qui his sacrī adēstis,  
benedīcat omnīpotens Deus,  
Pater, et Fīlius, ☩ et Spīritus Sanctus.

R. Amen.

Deinde diaconus vel sacerdos sorores et adstantes dimitit dicens:

Ite, missa est.

R. Deo grātias.

86. Tunc adstantes salutant sorores nuper professas, secundum loci consuetudinem, dum canitur antiphona:

Ecce quam bonum et quam iucūndum  
habitare fratres in unum.

cum Psalmo 132, vel alijs congruus cantus.

## CAPUT IV

### RITUS RENOVATIONIS VOTORUM TEMPORARIORUM VEL PROMISSIONIS INTRA MISSAM PERAGENDUS

87. Hoc capite describitur ritus qui adhibetur cum renovatio votorum temporariorum, quæ ex Constitutionum<sup>71</sup> præscripto fit, intra Missam peragitur. Si autem renovatio votorum fit extra Missam, professio sine ritu peculiari coram duabus testibus renovetur.

88. Ritus renovationis votorum maxima sobrietate peragatur, præsertim cum vota ad annum renovantur.

Quando ritus in ecclesia persolvitur, professio de more fit ad sedem; opportuno presbyterii loco paretur sedes pro Priorissa, sorum professionem receptura.

89. Adhibetur "Missa diei" aut "Missa ritualis in die renovationis votorum", ad normam legum liturgicarum.<sup>72</sup>

90. De professione emissa adnotatio fiat in libro professionum et ab eadem professa atque a duabus testibus subscribatur,<sup>73</sup> numquam vero super altare.

## LITURGIA VERBI

91. In liturgia verbi, diebus quibus permittitur, lectiones vel e "Missa diei" vel e Sacra Scriptura sumi possunt, ex illis quæ in peculiari lectionario (cf. infra, in Appendice I) proponuntur.<sup>74</sup>

92. Post Evangelium fit homilia, in qua tum lectiones bibliæ tum vis et virtus vitæ religiosæ in Instituto commemorantur.

<sup>71</sup> Cf. LCO, nn. 195, § II; 202; 203.

<sup>72</sup> Cf. «Intr. gen.», nn. 17-18; *Missale Romanum*, 1975<sup>2</sup>, p. 773.

<sup>73</sup> Cf. LCO, n. 194.

<sup>74</sup> Cf. «Intr. gen.», n. 18.

## VOTORUM VEL PROMISSIONIS RENOVATIO

*Divinæ gratiæ expositulatio*

93. Homilia expleta, sacerdos divinum auxilium exposcere potest, dicens:

Orémus Deum Patrem,  
perseverántis consílīi largítórem,  
pro his fámulis eius,  
quæ hódie coram Ecclésia  
vota sua (promissióinem suam) renováre inténdunt.

Omnes per aliquod temporis spatiū silentio orant. Deinde sacerdos dicit:

Réspice, quás sumus Dómine,  
super has fámulas tuas,  
quas ad Fílli tui préssius sectánda vestígia  
providénti vocásti consílio;  
et miserátus concéde  
ut iter amóris tui,  
quod álares sunt aggréssæ,  
perseveránti caritáte confícant.  
Per Christum Dóminum nostrum.

*r. Amen.*

*Renovatio professionis vel promissionis*

94. Oratione expleta, professuræ singulæ accedentes genuflectunt ante Priorissam sedentem et, positis manibus suis inter eiusdem manus ac libro Constitutionum vel Statutorum superposito manibus utriusque, professio-nem renovant intelligibili voce proferendo verba professionis iuxta sequen-tem formulam Ordini propriam, ipsam aptando secundum statuta Instituti:

Ego soror N. N. rénovo professióнем  
et promítto oboediéntiam Deo  
et beátæ Maríæ et beáto Domínico  
et tibi soróri N. N., Prioríssæ generáli huius Institúti N.,

et successóribus tuis

(*vel*: tibi soróri *N.N.*, Prioríssæ provinciáli Provínciæ *N.*  
huius Institúti *N.*,

*vel*: tibi soróri *N.N.*, Vicáriæ generáli huius Institúti *N.*,

*vel*: tibi soróri *N.N.*, delegátæ...,

vice soróris *N.N.*, Prioríssæ generális  
huius Institúti *N.*

et successórum eius),

secúndum régulam beáti Augustíni

et Institutiónes eiúsdem Institúti,

quod ero oboédiens tibi tuísque successóribus

ad annum (*vel*: ad triénnium).<sup>75</sup>

#### CONCLUSIO RITUS

95. Renovata professione, tantummodo Priorissa sorores profitentes recipit ad osculum pacis, receptionis scilicet in Institutum, quo in Ordine nostro vinculum obœdientiæ et communionis significatur.

96. Symbolum dicitur si rubricis liturgiæ diei præscribitur. Oratio universalis seu fidelium (cf. infra, in Appendix II, nn. 62-65) fit modo in celebrationibus liturgicis consueto.

<sup>75</sup> Cf. LCO, n. 199, § I; 201, § I.

## CAPUT V

### MISSA IN XXV VEL L ANNIVERSARIO PROFESSIONIS

97. In xxv vel l anniversario professionis religiosae peculiaris celebra-  
tio, quamvis non habeatur in traditione Ordinis, causa pietatis necnon et  
pastoralis actionis haberi potest, cum professionis confirmatione intra Mis-  
sam.<sup>77</sup>

98. Missa<sup>78</sup> dici potest, cum vestibus coloris albi, diebus quibus Missæ  
"pro variis necessitatibus" celebrari possunt, ad normam legum liturgica-  
rum.

Post homiliam professio publice confirmari potest, ritu renovationis  
votorum adhibito (supra, nn. 93-96), formula autem sequenti:

Ego soror N. N. totáliter adháereo professióni a me factæ  
et promítto oboediéntiam Deo  
et beátæ Maríæ et beáto Domínico  
et soróri N.N., Priorissæ generáli huius Institúti N.  
et successóribus eius,  
secúndum régulam beáti Augustíni  
et Institutiónes eiúsdem Institúti,  
grátiam Dei implórans  
qua fidéliter professiónem meam adimplére possim  
usque ad mortem.

99. Pro Missæ celebratione formularium aptum hic apponitur.

*Ant. ad introitum*

*Ps 39, 8-9*

Ecce vénio, Dómine, fácere voluntátem tuam.  
Deus meus, vólui, et lex tua in præcordiis meis.

*Collecta*

Dómine, Deus fidélis,  
da nobis, quásumus, grátias tibi referre

<sup>77</sup> Cf. «Intr. gen.», n. 15; OPR Pr., n. 7.

<sup>78</sup> Cf. *Missale Romanum*, 1975<sup>2</sup>, p. 774.

pro tua erga sorórem nostram *N.* benigitáte,  
quæ accéptum a te donum  
hódie confirmáre inténdit.

Róbora in ea spíritum perféctæ caritátis,  
ut glóriæ tuæ et óperi salútis  
in dies váleat fervéntius inservíre.  
Per Dóminum.

*Super oblata*

Súscipe, Dómine,  
una cum munéribus oblatiónem sui,  
quam hódie soror nostra *N.* confirmáre desíderat,  
et per virtútem Sancti Spíritus  
imágini dilécti Fílii tui  
ámplius eam conformáre dignéris.  
Qui vivit et regnat.

Præfatio propria (cf. infra, in Appendix III).

*Ant. ad communionem*

*Mc 3,35*

Qui fécerit voluntátem Dei,  
hic frater meus et soror mea et mater est.

*Post communionem*

Súmpsimus, Dómine, Corpus et Ságuinem Fílii tui,  
quæ in iucúnda celebratióne huius anniversárii contulísti;  
concéde, quásimus, ut soror nostra *N.*,  
cælesti pane potúque refécta,  
incépti itíneris ad te ducéntis  
felícem progréssum obtíneat.  
Per Christum.

In fine Missæ opportune canitur resp. *O spem miram* (AG, p. 871) vel  
*Média vita* (AG, p. 106) vel *Dómine Deus* (GOP, p. 356; GR, p. 401) vel alius  
cantus aptus.



PARS TERTIA

ORDO  
RECEPTIONIS ET PROFESSIONIS  
IN FRATERNITATIBUS S. DOMINICI

## Monitum

Hic Professionis Ordo a Fraternitatibus clericalibus et laicalibus necnon et a iuvenum aggregationibus Ordini sociatis (vide infra, adn. 2) adhibendus est, perspectis aptationibus a Consiliis nationalibus Fraternitatum propositis et ab auctoritatibus Ordinis approbatis, versionibusque adhibitis quæ ab uniuscuiusque regionis Commissione liturgica Ordinis exstant paratæ.

Cum hæc sectio *Ritualis* a ceteris sectionibus forte publicetur disiuncta, paragraphi 1-8 "Introductionis generalis" præmittantur, qui breviter liturgiæ in Ordine historiam illustrant necnon et peculiarem indolem propositi vitæ evangelicæ in traditione Dominicana. Reliqui autem paragrahi omittantur, ut evidentius elucescat quod laici non sunt 'religiosi in sæculo constituti' sed potius christifideles qui Ordini cooptantur per assumptionem propositi vitæ evangelicæ suo statui in sæculo aptatæ, ad charisma sancti Dominici participandum.

## CAPUT I

### RITUS RECEPTIONIS CANDIDATORUM

#### DE MODO RECEPIENDI CANDIDATOS IN FRATERNITATES S. DOMINICI

1. LAICORUM ET CLERICORUM<sup>1</sup> IN SÆCULO VIVENTIUM receptio ad Ordinem Prædicatorum, utique in Fraternitates S. Dominici,<sup>2</sup> ex antiqua consuetudine,<sup>3</sup> traditione habitus perficitur tamquam verus initiationis ritus; ideoque ipsorum "vestitio" initio anni probationis perficienda collocatur, utpote proprie "signum" receptionis ad Ordinem et admissionis in Fraternitatem localem, nondum vero incorporacionis Ordini, quæ per professionem sequetur.<sup>4</sup>

---

<sup>1</sup> De presbyteris nempe et de diaconis hic infra agitur.

<sup>2</sup> Hac denominatione, inter diversos cœtus ex quibus Ordo universus seu Familia Dominicana coalescit (cf. LCO, n.1, *Const. fund.*, § IX), hic colliguntur:

a) Fraternitates laicorum sancti Dominici seu associationes christifidelium utriusque sexus, de quibus hic principaliter agitur, "qui speciali Dei dono in spiritu apostolico s. Dominici 'suam et aliorum salutem procurare intendunt' per professionem vitæ evangelicæ, secundum formam vivendi ab Ordine pro eorum statu in sæculo adaptatam et rite approbatam" (LCO, n. 149, § I);

b) Fraternitates clericales seu associationes clericorum "qui vitam et ministerium suum spiritu s. Dominici informare satagunt" (LCO, n.149, § II; cf. *Declar. gen.*, n. 5, ASOP, 95, 1987, p. 88);

c) alia consociationes laicorum, iuvenum præsertim, valde inter se diversæ, "secundum spiritum s. Dominici viventes", quæ propriis Statutis gubernantur sed tamen "constitutioni fundamentali [laicorum scilicet s. Dominici (RFL, nn. 1-7)] sunt conformes" (cf. ACG 1986, nn. 85; 87-89).

Ritus vero receptionis unus atque idem pro omnibus adhibetur, nisi aliud pro singulis cœtibus caveatur.

<sup>3</sup> Huius enim ritus nonnulla elementa inveniuntur in ipsa *Regula Fratrum et Sororum Ordinis de Pœnitentia Beati Dominici* (= ROPD), quam Magister Ordinis Prædicatorum Munio de Zamora (1285-1291) redigendam et anno 1285 publicandam curavit, quæque deinde approbata fuit ab Innocentio VII, die 26 iunii 1405. Vide etiam «Intr. gen.», adn. 44, et DB, cap. XXXIX : *Ordo benedictionis et impositionis scapularis*, pp. 462-468.

<sup>4</sup> Cf. RFL, nn. 2 et 14; RFS, n. 4, § 2. Circa 'professionem' vide infra, adn. 38.

Pro receptione, vero, sodalium aliarum consociationum,<sup>5</sup> nihil impedit quominus aliis modis aptus admittendi candidatos ipsis proprietate agnoscat, firma tamen eorum fidelitate ad Constitutionem fundamentalem Laicatus Dominicani (RFL, nn. 1-7)<sup>6</sup> atque congrua ad hunc ritum accommodatione servata, præsertim circa orationum textus.

2. Quod vero huic formulario similitudo esse patet cum formulariis aliorum cœtuum Familiaæ Dominicanæ, ex voluntate factum est ut Fraternitates quoque S. Dominici vero ritu sacro<sup>7</sup> fruerentur neque eorum sodalium admissio, absque propria ecclesiæ nota, ad meram adscriptionem restringeretur. Hæc enim ecclesiæ dimensio seu ratio omnino necessaria videtur ut character baptismalis huius formæ vitæ evangelicæ illustretur ipsosque laicos aliosque Fraternitatum sodales coniunctos esse vitæ Ordinis sancti Dominici clarius ostendatur.

3. Die igitur qua christifideles laici vel clerici in Fraternitatem sancti Dominici admittuntur atque eorum probationis annus incipit, peculiarem ritum peragere præstat ad Dei gratiam impetrandam ipsorumque "propositum" sequendi Christum in Familia Dominicana exprimendum.

4. In hoc receptionis seu "vestitionis" ritu, candidati — laici vel clerici — ordinarie habitu Ordinis hodie non amplius induuntur, sed iuxta locorum consuetudines parvum scapulare accipiunt, forma et materia pro ipsis definitis. In eorum igitur rituali "vestitione", pro benedictione et impositione habitus nonnisi huiusmodi parvum scapulare adhibendum est; postea vero aliis approbatis "signis" — numismate nempe sancti Dominici, parva cruce aliove Ordinis signaculo — specialiter benedictis substitui potest.<sup>8</sup>

Quod enim revera in hoc præstat illud est quod iis exterioribus signis exprimitur, firmum nempe baptismale propositum Christum induendi ipsumque — auxiliante Virgine Maria Regina misericordiae

---

<sup>5</sup> Vide supra, adn. 2, sub littera c).

<sup>6</sup> Cf. ACG 1986, nn. 87 et 89.

<sup>7</sup> Cf. RFS, n. 12, § 1.

<sup>8</sup> Cf. DB, n. 1209, p. 462.

et benevolentissima Ordinis Matre — in semetipsis viventem manifestandi: itaque ipsi laici vel clerici Ordinis “missionem apostolicam participant, studio, oratione et prædicatione secundum propriam cuiusque condicionem”, “tum in propria vita spirituali cum in servitio Dei et proximi in Ecclesia”, “ad exemplum S. Dominici, S. Catharinae Senensis et maiorum nostrorum”.<sup>9</sup>

5. Omnes in Fraternitates S. Dominici recepti, sive laici sive clerici, vestitionis ritu in Familiam Dominicanam partem habere incipiunt et communitati seu Fraternitati loci cooptantur “ad vitam secundum sancti Dominici spiritum et charisma adimplendam”.<sup>10</sup>

6. Quod ut perfectius assequantur, ad participationem omnium bonorum spiritualium Ordinis admittuntur.<sup>11</sup> Insuper, ipsa die qua in Ordinem recipiuntur, candidati indulgentiam plenariam lucrare possunt<sup>12</sup> suetis conditionibus.<sup>13</sup>

7. Pro ingressu in Fraternitates vel Consociationes sancti Dominici, quo Familiæ Dominicanæ aliquis fit particeps, speciales serventur normæ<sup>14</sup> ab Ordine præfinitæ.

<sup>9</sup> Cf. RFL, nn. 5 et 4; RFS, *Procœmum* et nn. 1-3, 6, § 9.

<sup>10</sup> Cf. RFL, nn. 2 et 3; RFS, n. 12, § 1.

<sup>11</sup> Ex indulto Pii VII, 6 iul. 1806 : ACG 1932, *Const.*, n. 236, I.

<sup>12</sup> Cf. Decretum Pœnit. Apost., 25 oct. 1967, ASOP 76, 1968, p. 579.

<sup>13</sup> Hæ sunt : sacramentalis confessio, communio eucharistica et oratio ad mentem Summi Pontificis, una cum exclusione omnis affectus erga quocumque peccatum etiam veniale (cf. *Const. Apost. Indulgentiarum Doctrina*, Normæ, n. 7).

<sup>14</sup> Hæ normæ continentur in *Regula Fraternitatum Sacerdotalium S. Dominici* [a Congregatione pro Religiosis et Institutis Sæcularibus die 7 septembbris 1987 “ad septennium” approbata, a Magistro Ordinis promulgata (ASOP 95, 1987, pp. 199-206) et a Congregatione pro Institutis Vitæ Consecratæ et Societatibus Vitæ Apostolicæ definitive die 3 decembbris 1996 approbata (prot. n. D. 37-1/96)] et in *Regula Fraternitatum Laicalium S. Dominici* [a Congregatione pro Religiosis et Institutis Sæcularibus die 15 ianuarii 1987 “definitive” approbata et a Magistro Ordinis die 28 ianuarii 1987 promulgata (ASOP 95, 1987, pp. 83-88)]. Quibus accedunt determinationes speciales Capitulorum Generalium — præsertim Abulæ 1986 (Acta, nn. 85-89) — necnon Statuta diversarum Provinciarum.

8. Laicorum receptio seu vestitio “committitur responsabili laicali”<sup>15</sup> (Priori vel Priorissæ), qui ritui præest una cum Adsistente religioso (Fratre scilicet Ordinis vel alio sacerdote seu diacono vel religiosa Ordinis, speciali facultate præeditis), uniuscuiusque illorum proprii officii functione servata.<sup>16</sup>

Clericorum vero receptionem seu vestitionem regulariter peragunt superiores Ordinis aut eorum delegati, prout specialiter pro illis cavetur.<sup>17</sup>

Quod igitur in hoc ritu de Præsidente seu de Responsabili dicitur, intelligendum est de Priore vel de Priorissa aut de Fratre Ordinis vel eius delegato in receptione clericorum; quod autem de Celebrante dicitur, hoc de Adsistente religioso vel religiosa intelligendum est.

9. Ubi mos est, huic ritui Adsistens præest cappa Ordinis induitus, si est Frater aut Soror Ordinis, vel superpelliceo et stola si est aliud sacerdos vel diaconus, facultate præediti.

10. Receptionis ritus celebratione communi, quantum fieri potest, perficiatur.<sup>18</sup> Inseri potest celebrationi alicuius partis Liturgiæ Horarum (Laudum præsertim aut Vesperarum), vel peculiari verbi Dei celebrationi, quæ novi perfectionis itineris naturam ostendat ac nostri Ordinis vocationem et missionem illustret. Hic autem ritus extra Missam peragatur.

A professionis quoque ritibus hæc receptionis celebratio separatur, cum nondum characterem stabilitatis sed probationis tantum indolem habeat, nisi circumstantiae particulares vel pastorales rationes aliter suadeant.<sup>19</sup>

11. De intimatione novitiatus fiat registratio in libro admissiōnum, a singulis novitiis et a duobus testibus subscripta.

---

<sup>15</sup> Cf. RFL, n. 16.

<sup>16</sup> Cf. RFL, n. 16; vide etiam DB, n. 1208, p. 462.

<sup>17</sup> Cf. RFS, n. 16, § 2.

<sup>18</sup> Cf. DB, n. 1208, p. 462.

<sup>19</sup> Cf. supra, «Intr. gen.», n. 11.

## RITUS INITIALES

12. Populo vel saltem Fraternitatis loci ceterisque, si adsint, Familiae Dominicanae sodalibus coadunatis, Responsabilis laicalis, qui celebrationi praesidet, et Adsistens religiosus simul ingrediuntur, dum convenienter canitur psalmus vel cantus, naturae celebrationis congruentes, vel hymnus Laudum aut Vesperarum, si ritus cum iis uniatur. Cantu absoluto Celebrans dicit:

In nomine Patris, et Filii, et Spiritus Sancti.

Omnes signo crucis se signant et respondent:

Amen.

13. Deinde Celebrans, monitionis instar, haec vel similia dicit:

Dóminus Iesus, qui nos in Spíritu Sancto cleménter vocávit, et nunc in nomine suo benígne coadunávit, suam in nobis gloriósam maniféstet præséntiam. Et sicut beáto Domínico, patri nostro, ita et nobis veram et efficácem largiátur caritátem, qua nostram et aliórum salútem procuráre possímus,<sup>20</sup> tamquam veri eius discípuli.

## INTERROGATIO VEL POSTULATIO

14. His expletis, Præsidens candidatos interroget:

Fílii (Soróres/Fratres) dilectíssimi (dilectíssimæ), quid quéritis?

Candidati omnes simul respondent:

Ut misericórdia Dei et vestra<sup>21</sup> partem habeámus in Família Dominicána.

<sup>20</sup> Cf. Iordanus, n. 13.

<sup>21</sup> Cf. *I Const.*, d. I, c. 13.

15. Vel, si placet, postulatio fieri potest ab uno pro omnibus, sequentibus<sup>22</sup> vel similibus verbis:

Misericórdia Dei compúlsi  
huc vénimus ad conversatióne experiéndam vestram,  
ut ad exémplum sancti Domínici, sanctæ Catharínæ Senénsis  
aliorúmque maiórum vestrórum,  
qui vitam Órdinis et Ecclésiæ illustravérunt,  
ipsi, communióne fraterna roboráti,  
in primis de nostra fide testimónium reddámus  
hominúmque huius témporis necessitátes efficáciter audiámus  
et veritáti aláriter serviámus.  
Hodiérni inde apostolátus Ecclésiæ  
fines præcípuos sédulo considerántes, quárimus adiuvári,  
speciáli modo impúlsi, ad misericórdiam veram  
erga omnes anxietátes manifestádam,  
ad libertátem strénue propugnándam,  
ad iustítiam et pacem promovéndam.

Præsidens respondet his vel similibus verbis:

Misericors Deus grátia vos fóveat sua  
et divínus Magíster vobis tríbuat abundántiam sui Spíritus  
et suæ pacis soláciúm.

Omnes:

Amen.

---

16. Tunc Adsistens omnes ad orationem invitat, dicens:

Orémus.

Et omnes breviter silentio orant. Deinde Adsistens prosequitur:

Deus, sanctæ vocatiónis largítor,  
qui evangélicæ prædicatiónis minístrum

---

<sup>22</sup> Cf. RFL, nn. 5-6.

beátum Domínicum Ecclésiæ donásti,  
 hos fámulos tuos (et ancíllas tuas) propítius résponce  
 qui (quæ), ipsíus evangélicum propósitum amplécti cupiéntes,  
 nostræ petunt aggregári familiæ;  
 et concéde propítius ut eórum (eárum) fratérna conversátio  
 in mútuam dilectionem convertátur.  
 Per Christum Dóminum nostrum.

R. Amen.

#### CELEBRATIO VERBI

17. Tunc leguntur textus apti, convenienter ab ipsis candidatis selecti, in primis e Sacris Scripturis desumpti (cf. infra, in Appendix I). Qui textus novitatem vitæ scilicet per baptísum acceptam illustrent, ad laicalis vocationis indicandum nexum cum baptismate aliisque initiationis christianæ sacramentis et munéribus, congruis interiectis cantibus vel apto responso-rio.

Adhiberi possunt etiam aliæ aptæ lectiones vel ex Ecclesiæ aut Ordinis documentis vel e sanctis Patribus. Brevitati vero consulendi causa, una tan-tum lectio fieri potest, e Sacris Scripturis deprompta.

18. His peractis, præ oculis habens textus lectos, Præsidens — aut Adsistens, si id magis expedire videatur — brevem allocutionem facit, qua sensum celebrationis adstantibus illustret, de indole vocationis sacerdotalis sodalium Fraternitatum sancti Dominici eorumque apostolica actuositate, secundum eiusdem sancti Dominici spiritum et charisma necnon et propriam eorum condicionem.

#### RECEPTIO CANDIDATORUM

##### *Interrogationes*

19. Sermone expleto, Præsidens candidatos ad surgendum invitat eorumque voluntatem requirit, his vel similibus verbis:

Vultis, firma intentiōne,  
 in novitáte vitæ fidéliter ambuláre  
 tamquam viri evangélici (mulíeres evangélicæ),  
 qui (quæ) suam et aliórum salútem procuráre desíderant?<sup>23</sup>

<sup>23</sup> Cf. *I Const.*, d. II, c. 31; LCO, n. 1, *Const. fund.*, § II.

Candidati omnes simul respondent:

Volo, cum adiutorio Dei et vestro.<sup>24</sup>

Præsidens:

Vultis corde pænitenti vitam amplécti evangélicam  
secundum beati Domíni apostólicum propósitum?

Candidati:

Volo, cum adiutorio Dei et vestro.

Præsidens:

Vultis ergo in Familiam Dominicánam partem habére  
ad conversatiórem nostram experiéndam  
in sancti Domíni Régulæ observántia?

Candidati:

Volo, cum adiutorio Dei et vestro.

Tunc Præsidens eorum voluntatem confirmat dicens:

Dóminus qui incépit, ipse perficiat.<sup>25</sup>

Et adstantes respondent:

Amen.

### *Benedictio scapularis*

20. Deinde Adsistens surgit et scapularia benedicit, iunctis manibus:

Orémus.

---

<sup>24</sup> Directorium XI, 9, p. 118.

<sup>25</sup> I Const., d. I, c. 13.

Dómine Iesu Christe,  
 qui tégimen nostræ mortalitatis induere dignátus es:  
 obsecrámus imménsam largitatis tuæ abundántiam,  
 ut hoc genus vestimentórum, quod sancti Patres  
 ad innocéntiæ et sanctitatis indícium ferre sanxérunt,  
 ita bene & dícere dignéris  
 ut qui (quæ) hoc usus (usa) fúerit te induere mereátur,  
 qui vivis et regnas in sǽculórum.<sup>26</sup>

Vel:

Deus, sanctitatis auctor et consummátor,  
 qui renátos ex aqua et Spíritu Sancto  
 ad vitæ christiánæ plenitúdinem  
 et caritatis perfectiónem vocas,  
 fámulas famulósque tuos propítius rēspice  
 hoc Órdinis nostri scapuláre devóte suscipiéntes,  
 ut Christi Fílli tui imágini confórmes efficiántur  
 et huius vitæ cursu feliciter consummáto,  
 Deípara Vírgine eiúsdem Órdinis Patróna auxiliánte,  
 in gáudium domus tuæ intráre mereántur.<sup>27</sup>  
 Per Christum Dóminum nostrum.

r/. Amen.

### *Impositio scapularis seu “vestitio”*

21. Postea Præsidens scapulare candidatis imponit, semel pro omnibus elata voce verba sequentia vel similia proferens:

<sup>26</sup> *Eccl. off.*, f. 51r A; cf. ROPD, III, n. 9. Hæc eadem oratio de benedictione scapularis, a primævis Constitutionibus in professionis ritu adhibita (cf. *I Const.*, d. I, c. 15), desumpta est ex antiquis ritualibus monasticis et a Prædicatoribus adoptata in Capitulo generali anni 1236 (cf. MOPH III, p. 8 et G.G. Meersseman, *Regula Fratrum et Sororum Ordinis de Penitentia Beati Dominici, Fundatoris et Patris Fratrum Ordinis Predicorum*, in *Dossier de l'Ordre de la Pénitence au XIIIe siècle* [“Spicilegium Friburgense”, 7], Fribourg 1961, pp. 144-156, præsertim p. 145, § 9).

<sup>27</sup> Cf. DB, n. 1218, p. 466.

Accípote (Áccipe) hunc hábitum  
quo, auxiliánte Vírgine María, misericórdiæ Matre,  
admíssio in Famíliam Dominicánam vobis (tibi) largítur  
et aggregátio nostræ Fraternitáti N. exprímitur;  
ita ágite (age) ut, ipsa Deípara intercedénte,  
ad Trinitátis glóriam et Ecclésiæ hominúmque bonum  
in dies Christum indúere satagátis (sátágas)  
eúmque in vobis (te) vivéntem manifestétis (maniféstes).<sup>28</sup>

R. Amen.

22. Unusquisque postea ad Præsidentem singulariter accedit, coram ipso genua flectendo, scapulare recepturus una cum osculo pacis, quod est signum receptionis in Ordinem et admissionis in Fraternitatem localem.<sup>29</sup>

Vestitione expleta, Adsistens candidatos una simul<sup>30</sup> aqua benedicta aspergit.

23. Tunc Præsidens, ad novos fratres et sorores versus, dicit:

Hoc scapulári Órdinis nostri indúti  
in Fraternitátem laicálem sancti Domínici suscépti estis  
ut in spíritu et charísmate Órdinis ipsíus  
Christo eiúsque Ecclésiæ impénsius servíre valeátis.  
Quod ut perféctius assequámini,  
ego, ex potestáte mihi concéssa,  
ad participátionem ómnium bonórum spirituálium  
univérsi Órdinis sancti Domínici vos admítto.<sup>31</sup>

24. Deinde Adsistens insignia quæ loco scapularis adhiberi possunt (ex. gr. numisma sancti Dominici, parvam crucem aliumve Ordinis signaculum) benedit et singulis candidatis tradit.<sup>32</sup>

---

<sup>28</sup> Cf. DB, n. 1219, p. 467.

<sup>29</sup> Cf. supra, n. 1.

<sup>30</sup> Cf. ROPD, III, n. 9.

<sup>31</sup> Cf. DB, n. 1221, p. 468. Cf. etiam ACG 1932, *Const.*, n. 236, I; supra, n. 6.

<sup>32</sup> Cf. supra, n. 4.

*Traditio Regulæ*

25. Deinde, sicubi expedire videatur, librum Regulæ Præsidens unicuique candidatorum tradit, his vel similibus verbis:

Áccipe nostræ familiæ Régulam,  
ut eam fidéliter servándo  
Christi plénium efficiáris discípulus  
ipsúmque sápiens vere eo coram homínibus lúceas,  
ut vídeant ópera tua bona  
et gloríficent Patrem qui in cælis est.<sup>33</sup>

Candidatus (vel candidata) respondet:

Amen.

*Oratio universalis*

26. Sequitur oratio universalis, modo in celebrationibus consueto, iuxta formularium quod in Appendice affertur (II, nn. 62-65).

Si autem ritus cum Laudibus vel Vesperis uniatur, sequitur *Canticum Zacharie* vel *Magnificat* cum sua antiphona, et cetera more solito. Oratio universalis fit iuxta formularium precum Liturgiæ Horarum, invocationem pro novis fratribus vel sororibus inserendo.

Deinde dicitur oratio quæ est in fine Laudum vel Vesperarum, si ritus cum earum celebratione uniatur.

*Receptio fraterna et intimatio temporis probationis*

27. Postea novitii eant dando pacem unicuique sodalium Fraternitatis loci, dum canitur ps. 132 *Ecce quam bonum vel ant. Ubi cáritas vel ant. O spem miram vel alias cantus congruus.*

<sup>33</sup> Cf. Mt 5,16.

28. Quibus expletis novitii ante gradum altaris coram Præsidente redeunt, qui eis — si opportunum videtur — aliud nomen, christianum scilicet, addere potest, unicuique dicens:

Ex baptismo est nomen tuum *N.*,  
in Órdine vocáberis frater (soror) *N.N.*.<sup>34</sup>

Deinde Præsidens novitios (novitias) curæ Magistri (Magistræ) tradit, tempus probationis assignans, iuxta Statutorum præscripta.<sup>35</sup>

#### CONCLUSIO RITUS

29. His omnibus peractis, Adsistens — aut Præsidens, si id magis expedit videatur — orationem finalem dicit:

Orémus.

Ánnue, Dómine, familiæ tuæ précibus,  
et intercedénte Dei Genetrice María,  
Órdinis nostri Matre benevolentíssima et Patróna,  
his fámulis tuis  
qui (quæ) nostram cúpiunt conversatióнем experíri  
perseverántiae virtútem infúnde,  
et fac ut baptísmatis grátia,  
quam novo cúpiunt consílio roborári,  
plenum in eis sumat effectum,  
quo Sancti Spíritus roboráti auxíliis  
voluntátem tuam sincéra mente exquirant  
et perseveránti ánimo váleant adimplére.  
Per Christum Dóminum nostrum.<sup>36</sup>

Vel:

Imitémur, fratres (soróres), ut póssumus,  
sancti patris Domínici vestígia,

---

<sup>34</sup> Cf. PS, p. 155.

<sup>35</sup> Cf. RFL, n. 17.

<sup>36</sup> Cf. OPR I, n. 142 ; OPR App. III, p. 120.

simul et agámus grátias Redemptóri  
 qui talem in via hac, qua ambulámus,  
 ducem exhíbuit servis suis,  
 per eum nos in huius conversatiónis lucem regénerans;  
 et deprecémur misericordiárum Patrem,  
 ut illo nos regénte Spíritu, quo filii Dei agúntur,  
 per térmilos quos posuérunt patres nostri  
 ad eándem metam  
 perpétuæ felicitátis et sempitérnæ beatitúdinis,  
 ad quam ille sine fine felix introívit,  
 nos quoque indefléxo trámite pertíngere mereámur.<sup>37</sup>  
 Per Christum Dóminum nostrum.

R/. Amen.

30. Celebrans ritum concludere potest dicens:

Omnípotens Deus sua vos cleméntia benedícat,  
 et sensum in vobis sapiéntiæ salutáris infúndat.

R/. Amen.

Fídei documéntis vos semper enútriat,  
 et in sanctis opéribus, ut pérseverétis, effíciat.

R/. Amen.

Gressus vestros efficáciter dírigat  
 et in prædicatióne Evangélii pacis viam vobis osténdat.

R/. Amen.

Benedíctio Dei omnipoténtis,  
 Patris, et Fílii, ☩ et Spíritus Sancti,  
 descéndat super vos et máneat semper.

R/. Amen.

---

<sup>37</sup> Cf. Iordanus, n. 109.

31. Adsistens in fine dicit:

¶. Adiutorium nostrum in nomine Domini.

¶. Qui fecit cælum et terram.

32. Ritus concludi potest, sicut mos est pro quibusdam celebrationibus in Ordine, antiphona *Salve Regina* vel alio cantu; quo expleto, adstantes novos fratres et sorores salutant, secundum loci consuetudinem.

## CAPUT II

### RITUS PROFESSIONIS

#### DE MODO FACIENDI PROFESSIONEM IN FRATERNITATIBUS S. DOMINICI

33. Vitæ evangelicæ professionem,<sup>38</sup> qua Ordo noster per sæcula communionem inter fratres et laicos fovit,<sup>39</sup> etiam nostris temporibus sedulo promovet, laicos necnon et clericos in Fraternitates et Consociationes peramanter excipiens,<sup>40</sup> certam viam ita ipsis præbens qua propriam vocationem sæcularem in Ecclesia et in mundo adimplere possint, "secundum sancti Dominici spiritum et charisma".<sup>41</sup> Ipse

---

<sup>38</sup> Cf. LCO, n.149, § I. Verbum 'professio' , quo adhuc documenta officialia Ordinis pro Fraternitatibus S.Dominici (vide supra, adn. 3 et 4) utuntur, aliter ac in formulariis pro religiosis in hoc rito a sodalibus Fraternitatum adhibendo, propositum indicat vitæ evangelicæ ab illis laicis vel clericis assumptum qui, Ordini suo proprio vinculo adnexi, eius spiritum atque missionem participant (cf. CIC, c. 725) "secundum formam vivendi ab Ordine pro eorum statu in sæculo adaptatam" (LCO, n. 149, § I).

<sup>39</sup> Iam ipsis exordiis Ordinis, constat (cf. Vicaire, *Les origines*, pp. 392-409) sanc- tum Dominicum et aliquos inter fratres eius, licet adhuc sua sponte et actione individuali, fecundam actusositatem apostolicam exercuisse apud laicos, mulieres præser- tim (cf. Constantinus, n. 120). Sed et institutionalis forma hæc Ordinis necessitudo cum laicis initium habuit iam inde ab anno 1285, cum Magister Ordinis, Munio de Zamora (1285-1291), *Regulam Fratrum et Sororum Ordinis de Pœnitentia Beati Dominici* (= ROPD) edidit (cf. G.G. Meersseman, *Études sur les anciennes confréries dominicaines* , IV : *Les milices de Jésus-Christ* , in AFP 23 [1953], pp. 275-308). Exinde neminem latet quantopere in cunctis mundi regionibus necessitudo illa creverit atque quam multi moribus, doctrina ac sanctitate insigne decursu sæculorum in Fraternitatibus "de pœnitentia" sancti Dominici usque ad hodiernos dies claruerint.

<sup>40</sup> Praeclara testimonia habentur in ipsis Constitutionibus (cf. LCO, nn. 149-151) et in Actis Capitulorum Generalium (inde ab a.1968, præsertim Abulæ, 1986, nn. 85-89, et Città del Messico 1992, n. 128), conformiter ad traditionem Ordinis et ad doc- trinam Ecclesiæ post Concilium Vaticanum II renovatam, de laicorum vocatione et missione in Ecclesia et in mundo promovenda (cf. LG , nn. 30-38; AA, nn. 1-33; CL , nn. 1-64).

<sup>41</sup> RFL, n. 2; RFS, n. 3.

enim prædicationem Christi renovans clamantis «pænitentia et credite Evangelio»,<sup>42</sup> fidelium quoque in sæculo viventium ad Ordinem “de Pænitentia” seu de conversione nuncupatum accessum paravit.

34. Qui omnes ad Ordinem vocati evangelicam vitam secundum s. Dominici regulam viva fide agere profitentur in omnibus eorum inceptis et consiliis, iuxta propriam condicionem, tam in ambitu domestico et labore exercendo quam in ceteris actuositatibus, Deo et fratribus inservientes, veritatem in caritate facientes.<sup>43</sup>

35. Tam Fraternitatum sancti Dominici quam aliarum consociationum laicalium sodales<sup>44</sup> “Ordini incorporantur” professione seu speciali promissione,<sup>45</sup> qua directe Magistro Ordinis subduntur atque “communis vocationis participes suo modo missioni Ordinis in mundo inserviunt”.<sup>46</sup> Exinde, in corde ecclesialis missionis collocati, mutuam cum ceteris Familiae Dominicanæ coetibus collaborationem fovere conantur, “ut ministerium Ordinis diversis in campus tam Ecclesiæ quam mundi plenius exerceatur”.<sup>47</sup>

36. Professio vel promissio “ad tempus est aut perpetua”<sup>48</sup> et emittitur sub una eademque formula, temporis tantum indicatione mutata, prout in ritu habetur ex Regula Fraternitatum deprompta.<sup>49</sup>

37. Ritus professionis, tam ad tempus quam perpetuæ, fit in ecclesia Ordinis vel in ea ubi Fraternitas loci ordinarie coadunatur, utique coram communitate, convenienter quidem intra Missam vel in connexione cum celebratione alicuius Horæ divini Officii, Laudum præsertim aut Vesperarum.<sup>50</sup>

---

<sup>42</sup> Mc 1, 15.

<sup>43</sup> Cf. Ef 4, 15.

<sup>44</sup> Vide supra, adn. 2.

<sup>45</sup> Cf. RFL, n. 2; cf. *ibid.*, n. 14. Vide supra, adn. 38.

<sup>46</sup> LCO, n. 141.

<sup>47</sup> LCO, n. 150.

<sup>48</sup> Cf. RFL, n. 14. Pro sodalibus vero Fraternitatum clericalium professio tantummodo perpetua exstat (RFS, n. 13).

<sup>49</sup> Cf. RFL, n. 14 (et iam in ROPD IV, n. 13); RFS, n. 13, § 2.

<sup>50</sup> Cf. RP, n. 2.

38. Utraque laicorum professio, sive fratrum sive sororum, "recipitur a Responsabili laicali" — priore seu priorissa — Fraternitatis loci vel ab eorum delegatis, "simul cum Adsistente religioso";<sup>51</sup> presbyterorum vero professio, sive ad tempus sive perpetua, a superioribus Ordinis recipitur vel ab eorum delegatis.<sup>52</sup>

39. Vi talis professionis seu specialis promissionis, nomine Ecclesiæ ab Ordine acceptæ et ratificatæ, tam presbyteri quam utriusque sexus laici, "cum aliis cœtibus Ordinis unam familiam constituunt"<sup>53</sup> eiusque bonis spiritualibus fruuntur.<sup>54</sup>

40. De professione emissâ adnotatio fiat in libro professionum, quæ subscribatur ab unoquoque professorum et ab eo qui (vel ab ea quæ) ipsam recepit, una cum Adsistente religioso et secretario.

### RITUS PROFESSIONIS IN FRATERNITATIBUS S. DOMINICI INTRA MISSAM PERAGENDUS

41. Analogice ad hoc quod Ecclesia prævidet pro ceteris membris Familiæ Dominicanæ, hic ritus intra Missam peragendus proponitur, quamvis in hac sodalium Ordinis professione, sua ipsius natura,<sup>55</sup> absit consecrationis ratio, ob quam Ecclesia professorum oblationem Christi oblationi in Sacrificio eucharistico consociat.<sup>56</sup> Persuam utique peculiarem oblationem candidati ad Christi sequelam firmius convertuntur; communi innixi sacerdotio super baptismum fundato.

<sup>51</sup> Cf. RFL, n. 17.

<sup>52</sup> Cf. RFS, n. 16, § 2.

<sup>53</sup> Cf. RFL, n. 3 ; RFS, *Proœmium*, p. 200. Vide etiam LCO, n. 1, *Const. fund.*, § IX et n. 141.

<sup>54</sup> Ex indulto Pii VII, 6 iul. 1806: ACG 1932, *Const.* n. 236, I.

<sup>55</sup> Vide supra, adn. 38.

<sup>56</sup> Cf. LG, n. 45; OPR *Pr.*, n. 2 et RP, p. 106.

Commendatur igitur huius ritus collocatio intra Missam, ut baptismatis gratia — quam ipsi profitentes novis nexibus cupiunt roborari, vitam et missionem Ordinis amplectendo — per oblationem Christi pleniorum in eis sumat effectum. Ipsi enim, professione vitæ evangelicæ roborati, secundum spiritum et charisma Ordinis Prædicatorum, verbo et opere regnum Dei quærere satagunt in rebus temporalibus gerendis et secundum Deum ordinandis dum in sæculo vivunt, scilicet in mundi officiis et operibus atque in ordinariis condicionibus vitæ ministerialis vel familiaris et socialis: quo fit ut Baptismi gratia ubiores in eis afferat fructus ad ipsorum sanctificationem atque Ecclesiæ totiusque humanæ familiæ bonum.<sup>57</sup>

Maxima ergo adhibetur cura, ut huius ritus peculiaris indoles servetur neque ipsi ea inserantur quæ professionis religiosæ sunt.

42. Professio de more fit ad sedem specialem quæ pro Præsidente opportune paratur ante altare, distincta quidem a sede Celebrantis. In presbyterio autem omnia disponantur ut etiam alii fideles celebrationi convenienter possint adesse.

43. Adhibetur "Missa de die" vel, ad normam legum liturgicarum, Missa "votiva" de beata Maria Virgine vel de beato Dominico aliisve Sanctis, qui in Ordine de Pænitentia eminuerint, vel de mysterio quod spiritui Familiæ Dominicanæ aut devotioni profitentium magis congruat.<sup>58</sup>

44. Celebrationi Eucharisticæ ordinarie præest Adsistens Fraternitatis loci, sacerdotio prædictus, præter Magistrum Ordinis in universo Ordine, Priorem provincialem et Promotorem provincialem in sua quemque Provincia, si adiuncta id expostulant.

Sicubi celebrationi præsit prælatus Ordinis, Adsistens religiosus, qui sacerdos non sit sed frater vel soror Ordinis, cappa Ordinis adstet induitus, ubi mos est; aut superpelliceo et stola, si Ordinis non sit sodalis.<sup>59</sup>

---

<sup>57</sup> Cf. LG, n. 31; AA, n. 4; CL, nn. 8-17.28-29.33-36.49-56.

<sup>58</sup> Cf. RP, n. 25.

<sup>59</sup> Cf. supra, nn. 8-9.

### RITUS INITIALES

45. Celebratio opportune incipit cantu introitus cum processione ingressus ad altare, cui laudabiliter intersunt professuri, scapulari Ordinis induiti, comitantibus Responsabile laicali Fraternitatis loci atque Magistro (Magistra) novitiorum (vel novitiarum).

Cum ad presbyterium pervenerint, facta altari debita reverentia, omnes locis sibi designatis se disponunt; tum actio liturgica prosequitur.

46. Loco actus pænitentialis initio opportune haberi potest ritus aspersione aquæ benedictæ, ad evocandum nexum cum consecratione baptismali. Dicitur, iuxta rubricas, *Glória in excélsis* et sacerdos profert orationem collectam.

### LITURGIA VERBI

47. In liturgia verbi lectiones vel e "Missa diei" vel ex Sacra Scriptura libere sumi possunt, ex illis præsertim quæ in peculiari lectionario (infra, in Appendice I) proponuntur.

### PROFESSIO VITÆ EVANGELICÆ

#### *Interrogatio vel postulatio*

48. Dicto Evangelio omnes sedent, professuri vero stant ante altare. Tunc Præsidens, accedens ad gradus altaris, eorum voluntatem exquirit dicens:

Quid quæritis?

Cui omnes simul respondent:

Misericórdiam Dei et vestram.<sup>60</sup>

49. Vel, si placet, omissa Præsidentis interrogatione, unus ex professuris, stans ad Præsidentem conversus, nomine omnium postulationem facere potest his vel similibus verbis:

<sup>60</sup> Cf. *I Const.*, d. I, c. 13.

Nos, N. et N., cum misericórdia Dei  
sancti Domíni Régulam vobis tráditam novérimus  
et fraterne vobíscum probatiónis degérimus tempus,  
a te, N. N., huius Fraternitátis Præpósito (Præpósita), póscoimus  
ut in Órdine sancti Domíni, modo nobis proprio,  
professiónen vitæ evangélicæ emittámus  
et in hanc Fraternitátem incorporémur,  
ut dulcédinis societátis<sup>61</sup> et missiónis Órdinis  
efficiámur partícipes.

Præsidens et omnes adstantes hæc vel similia respondent:

Deo grátias.

---

### *Homilia seu allocutio*

50. His peractis, professuri quoque sedent et sacerdos facit homiliam in qua opportune illustrat tum lectiones biblicas tum peculiarem indolem vocationis sacerdotalis sodalium Fraternitatum sancti Dominici.

### *Interrogationes*

51. Homilia expleta, professuri surgunt et, si placet, ex flamma cerei Paschalis vel altaris candelam accendunt, quam in manibus accensam habebunt usque ad processionem offertorialem. Mox Celebrans voluntatem eorum requirit, interrogationibus quæ sequuntur vel istis similibus.

Celebrans:

Fratres dilectíssimi (Soróres dilectíssimæ)  
quos (quas) aqua et Spíritus Deo sacrávit,  
vultis novo título professiónis vitæ evangélicæ  
árctius Christo et Ecclésiae servítio mancipári? <sup>62</sup>

---

<sup>61</sup> Cf. Albertus Magnus, *Tract. in politicam*, in *Opera omnia*, vol. VIII, Paris 1891, p. 804.

<sup>62</sup> Cf. OPR I, n. 27; LCO, n. 149, § I; *ibid.*, n. 19, § II.

Professuri (vel professuræ) omnes simul respondent:

Volo, cum adiutorio Dei et vestro.<sup>63</sup>

Celebrans:

Vultis in novitáte vitæ ambuláre  
secúndum apostólicum propósitum,  
a sancto Domínico concéptum  
sicut evangélii præcónes sui sequéntes vestígia Salvatóris?<sup>64</sup>

Professuri (vel professuræ):

Volo, cum adiutorio Dei et vestro.

Celebrans:

Vultis, Deum et próximum serviéntes, cum Ecclésia sentíre  
et, ut membra Órdinis, eius missiónem apostólicam participáre  
oratióne, stúdio et prædicatióne,  
secúndum vestram laicálem condiciónem?<sup>65</sup>

Professuri (vel professuræ):

Volo, cum adiutorio Dei et vestro.

Tunc Præsidens eorum (earum) voluntatem confirmat dicens:

Dóminus qui incépit, ipse perficiat.<sup>66</sup>

Omnes:

Amen.

### *Divinæ gratiæ expositatio*

52. Interrogationibus expletis, supplicatio pro fratribus et sororibus professuris fieri potest, præsertim si de professione perpetua agitur.

---

<sup>63</sup> Directorium XI, 9, p. 118.

<sup>64</sup> Cf. LCO, n. 1, *Const. fund.*, § II.

<sup>65</sup> Cf. RFL, n. 4.

<sup>66</sup> I *Const.*, d. I, c. 13.

53. Pro supplicatione omnes surgunt. Sacerdos stans, manibus iunctis, ad populum conversus dicit:

Orémus, fratres dilectíssimi,  
Deum Patrem omnipoténtem  
ut super hos filios suos (et filias suas)  
quos (quas) ad pleniórem Christi sequélam vocávit,  
benedictiónis suæ grátiam cleménter effúndat  
eósque (eásque) in sancto propósito  
benígna pietáte confírmet.

54. Mox sacerdos adstantes ad orationem invitat dicens:

Orémus.

Omnes per aliquod temporis spatiū silentio orant. Deinde sacerdos dicit:

Réspice, quæsumus Dómine,  
super hos filios tuos (filias tuas)  
qui (quæ) hódie coram Ecclésia  
corde pæniténti vitam evangélicam profiténtur,  
et præsta ut baptísmatis grátia,  
quam novis cùpiunt néxibus roborári,  
plenum in eis sumat efféctum  
quo Sancti Spíritus muníti (munítæ) præsídiis  
tuæ maiestáti cultum retríbuant débitum  
et Christi regnum apostólico dilátent ardóre.  
Per Christum Dóminum nostrum.

R. Amen.

### *Professio*

55. His præhabitís, Præsidens cui spectat professionem accipere vadit ad sedem ibi specialiter præparatam pro recipienda professione.

Tunc unusquisque novitiorum vel novitiarum, genuflectens ante Præsidentem, professionem facit. In professione emittenda sequens aut similis quoad substantiam formula adhibeatur:

Ad honórem Dei omnipoténtis  
 Patris et Fílii et Spíritus Sancti,  
 et beátæ Mariæ Vírginis et sancti Domínici,  
 ego N. N., coram vobis:  
 N. N., Priore (Præsidénte) huius Fraternitatis  
 et N. N., Adsisténte,  
 vice Magístri Órdinis Fratrum Prædicatórum,  
 promítto me velle vívere secúndum Régulam  
 Laicórum sancti Domínici  
 per triénnium (*vel*: per totam vitam).<sup>67</sup>

Si autem professuri complures sunt, professionis formula ab omnibus simul recitari potest, a singulis vero concludenda est verbis: «Promítto me velle...» vel similibus, quæ in ipsa formula singulorum voluntatem declarent.

### *Osculum pacis et insignium professionis traditio*

56. Emissa professione, tantummodo Præsidens singulos profitentes recipit ad osculum pacis, quod est signum cooptationis ad Ordinem et admissionis in Fraternitatem localem.<sup>68</sup> Deinde ipsi ad locum suum redeunt ibique stant.

57. Tunc Praesidens professos admonet quod per cooptationem ad Ordinem ipsi ad participationem bonorum spiritalium universi Ordinis sancti Dominici admissi sunt.<sup>69</sup>

58. Deinde, ubi mos est, fratres et sorores nuper profissi accedunt ad Præsidentem (aut ad Celebrantem), qui Evangelii librum unicuique tradit his vel similibus verbis:

Áccipe Evangélium pacis<sup>70</sup>  
 quod sit in corde tuo et in ore tuo,  
 ut móribus tuis ipsum testificans  
 et fidéliter annúntians,

<sup>67</sup> RFL , n. 14; RFS, n. 13, § 2.

<sup>68</sup> Cf. supra, n. 1.

<sup>69</sup> Cf. supra, nn. 39 et 23.

<sup>70</sup> Cf. Iordanus, n. 57.

sal terræ et lux mundi efficiáris,<sup>71</sup>  
ad honórem quidem Dei et animárum salútem.

Professus (vel professa) respondet:

Amen.

Et, accepto libro, ad locum suum redit ibique stat.

59. Si autem nuper professi sunt multi, aliave iusta de causa, Præsidentis (aut Celebrans) Evangelii librum eis tradit formulam recitans semel pro omnibus, plurali aptatam.

60. Si secundum consuetudines locorum alia professionis insignia (ex. gr. Rosarii corona, numisma s. Dominici, anulum vel signaculum Ordinis) tradenda sunt, hic tradantur silentio vel apta formula, decora sobrietate servata.

### *Conclusio ritus professionis*

61. Symbolum dicitur si rubricis liturgiæ diei præscribitur. Ritus apte concluditur recitatione orationis universalis seu fidelium (cf. infra in Appendice II, nn. 62-65).

## LITURGIA EUCHARISTICA

62. Dum cantus ad offertorium peragitur, fratres et sorores nuper professi ad altare processionaliter accedunt cum candelis accensis sacerdoti offerendis, quas deinde ministrantes disponunt in loco apto; nonnulli vero ex ipsis fratribus et sororibus opportune afferunt panem, vinum et aquam pro Sacrificio eucharistico et, si placet, alia dona iuxta consuetudines loci.

63. Postquam sacerdos Eucharistiam sumpsit, etiam omnes adstantes eam sub utraque specie sumere possunt, servatis semper dispositionibus Conferentiarum Episcoporum et Episcopi diocesani.

---

<sup>71</sup> Cf. *Rm* 10,8; *Mt* 5,13.14.

## DIMISSIONIS

64. Oratione post communionem expleta, fratres et sorores nuper professi ante altare sistunt et sacerdos eos more solito una cum populo benedit; vel, pro opportunitate, manibus super eos et populum extensis, dicere potest:

Deus, tanti óperis auctor et custos,  
supérna sua vos tueátur grátia,  
ut vestræ vocatiónis múnera fidéliter persolvátis.

R/. Amen.

Ipse divínæ vos fáciat caritátis  
apud omnes testimónium et signum,  
ut pópulus Dei prompta respóndeat actuositáte.

R/. Amen.

Divíni sui Spíritus advocántis grátia  
corda vestra efficáciter fecúndet  
pro Ecclésiæ et humánæ familiæ proféctu.

R/. Amen.

Et benedictio Dei omnipoténtis,  
Patris, et Fílii, ☩ et Spíritus Sancti,  
descéndat super vos et máneat semper.

R/. Amen.

65. Deinde diaconus vel sacerdos adstantes dimittit dicens:

Ite, missa est.

R/. Deo grátias.

66. Post dimissionem, actio liturgica concludi potest, sicut mos est pro quibusdam celebrationibus in Ordine, cantu *Salve Regína* vel alio cantu congruo; quo expleto, adstantes nuper professos salutant secundum loci consuetudinem.

**RITUS PROFESSIONIS  
EXTRA MISSAM PERAGENDUS**

67. Quando ritus professionis extra Missam peragitur,<sup>72</sup> inseri potest in celebrationem verbi Dei, modo sequenti:

- a) post cantum aptum, fit interrogatio vel postulatio candidatorum (nn. 48-49);
- b) sequitur lectio verbi Dei, cui responditur cantu psalmi apti (cf. infra, in Appendice I). Fit deinde allocutio Præsidentis;
- c) postea ipse ritus professionis habetur (nn. 51-60);
- d) ritus concludi potest oratione universalis (cf. infra, in Appendice II, nn. 62-65) — addita, si placet, *Oratione dominica* — et benedictione sollemni (n. 64).

68. Quando autem ritus intra Liturgiam Horarum peragitur (præsertim Laudum vel Vesperarum), proceditur modo sequenti:

- a) post hymni cantum, fit interrogatio vel postulatio candidatorum (nn. 48-49);
- b) sequuntur psalmodia et lectio verbi Dei, quod seligi potest ex textibus in Lectionario præbitis (cf. infra, in Appendice I). Fit deinde allocutio Præsidentis;
- c) postea ipse ritus professionis habetur (nn. 51-60);
- d) canitur postea *Canticum Zachariæ* vel *Magnificat*;
- e) deinde dicitur oratio universalis seu fidelium (cf. infra, in Appendice II, nn. 62-65);
- f) ritus concluditur recitatione *Orationis dominicæ*, oratione finali et benedictione sollempni (n. 64).

---

<sup>72</sup> Cf. «Intr. gen.», n. 12.

## APPENDIX



# I

## LECTIONES BIBLICÆ\*

### E VETERE TESTAMENTO

1. Gen 12, 1-4  
*Egredere de terra tua, et de cognatione tua, et veni.*  
In diebus illis: Dixit Dominus ad Abram...  
v. 4 usque ad *Dominus*.
2. I Sam 3, 1-10  
*Loquere, Domine, quia audit servus tuus.*  
In diebus illis: Puer Samuel ministrabat Domino...
3. I Reg 19, 4-9a. 11-15a  
*Sta in monte coram Domino.*  
In diebus illis: Perrexit Elias in desertum...  
v. 9 usque ad *in spelunca*; v. 15 usque ad *in Damascum*.
4. I Reg 19, 16b. 19-21.  
*Consurgens Eliseus abiit et secutus est Eliam.*  
In diebus illis: Dixit Dominus ad Eliam: «Eliseum,  
filium Saphat...».
5. Cant 2, 8-14  
*Surge, amica mea, et veni.*  
Vox dilecti mei: ecce iste venit...
6. Cant 8, 6-7  
*Fortis est ut mors dilectio.*  
Pone me ut signaculum...
7. Is 61, 9-11  
*Gaudens gaudebo in Domino.*  
Scient in gentibus semen populi mei...

---

\* Hæc selectio deprompta est ex *Ordine Professionis Religiosæ* (1975).

8. Os 2, 14.19-20 (hebr.: 2,16.21-22)  
*Sponsabo te mihi in sempiternum.*  
Hæc dicit Dominus: «Ecce ego lactabo eam...». [Versus 14 (16) poni debet secundum hebraicam veritatem].

### PSALMI RESPONSORII

9. Ps 23, 1-2, 3-4ab, 5-6  
R/. Hæc est generatio quærentium faciem tuam, Domine.
10. Ps 26, 1, 4, 5, 8b-9abc, 9d et 11  
R/. Faciem tuam, Domine, requiram.
11. Ps 32, 2-3, 4-5, 11-12, 13-14, 18-19, 20-21  
R/. Beatus populus quem elegit Deus in hereditatem sibi.
12. Ps 33, 2-3, 4-5, 6-7, 89  
*Vel:*  
10-11,12-13,14-15, 17 et 19  
R/. Benedicam Domino in omni tempore.  
*Vel:*  
R/. Gustate et videte quoniam suavis est Dominus.
13. Ps 39, 2 et 4ab, 7-8a, 8b-9, 10, 12  
R/. Ecce venio, Domine, facere voluntatem tuam.
14. Ps 44, 11-12, 14-15, 16-17  
R/. Ecce sponsus, exite obviam Christo Domino.
15. Ps 62, 2, 3-4, 5-6, 8-9  
R/. Sitivit in te anima mea, Deus meus.
16. Ps 83, 3, 4, 5-6a e 8a, 11, 12  
R/. Quam dilecta tabernacula tua, Domine virtutum.
17. Ps 99, 2, 3, 4, 5  
R/. Introite in conspectu Domini in exultatione.

## E NOVO TESTAMENTO

18. Act 2, 42-47  
*Omnis qui crediderant erant pariter et habebant omnia communia.*  
 In diebus illis: Erant discipuli perseverantes in doctrina apostolorum...
19. Act 4, 32-35  
*Cor et anima una.*  
 In diebus illis: Multitudinis credentium erat cor et anima una...
20. Rom 6, 3-11  
*In novitate vitæ ambulemus.*  
 Fratres: Quicumque baptizati sumus in Christo Iesu...
21. Rom 12, 1-13  
*Exhibete corpora vestra hostiam viventem, sanctam, Deo placentem.*  
 Obsecro vos, fratres, per misericordiam Dei...
22. I Cor 1, 22-31  
*Infirma mundi elegit Deus, ut confundat fortia.*  
 Fratres: Iudæi signa petunt...
23. I Cor 7, 25-35  
*Virgo cogitat quæ Domini sunt.*  
 Fratres: De virginibus præceptum Domini non habeo...
24. Eph 1, 3-14  
*Elegit nos Deus in Christo ut essemus sancti et immaculati in caritate.*  
 Benedictus Deus et Pater Domini nostri Iesu Christi...
25. Phil 2, 1-4  
*Idem sapiatis, eandem caritatem habentes, unanimes.*  
 Fratres: Si qua consolatio in Christo...
26. Phil 3, 8-14  
*Omnia detrimentum feci, ut Christum lucrifaciam.*  
 Fratres: Existimo omnia detrimentum esse...

27. Col 3, 1-4  
*Quæ sursum sunt sapite, non quæ super terram.*  
Fratres: Si conresurrexistis cum Christo...
28. Col 3, 12-17  
*Super omnia hæc caritatem, quod est vinculum perfectionis.*  
Fratres: Induite vos sicut electi Dei...
29. I Th 4, 1-3.7-12  
*Hæc est voluntas Dei, sanctificatio vestra.*  
Fratres: Rogamus vos et obsecramus...
30. I Petr 1, 3-9  
*Cum Iesum Christum non videritis, diligitis.*  
Benedictus Deus et Pater Domini nostri Iesu Christi...
31. I Io 4, 7-16  
*Si diligamus invicem, Deus in nobis manet.*  
Carissimi, diligamus invicem...
32. Ap 3, 14.20-22  
*Cenabo cum illo et ipse mecum.*  
Hæc dicit Amen, Testis fidelis...
33. Ap 22, 12-14.16-17.20  
*Veni, Domine Iesu !*  
Ego Ioannes audivi vocem dicentem mihi:  
«Ecce venio cito...».

#### ALLELUIA ET VERSUS ANTE EVANGELIUM

34. Ps 132, 1  
Ecce quam bonum et quam iucundum  
habitare fratres in unum!
35. Cf. Mt 11, 25  
Benedictus es, Pater, Domine cæli et terræ,  
quia mysteria Regni parvulis revelasti.

36. Cf. Mt 19, 27.29

Vos qui reliquistis omnia et secuti estis me  
centuplum accipietis et vitam æternam possidebitis.

37. Cf. Mt 25, 1.6

Accensam servate lampadam fidei vestræ  
et flammam caritatis fovete:  
ecce Sponsus venit.

38. Lc 11, 28

Beati qui audiunt verbum Dei  
et custodiunt illud.

39. Io 13, 34

Mandatum novum do vobis, dicit Dominus,  
ut diligatis invicem sicut dilexi vos.

40. Io 14, 23

Si quis diligit me, sermonem meum servabit,  
et Pater meus diligit eum, et ad eum veniemus,  
et mansionem apud eum faciemus.

41. Io 15, 5

Ego sum vitis, vos palmites, dicit Dominus;  
qui manet in me et ego in eo, hic fert fructum multum.

42. Cf. 2 Cor 8, 9

Iesus Christus egenus factus est,  
cum esset dives, ut illius inopia nos divites essemus.

43. Gal 2,19-20

Christo confixus sum cruci.  
Vivo autem, iam non ego: vivit vero in me Christus.

44. Gal 6,14

Mihi absit gloriari, nisi in cruce Iesu Christi,  
per quem mihi mundus crucifixus est et ego mundo.

45. Phil 3,8-9

Omnia detrimentum feci,  
ut Christum lucrifaciam et inveniar in illo.

46. Cf. 2 Ts 2,12.13

Elegit nos Deus primitias in salutem,  
in acquisitionem passionis et gloriæ Domini nostri  
Iesu Christi.

### EVANGELIA

47. Mt 5, 1-12

*Beati ... Gaudete et exsultate.*

In illo tempore: Iesus docebat discipulos dicens: ...

48. Mt 11, 25-30

*Abscondisti hæc a sapientibus, et revelasti ea parvulis.*

In illo tempore respondens Iesus dixit ...

49. Mt 16, 24-27

*Qui perdiderit animam suam propter me, inveniet eam.*

In illo tempore: Dixit Iesus discipulis suis: ...

50. Mt 19,3-12

*Qui potest capere, capiat.*

In illo tempore: Accesserunt ad Iesum Pharisei ...

51. Mt 19,16-26

*Si vis perfectus esse, vade, vende quæ habes, et sequere me.*

In illo tempore: Ecce unus accedens ad Iesum ait illi ...

52. Mt 25, 1-13

*Ecce sponsus, exite obviam ei.*

In illo tempore: Dixit Iesus discipulis suis parabolam hanc:  
«Simile erit Regnum cœlorum decem virginibus...».

53. Mc 3, 31-35

*Qui fecerit voluntatem Dei, hic frater meus et soror mea et  
mater est.*

In illo tempore: Venit Mater Iesu et fratres...

54. Mc 10,24b-30

*Ecce nos dimisimus omnia et secuti sumus te.*

In illo tempore: Ait Iesus discipulis suis: «Fili...».

55. Lc 9,57-62  
*Nemo mittens manum suam in aratrum et aspiciens retro, aptus est Regno Dei.*  
In illo tempore: Ambulantibus Iesu et discipulis suis in via...
56. Lc 10, 38-42  
*Martha exceptit illum. Maria optimam partem elegit.*  
In illo tempore: Intravit Jesus in quoddam castellum...
57. Lc 11, 27-28  
*Beati qui audiunt verbum Dei et custodiunt.*  
In illo tempore: Extollens vocem quædam mulier...
58. Io 12, 24-26  
*Si granum frumenti mortuum fuerit, multum fructum affert.*  
In illo tempore: Dixit Jesus discipulis suis:  
«Amen, amen dico vobis...».
59. Io 15, 1-8  
*Qui manet in me et ego in eo, hic fert fructum multum.*  
In illo tempore: Dixit Jesus discipulis suis: «Ego sum vitis vera...».
60. Io 15,9-17  
*Vos amici mei estis, si facietis quæ ego præcipio vobis.*  
In illo tempore: Dixit Jesus discipulis suis:  
«Sicut dilexit me Pater...».
61. Io 17, 20-26  
*Volo ut ubi sum ego, et illi sint mecum.*  
In illo tempore: Sublevatis Jesus oculis in cælum, oravit dicens: «Pater sancte, non pro his rogo tantum...».

## II

### ORATIO UNIVERSALIS SEU FIDELIUM

62. Formularium parari potest iuxta textus hic infra præbitos, ex quibus ea possunt seligi elementa quæ magis idonea putantur, vel alia apte parari possunt.

#### 63. Monitio

##### a) **in initio novitiatus:**

Recordántes, fratres dilectíssimi, Christi verba:  
«Sine me nihil potéstis fáceré»,  
per ipsum exorémus misericordiárum Patrem  
pro géntium salúte,  
pro témporum tranquillitaté,  
pro his frátribus (soróribus) nostris  
quos (quas) hódie in famíliam nostram recípimus.

##### b) **in Missa primæ professionis:**

Celebrántes, fratres dilectíssimi,  
paschále Christi mystérium  
et istórum fratrū (istárū sorórū)  
professiónis primórdia,  
ad Deum Patrem omnipoténtem  
per Iesum Christum, evangélicæ vitæ auctórem,  
commúnes dirigámus preces.

##### c) **in Missa professionis perpetuæ:**

Gaudet hódie, fratres dilectíssimi,  
nostra spirituális família,  
quod hi fámuli (hæ fámulæ) Dei, professióne perpétua,  
Christi et Ecclésiæ student impénsius deservíre;  
ad Deum Patrem ígitur,

a quo vocatiōnis donum descéndit,  
preces dirigámus unánimi.

d) in Missa qua vota renovantur:

Súpplices, fratres dilectíssimi,  
ad Deum Patrem dirigámus preces  
pro Ecclésia sancta eius,  
pro mundi pace et salúte,  
pro nostra religiosa família,  
pro his frátribus (soróribus) nostris  
qui (quae) sacra vota hódie renovárunt.

64. Intentiones

I. Pro Ecclésia sancta Dei:

ut filiorum suórum decoráta virtútibus,  
Christo Sponso  
fulgídior in dies eníteat,  
Dóminum exorémus. **R.**

Pro Summo Pontífice ceterisque Episcopis:  
ut Spíritus Sanctus, qui replévit Apóstolos,  
in eórum successóres  
incessabiliter défluat,  
Dóminum exorémus. **R.**

Pro univérsis Ecclésiæ minístris:  
ut sermóne et opéribus  
in salútem ducant pópulum sibi commíssum,  
Dóminum exorémus. **R.**

II. Pro mundi pace et salúte:

ut religíosi omnes  
Christi pacis præcónes sint atque minístri,  
Dóminum exorémus. **R.**

Pro universárum géntium bono:  
ut omnes divíno servítio addícti,

cælestia sectantes,  
hominum quoque profectum  
indesinenter foveant,  
Dominum exorémus. *A.*

Pro pauperibus et afflictis:  
ut divini Magistri exemplo  
religiōsis cordi sit  
páuperes evangelizare,  
infirmos curare,  
laborantibus subvenire,  
Dominum exorémus. *A.*

Pro iis qui longe morantur a Deo:  
ut omnes filii beati Domíni  
donum a se accéptum  
illis communicandi sint sollíciti  
et desiderium veritatis caritatisque Christi  
in illis foveant,  
Dominum exorémus. *A.*

Pro cunctis Christi fidelibus:  
ut arcánam Dei vocem  
ad sanctitatem omnes invitantem  
áuribus inténtis percípiant,  
Dominum exorémus. *A.*

**III. Pro univérsis religiōsis:**  
ut eorum conversatio  
futuri Regni signum exsistat præclarum,  
Dominum exorémus. *A.*

Pro nostra Província (pro nostro Monastério;  
pro nostro Institúto; pro nostra Fraternitate):  
ut mútuæ dilectionis præceptum  
in ipsa (ipso) præfulgeat,  
ut sicut pristinis Iesu discípulis  
nobis cor unum sit et anima una,  
Dominum exorémus. *A.*

Pro sodálibus Familiæ Dominicánæ,  
ut vitam Ecclésiæ partícipent  
eiúsque incépta et propósita  
pro víribus fóveant,  
Dóminum exorémus. **R.**

Pro sodálibus Familiæ Dominicánæ,  
ut sicut quisque vocátus est  
Ecclésiæ sanctitátem adáugeat  
et regnum Dei stúdeat propagáre,  
Dóminum exorémus. **R.**

Pro sodálibus Familiæ Dominicánæ,  
ut Deo véluti spiritálem oblatiōnem  
læto corde ófferant  
oratiōnem et stúdium,  
labórem et prædicatiōnem,  
huius vitæ gáudia et tribulatiōnes,  
Dóminum exorémus. **R.**

**IV.** Pro his frátribus (soróribus) nostris,  
qui (quæ) hódie divíno servítio  
árctius mancipántur:  
ut spíritum fratérnæ dilectionis  
et strénuæ erga omnes caritatis  
in ipsis fovére dignétur,  
Dóminum exorémus. **R.**

Pro iis qui (quæ) evangélica consília hódie profiténtur:  
ut religiosa consecratiō  
illam adáugeat sanctitátem,  
ad quam eos (eas) baptísmum vocávit,  
Dóminum exorémus. **R.**

Pro his frátribus (soróribus) nostris,  
qui (quæ) hódie professióne religiosa  
Deo impénsius se devovérunt:  
ut eis assíduæ oratiōnis,  
álacris pænitentiæ,

fervéntis apostolátus  
amórem benígnus infúndat,  
Dóminum exorémus. *R.*

Pro his frátribus (soróribus) nostris *N.N.*,  
qui (quæ) professióne religiosa  
Christum préssius sequi conténdunt:  
ut castitátem custodiéntes  
Ecclésiæ fecunditátem osténdant;  
paupertátem sectántes  
egénis subvéniant;  
oboediéntiam præstántes  
indóciles ad suave Redemptóris iugum addúcant,  
Dóminum exorémus. *R.*

Pro his soróribus nostris,  
quæ hódie se Christo Dómino devovérunt:  
ut, vírgines prudéntes imitátæ,  
amóris et fídei lámpades  
diligénter alant,  
Dóminum exorémus. *R.*

Pro his soróribus nostris,  
quæ hódie sanctum firmárunt propósitum:  
ut Sponsum vigilántes exspéctent  
et cum eo ad cælestes núptias  
mereántur admítti,  
Dóminum exorémus. *R.*

Pro his frátribus (soróribus) nostris *N.N.:*  
ut ipsi (ipsæ), mundi lux et ferméntum effécti (efféctæ),  
humánam societátem  
virtútum fulgóre illúminent  
et assíduis rénovent précibus,  
Dóminum exorémus. *R.*

- V. Pro paréntibus et propínquis horum fratrum nostrorum  
(harum sorórum nostrárum):  
ut in suo itínere fídei

partípices ipsi efficiántur  
 oblationis atque missiónis filiórum (filiárum)  
 et nova gratiæ múnera accípiant  
 ad suam ipsi vocatiónem perficiéndam,  
 Dóminum exorémus. R.

**VI. Pro nobis ómnibus:**

ut divíni Magístri verba «Estóte perfécti»  
 fidéliter amplexténtes,  
 dignos sanctificatiónis fructus exhibeámus,  
 Dóminum exorémus. R.

65. Precationis conclusio

**a) in initio novitiatus:**

Tuére, Dómine, famíliam tuam  
 et propitiátus concéde  
 quod pro his frátribus (soróribus) nostris,  
 primítias suæ donatiónis tibi offeréntibus,  
 concórdi exorávimus prece.  
 Per Christum Dóminum nostrum.

Omnes: Amen.

**b) in Missa primæ professionis:**

Sanctitatis auctor, Deus,  
 preces familiæ tuæ cleménter exáudi,  
 et, deprecánte beáta Virgo María,  
 Órdinis nostri patróna,  
 super hos fámulos tuos (has fámulas tuas)  
 copiósam benedictióinem effúnde,  
 ut quod, te donánte, promisérunt,  
 te prosequénte, constánter adímplicant.  
 Per Christum Dóminum nostrum.

Omnes: Amen.

c) in Missa professionis perpetuæ:

Ánnue, Dómine, præcibus pópuli tui,  
et intercedénte beáta Vírgine María,  
Ecclésiæ matre et nostri Órdinis patróna,  
super hos fámulos (has fámulas),  
quos (quas) ad perféctam Christi sequélam  
benígnus vocásti,  
divínū Spíritum abundánter effúnde,  
ut quod temporáli pígnore promisérunt,  
perpétua devotióne confírment.  
Per Christum Dóminum nostrum.

Omnes: Amen.

d) in Missa qua vota renovantur:

Veritátis auctor et misericórdiæ Deus,  
supplicatiōnes pópuli tui benígnus exáudi,  
et, intercedénte beáta Vírgine María, Órdinis patróna,  
his fámulis tuis  
perseverántiæ virtútem infúnde,  
ut vota, quæ te donánte renovárunt,  
te prosequénte constánter adímpleant.  
Per Christum Dóminum nostrum.

Omnes: Amen.

### III

## PRÆFATIONES

#### *66. In veritate sanctificati*

Vere dignum et iustum est, æquum et salutáre,  
nos tibi semper et ubíque grátias ágere,  
Dómine, sancte Pater, omnípotens ætérne Deus:

Qui inter multos ad te in via Domínici gradiéntes  
semper novos fratres et soróres addúcis.  
Quos ergo, Pater, misericórditer in Fílio vocásti  
et in tua veritáte sanctificáre voluísti,  
ipse verbo salútis erudíre et ad salútem addúcere  
sitiénti desidério conténdis,  
fidei sacraméntis grátia perfúndis  
et in unitáte consummáre  
apostólica sátagis caritáte.

Unde et nos, Dómine, cum Ángelis et Sanctis univérsis  
tibi confitémur, in exultatione dicéntes...<sup>1</sup>

#### *67. De apostolica vivendi forma*

Vere dignum et iustum est, æquum et salutáre,  
nos tibi semper et ubíque grátias ágere,  
Dómine, sancte Pater, omnípotens ætérne Deus:

Qui, ad Ecclésiæ tuæ sanctæ decus muniménque præstándum,  
apostólicam voluísti vivéndi formam  
per beátum Domínicum renováre.

---

<sup>1</sup> Cf. MLOP, p. 293.

Ipse enim, Christum páuperem prosecútus,  
evangélicæ veritáti mentes errántium  
sua prædicatióne subiécit,  
atque áimas Christo lucrifécit innúmeras.

Fídei quoque præcónes sibi cómites sapiénter adiúnxit,  
qui, supérnæ sciéntiæ lúmine roboráti,  
evangelizatiónis óperi iúgiter deservírent.

Et ídeo cum Sanctis et Ángelis univérsis  
te collaudámus, sine fine dicéntes...<sup>2</sup>

#### 68. *Evangelicæ veritatis prædicator eximius*

Vere dignum et iustum est, æquum et salutáre,  
nos tibi semper et ubíque grátias ágere,  
Dómine, sancte Pater, omnípotens ætére Deus:

Qui beátum Domínicum, veritátis tuæ præcónem,  
de fóntibus Salvatóris altíssimis hauriéntem,  
sitiénti mundo próvide tribuísti.

Is enim, Genetrícis Fílii tui semper ope suffúltus,  
salútis animárum zelo inflammátus,  
offícium Verbi pro se suísque in Spíritu coadunátis suscípiens,  
fídei púgiles ad salváandas gentes instítuit  
et multos doctrína et exémplo ad Christum addúxit.

Tecum vel de te iúgiter loquens, sapiéntia profécit  
et, actiόnem de plenitúdine contemplatiónis edúcens,  
ædificándæ Ecclésiæ tuæ se totum impéndit.

Et ídeo cum Ángelis et ómnibus Sanctis,  
glóriam tuam prædicámus, una voce dicéntes...<sup>3</sup>

---

<sup>2</sup> Cf. MLOP, p. 177.

<sup>3</sup> MLOP, p. 199.

*69. De vita religiosa ut servitio Dei per Christi imitationem*

Vere dignum et iustum est, æquum et salutáre,  
nos tibi semper et ubíque grátias ágere,  
Dómine, sancte Pater, omnípotens ætére Deus,  
per Christum Dóminum nostrum.

Qui de radíce Vírginis flos illibátus egréssus,  
mundos corde dixit beátos  
suáque conversatióne dócuit castitatis fastígium.

Qui tuis semper beneplácitis optávit hærére,  
et usque ad mortem pro nobis factus oboédiens,  
hóstiam se tibi vóluit perféctæ suavitatis offérre.

Qui ómnia propter te relinquéntes in terris  
ad servítium tuæ maiestatis dicávit impénsius  
et cælórum confirmávit inventúros esse thesáurum.

Et ídeo, cum Angelórum atque Sanctórum turba,  
hymnum laudis tibi cánimus, sine fine dicéntes ...<sup>4</sup>

*70. Sanctorum exemplum, consortium et subsidium<sup>5</sup>*

Vere dignum et iustum est, æquum et salutáre,  
nos tibi semper et ubíque grátias ágere,  
Dómine, sancte Pater, omnípotens ætére Deus:

Qui in Sanctórum concílio celebráris  
et eórum coronándo mérita, tua dona corónas.  
Qui nobis eórum conversatióne largíris exémplum  
et communióne consórterum et intercessióne subsídium;  
ut, tantis téstibus confirmáti,  
ad propósitum certámen currámus invícti

<sup>4</sup> *Missale Romanum*, 1975<sup>2</sup>, p. 767.

<sup>5</sup> Cf. LCO, n. 67, § III.

et immarcescibilem cum eis corónam glóriæ consequámur,  
per Christum Dóminum nostrum.

Et ídeo cum Ángelis et Archángelis,  
cumque multíplici congregatióne Sanctórum,  
hymnum laudis tibi cánimus, sine fine dicéntes ...<sup>6</sup>

---

<sup>6</sup> MLOP, p. 247.

## IV

### TEXTUS AD LIBITUM

#### A) LITANIÆ SANCTORUM IN PROFESSIONE PERPETUA

71. In professionibus Ordinis nostri numquam locum habuerunt Litaniæ Sanctorum neque alia brevis supplicatio litanica. Nihilominus hic "Litaniæ ritus professionis religiosæ", prout hodie ab Ecclesia proponuntur (cf. OPR, I, n. 62; II, n. 67), ad libitum traduntur.

Apto autem loco — nominum Sanctorum in liturgia consueta successione servata — inseri possunt invocationes eorum Sanctorum, qui a professuris vel a communitate peculiari veneratione coluntur, necnon, pro opportunitate, aliae petitiones addi possunt. In seligendis vero invocationibus sobrietas adhibenda est, pietatis simul ac simplicitatis causa.

In cantu adhiberi potest tonus Processionalis O.P. (pp. 127-131), vel qui invenitur in Officio Hebdomadæ Sanctæ O.P. (Romæ 1965, pp. 256-258; 267-269), vel qui in appendice Missalis et Lectionarii O.P. (ed. 1985, pp. 519-526) exscriptus est.

72. Diaconus vel alias minister admonet:

Flectámus génuá.

Mox sacerdos ante sedem suam genua flectit; professuri (professuræ) vero, secundum loci consuetudinem, vel procumbunt vel genua flectunt; ceteri quoque genua flectunt, exceptis tempore paschali et dominicis, cum omnes, exceptis professuris, stantes remanent.

73. Tunc cantores (vel cantorissæ) Litanias ritus professionis religiosæ canunt, omnibus respondentibus.

Kýrie, éléison.

Kýrie, éléison.

Christe, éléison.

Christe, éléison.

Kýrie, éléison.

Kýrie, éléison.

Sancta María, Mater Dei,

ora pro nobis

Sancte Míchaël,	ora pro nobis
Sancti Angeli Dei,	oráte pro nobis
Sancte Ioánnes Baptista	ora pro nobis
Sancte Ioseph	ora pro nobis
Sancti Petre et Paule	oráte pro nobis
Sancte Andréas	ora pro nobis
Sancte Ioánnes	ora pro nobis
Sancta María Magdaléna	ora pro nobis
Sancte Stéphane	ora pro nobis
Sancte Ignáti (Antiochéne)	ora pro nobis
Sancte Laurénti	ora pro nobis
Sanctæ Perpétua et Felícitas	oráte pro nobis
Sancta Agnes	ora pro nobis
Sancte Gregóri	ora pro nobis
Sancte Augustíne	ora pro nobis
Sancte Athanási	ora pro nobis
Sancte Basíli	ora pro nobis
Sancte Martíne	ora pro nobis
Sancte Benedícte	ora pro nobis
Sancte Francísce	ora pro nobis
Sancte Pater Domínice	ora pro nobis
Sancte Thoma (de Aquíno)	ora pro nobis
Sancte Albérte	ora pro nobis
Sancte Martíne (de Porres)	ora pro nobis
Sancte Francísce (Xavier)	ora pro nobis
Sancta Margaríta (de Hungaría)	ora pro nobis
Sancta Catharína (Senénsis)	ora pro nobis
Sancta Rosa (de Lima)	ora pro nobis
Sancta Therésia (de Ávila)	ora pro nobis
Sancti et sanctæ Dei	oráte pro nobis
Propítius esto,	líbera nos, Dómine
Ab omni malo	líbera nos, Dómine
Ab omni peccáto	líbera nos, Dómine
A morte perpétua	líbera nos, Dómine
Per incarnatióñem tuam	líbera nos, Dómine
Per mortem et resurrectióñem tuam	líbera nos, Dómine
Per effusiónem Spíritus Sancti	líbera nos, Dómine

Propítius esto,

líbera nos, Dómine

- a) Ut Ecclésiæ vitam, famulórum tuórum  
(famulárum tuárum)  
oblatióne et apostolátu,  
uberiórem præstare dignéris,  
te rogámus, audi nos
- a) Ut in fámulo tuo Papa nostro N.  
ceterisque Epíscopis  
Sancti Spíritus dona in dies  
adaugére dignéris,  
te rogámus, audi nos
- b) Ut religiosórum vitam et óperam  
ad humánæ societátis proféctum  
ordináre dignéris,  
te rogámus, audi nos
- b) Ut univérsos hómines  
ad vitæ christiánæ plenitúdinem  
dúcere dignéris,  
te rogámus, audi nos
- c) Ut in ómnibus familiis tibi dicátis  
Christi caritátem et Fundatórum  
spíritum conserváre et augére  
dignéris,  
te rogámus, audi nos
- c) Ut omnes qui evangélica  
profiténtur consília,  
óperi Redemptiónis plénius  
adsociáre dignéris,  
te rogámus, audi nos
- d) Ut horum famulórum  
(harum famulárum) paréntes  
pro múnere quod tibi obtulérunt,  
cælestibus donis  
locupletáre dignéris,  
te rogámus, audi nos
- e) Ut hos fámulos tuos (has fámulas tuas)  
Christo, primogénito in multis  
frátribus, in dies  
confórmare dignéris,  
te rogámus, audi nos

- e) Ut his fámulis tuis  
perseverántiae virtútem  
donáre dignérис te rogámus, audi nos
- e) Ut hos fámulos tuos, fratres nostros  
(has fámulas tuas, soróres nostras)  
benedícere et sanctificáre  
et consecráre dignérис, te rogámus, audi nos
- Ut nosmetípsos in tuo sancto servítio  
confortáre et conserváre dignérис, te rogámus, audi nos
- Ut ómnibus benefactóribus nostris  
sempitérna bona retríbuas, te rogámus, audi nos
- Ut óculos misericórdiæ tuæ  
super nos redúcere dignérис, te rogámus, audi nos
- Ut obséquium servitútis nostræ  
rationábile fáciás, te rogámus, audi nos
- Ut reguláribus disciplínis  
nos instrúere dignérис, te rogámus, audi nos
- Ut mentes nostras ad cælestia  
desidéria érigas, te rogámus, audi nos
- Iesu, Fili Dei vivi  
Christe, audi nos  
Christe, audi nos  
Christe, exáudi nos  
Christe, exáudi nos te rogámus, audi nos

74. Deinde tantummodo sacerdos surgit et, manibus extensis, dicit:

Ánnue, quásumus, Dómine,  
précibus pópuli supplicántis  
et intercedénte Dei Genetríce María,

Órdinis nostri matre ac patróna,  
 atque beáto Domínico, patre nostro,  
 cælesti grátia  
 famulórum tuórum (famulárum tuárum) corda dispóne,  
 ut sacránda tibi péctora  
 Sancti Spíritus ignis  
 ab omni culpárum labe puríficet  
 et caritátis ardóre veheménter accéndat.  
 Per Christum Dóminum nostrum.

Vel:

Ánnue, Dómine, prémibis pòpuli tui,  
 et intercedénte beáta Vírgine María, Ecclésiæ matre  
 Ordinísque nostri patróna benevolentíssima,  
 ac beáto Domínico, patre nostro,  
 super hos fámulos (has fámulas)  
 quos (quas) ad perféctam Christi sequélam benígnus vocásti,  
 divínum Spíritum abundánter effúnde,  
 ut quod temporáli pignore promisérunt,  
 perpétua devotióne confírment.  
 Per Christum Dóminum nostrum.

Vel:

Sanctitatis auctor, Deus,  
 preces familiæ tuæ cleménter exáudi  
 et, deprecánte Ancilla tua Ordinísque nostri Matre Virgo María  
 ac prémibis beáti Domíni, patris nostri,  
 super hos fámulos tuos (has fámulas tuas)  
 copiósam benedictiónem effúnde,  
 ut quod, te donánte, promisérunt,  
 te prosequénte, constánter adímplicant.  
 Per Christum Dóminum nostrum.

Omnes adstantes: Amen.

Diaconus: Leváte.

Et omnes surgunt.

B) SOLLEMNIS BENEDICTIO  
SEU CONSECRATIO NUPER PROFESSORUM

75. Religiosi (vel religiosæ) nuper professi (vel professæ) genua flectunt et Prior vel sacerdos, manibus super eos (eas) extensis, dicit benedictionis precem iuxta formularia hic posita, in quibus verba uncis inclusa pro opportunitate omitti possunt.

76. a) pro Fratribus:

Deus, omnis sanctitatis fons et origo,  
homines a te creatos ita dilexisti  
ut divinae naturae consortes efficeres;  
quod tuae bonitatis consilium  
nec Adae peccatum extinguere  
nec mundi criminis valuerunt mutare.  
[Etenim temporum primordiis  
nobis Abel praebuisti  
innocentis conversationis exemplar;  
ex dilecta autem Hebreorum plebe  
sanctos deinceps viros prouide suscitasti  
omniisque virtute preclaras mulieres,  
in quibus Sion eminet Filia,  
sanctissima semper Virgo Maria,  
cuius de castis visceribus  
Verbum tuum pro mundi salute incarnatum processit,  
Iesus Christus Dominus noster.  
Qui a te, Pater, forma sanctitatis effectus,  
ut nos ditaret se fecit egenum  
servique vestem induit  
ut nos redderet libertati].  
Mystero autem paschali  
mundum ineffabili caritate Christus redemit  
suamque sanctificavit Ecclesiam,  
cui a te, Pater, Spiritus dona promeruit.  
Tu enim, voce suggerente Paracleti,  
ad Christi sequelam  
innumeros filios attraxisti

qui, relíctis ómnibus,  
suávibus nexi vínculis caritátis  
tibi fervénti adhærerent ánimo  
cunctísque frátribus deservírent.

Réspice ergo, Dómine, super hos fámulos tuos,  
quos supérna providéntia vocásti,  
et emítte in eos Spíritum sanctitátis,  
ut quod, te donánte, læti promisérunt,  
te adiuvánte, fidéles adímplicant.

Divíni Magístri exémpla  
studióse intueántur,  
imiténtur assídue.

Per oboediéntiam consentiéntes,  
per castitátis disciplínam amóre sociáti altióre,  
per paupertátem árctius ab ínvicem dependéntes,  
Ecclésiam Dei, ópera sua in mundo dilatándam,  
in própria communitáte prius ædíficent.<sup>6</sup>

Sint in tribulatióne patiéntes,  
in fide stábiles,  
spe gaudéntes,  
caritáte apostólica fervéntes.  
Eórum conversátio Ecclésiam lætíficet,  
mundi salútem promóveat  
ac bonórum cælestium signum exsístat præclárum.

Dómine, sancte Pater, his fámulis tuis  
sis munímen ac régimen,  
et cum ad Fílii tui tribúnal pervénerint,  
sis merces et præmíum:  
ut devotiónis suæ múnera adimplésseret  
et, in tua caritáte firmáti,  
Sanctórum fruántur consórtio  
cum quibus perpétuum tibi honórem retríbuant.  
Per Christum Dóminum nostrum.

Omnes: Amen.

---

<sup>6</sup> Cf. LCO, n. 3, § II.

Vel:

Deus, per quem Ecclésia tua sanctificáta viréscit,  
te decet laus omnis creatúræ.  
Tu, enim, téporum exórdio  
lætábilem mundum creásti;  
qui, cum Adæ peccáto collápsus iacéret,  
novum cælum novámque tellúrem futúra promisísti.  
Terram autem homínibus commisísti,  
ut suo fecundárent labóre  
et per eius percurréntes vias  
ad cælestem civitátem gressus dirígerent.  
Fíliis autem tuis, quos sacris initiátos mystériis,  
in sanctam congregásti Ecclésiam,  
vária charísmatum dona distríbus,  
ut sint qui in casto connúbio tibi desérviant  
quique núptiis propter regnum cælórum renúntient,  
bona cuncta cum frátribus commúnícant  
ac tanta ínvicem diligunt caritáte,  
ut, cor unum effécti,  
societátis ætérnæ præstent imáginem.

Súpplices ergo rogámus:  
de cælis emítte Paráclitum  
super hos fámulos tuos  
qui Christi verbis fide adhæsérunt constánti.  
Eórum róbora mentes,  
ad Evangélii doctrínam vitam confórma.  
Férveat in eis, Dómine, mútua cáritas  
hominúmque flagret stúdium,  
ut signum exsístant maniféstum  
te unum esse Deum verum  
cunctósque hómines infinítō amóre dilígere.  
Fac, Dómine, ut huius vitæ certámina  
fórtiter sustinéndo  
céntuplum iam nunc, quod promisísti, accípiant  
palmámque tandem cósequi mereántur ætérnam.  
Per Christum Dóminum nostrum.

Omnes: Amen.

## 77. b) pro Monialibus:

Deus, omnis sanctitatis fons et origo,  
homines a te creatos ita dilexisti  
ut divinae naturae consortes efficeres;  
quod tuae bonitatis consilium  
nec Adae peccatum extingue  
nec mundi crimina valuerunt mutare.

Verbum tuum pro mundi salute ineffabili caritate donasti,  
Iesum Christum Dominum nostrum,  
ex Maria Virgine incarnatum.

Qui a te, Pater, forma sanctitatis effectus,  
ut nos ditaret se fecit egenum  
servique vestem induit ut nos redderet libertati.

Mystero autem paschali  
mundum pretioso sanguine Christus redemit  
suamque sanctificavit Ecclesiam,  
cui a te, Pater, Spiritus dona promeruit.

Tu enim, voce suggerente Paracleti,  
ad Christi sequelam innumeros filios attraxisti  
qui, relictis omnibus,  
suavibus nexi vinculis caritatis  
tibi ferventi adhaerent animo  
cunctisque fratribus deservirent.

Respice ergo, Domine, super has famulas tuas,  
quas superna providentia vocasti,  
et emitte in eas Spiritum sanctitatis,  
ut quod, te donante, laetare promiserunt,  
te adiuvante, fidèles adimpleant.

Divini Magistri exempla  
studiouse intueantur,  
imitentur assidue.

Per oboedienciam consentientes,  
per castitatis disciplinam amore societate altiore,  
per paupertatem arctius ab invicem dependentes,  
Ecclesiam Dei, sui ipsius oblatione in mundo dilatandam,  
in proprio monastero prius aedificant.<sup>7</sup>

<sup>7</sup> Cf. LCM, n. 3, § II.

Sint in tribulatiōne patiētes, in fide stābiles,  
spe gaudēntes, caritāte fervēntes.  
Eārum conversātio Ecclēsiām lætificet,  
mundi salūtem promōveat  
ac bonōrum cālestium signum exsīstat præclārum.

Dōmine, sancte Pater,  
famulārum tuārum misericors dīrige gressus  
et iter defēnde benīgnus ;  
quæ cum demum pervaenerint  
ad summi Regis tribūnal,  
non Iūdicis verba pavēscant  
sed Sponsi vocem percipiānt  
suāviter ad nūptias cālestes vocāntis.  
Per Christum Dōminum nostrum.

Omnes: Amen.

Vel:

Deus, per quem Ecclēsia tua sanctificāta virēscit,  
te decet laus omnis creatūræ.  
Tu, enim, tēporum exordio  
lætabile mundum creāsti;  
qui, cum Adae peccāto collāpsus iacēret,  
novum cālum novāmque tellūrem futūra promisisti.  
Terram autem homīnibus commisisti,  
ut suo fecundārent labōre  
et per eius percurrēntes vias  
ad cālestēm civitātem gressus dirigerent.  
Filiis autem tuis, quos sacris initiātos mystēriis,  
in sanctam congregāsti Ecclēsiām,  
vāria charīsmatum dona distrībus,  
ut sint qui in casto connūbio tibi desérvant  
quique nūptiis propter regnum cālorū renūntient,  
bona cuncta cum frātribus commūnicent  
ac tanta ívicem dīligant caritāte,

ut, cor unum effécti,  
societatis ætérnæ præstent imáginem.

Súpplices ergo rogámus:  
de cælis emítte Paráclitum  
super has fámulas tuas  
quæ Christi verbis fide adhæsérunt constánti.  
Eárum róbora mentes  
et ad Evangélii doctrínam vitam eárum confórmam.  
Férveat in eis, Dómine, mútua cáritas  
hominúmque flagret stúdium,  
ut signum exsístant maniféstum  
te unum esse Deum verum  
cunctósque hómines infinítō amóre dilígere.  
Fac, Dómine, ut huius vitæ certámina  
fórtiter sustinéndo  
céntuplum iam nunc, quod promisísti, accípiant  
palmámque tandem cósequi mereántur ætérnam.  
Per Christum Dóminum nostrum.

Omnès: Amen.

78. c) pro Sororibus:

Deus, omnis sanctitatis fons et orígo,  
hómines a te créatos ita dilexísti  
ut divinæ natüræ consórtes effíceres;  
quod tuæ bonitatis consílium  
nec Adæ peccátum extínguere  
nec mundi crímina valuérint mutáre.  
Verbum tuum pro mundi salúte ineffábili caritáte donásti,  
Iesum Christum Dóminum nostrum,  
ex María Vírgine incarnátum.  
Qui a te, Pater, forma sanctitatis efféctus,  
ut nos ditáret se fecit egénum  
servíque vestem índuit ut nos rédderet libertáti.  
Mystério autem pascháli

mundum pretioso sanguine Christus redémit  
 suámque sanctificávit Ecclésiam,  
 cui a te, Pater, Spíritus dona proméruit.  
 Tu enim, voce sugerénte Parácliti,  
 ad Christi sequélam innúmeros fílios attraxísti  
 qui, relíctis ómnibus,  
 suávibus nexi vínculis caritátis  
 tibi fervénti adhærérent ánimo  
 cunctísque frátribus deservírent.

Réspice ergo, Dómine, super has fámulas tuas,  
 quas supérna providéntia vocásti,  
 et emítte in eas Spíritum sanctitátis,  
 ut quod, te donánte, lætæ promisérunt,  
 te adiuvánte, fidéles adímplicant.  
 Divíni Magístri exémpla  
 studióse intueántur,  
 imiténtur assídue.  
 Per obediéntiam consentiéntes,  
 per castitátis disciplínam amóre sociátæ altióre,  
 per paupertátem árctius ab ínvicem dependéntes,  
 Ecclésiam Dei, oblatióne sua in mundo dilatándam,  
 in própria communitáte prius aëdificent.<sup>8</sup>  
 Sint in tribulatióne patiéntes, in fide stábiles,  
 spe gaudéntes, caritáte operántes.  
 Eárum conversátio Ecclésiam lætíficit,  
 mundi salútem promóveat  
 ac bonórum cælestium signum exsístat præclárum.

Dómine, sancte Pater,  
 famulárum tuárum misericors dírige gressus  
 et iter defénde benígnus ;  
 quæ cum demum pervénerint  
 ad summi Regis tribúnal,  
 non Iúdicis verba pavéscant

<sup>8</sup> Cf. LCO, n. 3, § II.

sed Sponsi vocem percípiant  
suáviter ad núptias cælestes vocántis.  
Per Christum Dóminum nostrum.

Omnes: Amen.

Vel:

Deus, per quem Ecclésia tua sanctificáta viréscit,  
te decet laus omnis creatúræ.  
Tu, enim, téporum exórdio  
lætabilem mundum creásti;  
qui, cum Adæ peccáto collápsus iacéret,  
novum cælum novámque tellúrem futúra promisísti.  
Terram autem homínibus commisísti,  
ut suo fecundárent labóre  
et per eius percurrentes vias  
ad cælestem civitátem gressus dirígerent.  
Fíliis autem tuis, quos sacris initiátos mystériis,  
in sanctam congregásti Ecclésiam,  
vária charísmatum dona distríbus,  
ut sint qui in casto connúbio tibi desérviant  
quique núptiis propter regnum cælorum renúntient,  
bona cuncta cum frátribus commúnicent  
ac tanta ínvicem díligant caritáte,  
ut, cor unum effécti,  
societátis ætérnæ præstent imáginem.

Súpplices ergo rogámus:  
de cælis emítte Paráclitum  
super has fámulas tuas  
quæ Christi verbis fide adhæsérunt constánti.  
Eárum róbora mentes,  
ad Evangélii doctrínam vitam confórma.  
Férveat in eis, Dómine, mútua cáritas  
hominúmque flagret stúdium,  
ut signum exsístant maniféstum

te unum esse Deum verum  
cunctosque homines infinito amore diligere.  
Fac, Domine, ut huius vitae certamina  
fortiter sustinendo  
centuplum iam nunc, quod promisisti, accipiant  
palmamque tandem consequi mereantur aeternam.  
Per Christum Dominum nostrum.

Omnes: Amen.

# V

## DECLARATIO ET PROTESTATIO

### PRO ADMISSIONE AD ORDINEM VEL AD INSTITUTUM

79. Formula quæ sequitur (LCO, *App.*, p. 235),<sup>9</sup> initio novitiatus adhibita, ante professionem, et primam et sollemnem seu perpetuam, denuo adhibetur.

Declarámus tibi  
quod post professióinem tuam obligáveris ad tria vota,  
obœdiéntiæ, scílicet, castitatis et paupertatis.  
Item quod tenéberis ad observántiam legum Órdinis  
(*vel*: Institúti);  
et ínsuper, quod proféssio tua erit nulla  
si súbdole áliquod grave impedíméntum  
aut gravem déféctum sanitatis tacuísses vel dissimulásses,  
propter quem fuísses mérito reiciéndus (*vel*: reiciénda).

Protestámur étiam tibi  
quod nihil mercédis repétere póteris  
ob quamcúmque óperam Órdini (*vel*: Institúto) præstitam.

N.N., O.P.  
prior / priorissa

N.N.  
(candidátus / a )

N.N., O.P.  
testis

N.N., O.P.  
testis

---

<sup>9</sup> Hic textus aptandus est iis attentis quæ in iurisprudentia uniuscuiusque regionis cavitur.

## VI

### FORMULA ABSOLUTIONIS GENERALIS

#### DE TRANSGRESSIONIBUS REGULÆ PRO SODALIBUS FAMILIÆ DOMINICANÆ

80. In festivitatibus Ordinis vel die quarta Cinerum vel capitulo sollemni expleto (diebus 24 decembris et 24 martii) vel in fine exercitiorum spiritualium vel alia opportunitate, sodales Familiae Dominicanæ indulgentiam plenariam acquirere possunt, consuetis condicionibus, per absolutionem generalem de transgressionibus regulæ. Hac absolutionis formula uti possunt Prior vel Priorissa in sua communitate, vel Adsistens (religiosus seu religiosa) aut Prior seu Priorissa in Fraternitate S. Dominici: qui omnes nomine "Prioris" hic infra indicantur.

81. Pro monitione initiali, Prior hæc vel similia dicere potest:

Fratres (soróres),  
voluntáte sancti patris Domíñici,  
transgressiónes legum Órdinis non ad culpam deligábant,  
sed ad pœnam tantum.<sup>10</sup>  
Ne autem huiúsmodi dispositio disciplínam relaxáret,  
Domínicus, "si quem vidébat fratrem in álico delinquéntem,  
quasi non vidéret pertransíbat,  
sed póstea plácido vultu et blandis verbis dicébat:  
«Frater, tu male fecísti, confitére»;  
et benígnis verbis omnes ducébat ad confessióinem pæniténtiæ.  
Et licet cum humilitáte verbórum  
gráviter puniébat excéssus eórum,  
tamen consoláti ab eo recedébant".<sup>11</sup>

<sup>10</sup> *I Const., Prol.*

<sup>11</sup> *Acta canoniz. S. Dominici, Proc. Bonon., n. 32, MOPH XVI, p. 150.*

Tali admonitióne permótí (permótæ),  
 sicut lìberi sub grátia constitúti.<sup>12</sup>  
 humíliter agnoscámus transgressiónes  
 quas contra régulam et institutiónes  
 et contra præcépta superiòrum commísimus,  
 quo alácrius in via Domínici ambulémus  
 eiúsque caritáte in veritáte perficiámur.

Tunc fit discussio conscientiæ secreto; qua expleta hæc precatio dicitur ab omnibus, Priore incipiente:

Dan 3,29-30.42-43

Dómine, iníque égimus recedéntes a te  
 et delíquimus in ómnibus,  
 et præcépta tua non audívimus nec observábimus,  
 nec fécimus sicut præcéperas nobis  
 ut bene nobis esset.  
 Sed fac nobíscum iuxta mansuetúdinem tuam  
 et secúndum multitudinem misericórdiæ tuæ.  
 Et érue nos in mirabílibus tuis  
 et da glóriam nómini tuo, Dómine.

¶ Kýrie eléison.

R. Christe eléison.

¶ Kýrie eléison.

Pater noster.

¶ Osténde nobis, Dómine, misericórdiam tuam.

R. Et salutáre tuum da nobis.

¶ Dómine, exáudi oratióne meam.

R. Et clamor meus ad te véniat.

<sup>12</sup> Cf. *Regula*, n. 8, p. 19.

Deinde Prior dicit:

Dóminus noster Iesus Christus  
per mérita suæ sacratíssimæ Passiónis  
et per intercessiónem beátæ Maríæ Vírginis,  
beáti Domíni patris nostri et ómnium Sanctórum Órdinis,  
vos absolvat ab omni vínculo delictórum  
et grátiam suam vobis infúndat.  
Et ego auctoritáte ipsíus  
et beatórum Apostolórum Petri et Pauli  
et Summórum Pontíficum,  
Órdini nostro ac vobis concéssa  
et mihi in hac parte commíssa,  
absólvo vos a transgressiónibus Régulæ, Constitutiónum,  
ordinatiónum et admonitiónum maiórum nostrórum,  
et ab ómnibus pæniténtiis oblítis seu étiam negléctis.  
In nómine Patris, ☩ et Fílii, et Spíritus Sancti.s<sup>13</sup>

R. Amen.

---

<sup>13</sup> Cf. SCR, *Formula Absolutionis generalis Regularium in posterum adhibenda*: ASOP 38, 1968, pp. 573 sq.